

HISTORY OF INDIA IN GARO

INDIANI KATTA

by

K. W. MOMIN, L. T.

(Snigipa seani)

1977

This book belongs to

*Recommended by the Education Department as a Textbook
for Classes V-VI of M. E. Schools in Garo Hills. Vide No.
12255 T. Dated 1-8-1957.*

*Middle English Schoolrangni V aro VI Class--
rangna sorkarini namnikgimin Textbook.*

INDIANI KATTA

HISTORY OF INDIA IN GARO

by

K. W. MOMIN, L.T.

(SNIGIPA CHAPA KANI)

1977

Published by Sri L. R. Marak
R. C. Road, Chandmari,
TURA

Seventh Edition, 10,000 Copies
January 1977

PRINTED AT THE DIOCESAN PRESS, MADRAS—1977. C8734

AGANCHENGANI

Ia seanio bangigijasan katta ja'pangrangko on'dapaha; indiba adita chapa ka'sretanirangko namatna joton ka'aha aro Text Book Committeeni ku'pattiani gita rakako donataha. Ia gital seanio pilak ong'anirangko che'em che'em seja-haoba a'songni itihhasni bidingo u'ina nangchong-mota ong'anirangko, uarangni a'selrangko aro biterangko sulsul mesokna joton ka'aha aro Middle Englishni gadangna bilsi gnini poraianina chu'onge donmanaha. Periodprakni bon'ao ong'anirangko sulsul u'ina gita 'Line of time' koba mesokaha.

Noksarangko donanio adita neng'anirang gnangoba anga ianpako adita noksarangko je-rangan krara aro dakchakani ong-gen ine nika uarangko donatna man'ahani gimin kusi ong'a. Meprango bang'a kattarangko sejaha; maina itihhasni bidingo je biaprangko tale u'ina nanga ua biaprang aro kattarangkosan donaha. Ian da'ororoni Middle Englishni gadangna chu'ong-gen ine anga ka'donga.

K. W. M.
(1953)

AGANDAPANI

Ia chapa kartaianio anga adita kattarangko, mongsongde India jakgitel ong'ani ja'mano ong'a obostaranko on'tiprak sejotdapaha. Chapa ka'sretanirangkoba ama dipet namatna joton ka'aha.

Chapa ka'atgipa :

L. R. M.

1976

Lesson **Jak.**

MUHAMMEDANRANGNI CHASONG—BAK II

19.	Mussalmanrangni Indiao Napchengani	47
20.	Ghaznini Mahmud	51
21.	Songnokna Dakgrikanirang ..	55
22.	Turki aro Afghan Rajarang ..	59
23.	Timur Ja'kora	65
MOGULS		
24.	Ka'donggipa Babar	69
25.	Ka'sae Dakgipa Humayun ..	74
26.	Sher Shah (Sur Ma'chong) ..	79
27.	Dal'gipa Akbar (1557-1605) ..	85
28.	Jehangir (1605-1627)	90
29.	Shah Jehan (1627-1658) ..	99
30.	Aurangzeb (1658-1707)	103
31.	Maharattani Raja Sivaji (1627-1630) ..	108
32.	Mogul Songnokni Gimaangani ..	116
	Mogul Rajarangni Ma'biding ..	118
33.	Nadir Shah (1739)	119
34.	Maharattarang	121
35.	Ahmad Shah Abdali (1761) ..	124
(Line of Time) MUHAMMEDAN PERIOD		126

ENGLISHNI CHASONG—BAK III

36.	Englishrang Indiaona Maina Re'baaha Aro Maikai Frenchrang Baksa Dakgrikaha	127
37.	Robert Clive, Indiao Englishni Bilko Manchenggipa	129
38.	Arcotko Rim'ani (1751)	131

Lesson	Jak.
39. Siraj-ud-doulah aro Mir Jafar ..	135
40. Mysoreni Hyder Ali ..	139
41. Tippu Sultan ..	143
42. Englishni Sason Ka'na Skang Indiani Obostarang ..	148
43. Maikai Englishrang Indiako Sason Ka'gipa Ong'baaha ..	150
44. Lord William Bentinck ..	152
45. Lord Dalhousie Bongagipa British Indiako Dakgipa ..	159
46. Lord Canning aro Indiani Sipairangni Chakatani ..	165
47. Englandni Sasonni Ning'o Dongani ..	167
Lord Elgin (1862-1863) ..	169
Sir John Lawrence (1864-1869) ..	169
Lord Mayo (1868-1872) ..	170
Lord Northbrook (1872-1876) ..	170
Lord Lytton (1876-1880) ..	170
Lord Ripon (1880-1884) ..	171
Lord Dufferin (1884-1888) ..	171
Lord Lansdowne (1888-1894) ..	172
Lord Elgin (1894-1899) ..	172
Lord Curzon (1899-1905) ..	173
Lord Minto (1905-1910) ..	173

Lesson	Jak.
Lord Hardinge (1910-1916)	.. 174
Lord Chelmsford (1916-1921)	.. 175
Lord Reading (1921-1926)	.. 176
Lord Irwin (1926-1931)	.. 176
Lord Willingdon (1931-1936)	.. 176
Lord Linlithgow (1936-1942)	.. 177
48. Jakgitel Ong'na Chakatan	.. 179
49. Hindu Muslim Meligijani	.. 183
50. Lord Wavell 188
51. Lord Mountbatten 190
52. Jakgitel India 194
53. India Jakgitel Ong'ani Ja'mano	.. 195
Somoi gita Sulsul Ong'anirang	.. 197

1. CHENGONI INDIANI KATTAKO U·IANI CHOLRANG

Chengo ong'a obostaranko u'ina man'na gita see rakiani dongja. Ruutbea chasongoni sea jotani-rangko changahaoba, ning'tua u'ianirang donga-haoba a'songna ba jatna ong'ani kattarangko see rakianiko donjachim. Indiba ja'mano iarang-oniko adita chimongaha :

1. Ma·gitcham pagitchamrangni kattarangko deritchu su'ritchurangni aganrikrikbaani.

2. Gisik ra'anina songe dongimin ro'ong-rango ba silplengrango kite see donanirang.

3. Gipin a'songoni songreba·giparangni an-tangtangni re'bao nika obostaranko see rakianirang.

Mongsongbate iarangonikosan chengoni Indiani kattarangko sandie chimonge man'a dipet sulsul ja'mano seaha.

2. INDIA A·SONG

1. Indiara Asiani salgipengo donggipa bak ong'a ; jeko dal'begipa a'brirangni ritingchi, suurini pakma gita, salgro saliramoni salaramona mail 1000

na batpile dingtangata. Uarangkon Himalayas ine minga, aro uara mailbri mailbonga chua; mitamrango maildok ong'nasipila aro salgi nanggitota gita nikpila. Na'a put kolgrik chugipa pakmako maldona neng'nikbejawachimma ? Ugita pakma king 1000 ko ge'sani kosako ge'sa gatoa ine chanchichipbo. Aiao ! uarang aramrangna bateba chubatgenchim.

2. Himalaya kattara Sanskrit ku'sikoni ong'kata. Himani orto suuri alayani orto nok ba song ong'a, Uni gimin Himalayani mangsongara suurini song ba nok ong'a. Uarangko indine minga, maina ua chubegipa a'brirangni kosako pangnaba jrunggija suurirang dongkama. Uno mamung gam'anirangko knaja aro apalgipa suurini a'barangna agre mamung gipinko nikani dongja.

3. Indiani salgrochi ia Himalaya a'brirangni nalsao donggipa a'songko Asiani bijatchi ine minga. Uanoba ka'sinbea, bang'bata a'an raka, ro'ongrara, bang'gija mikkarangsan waa aro bang'gija chibimarangsan dongaia. Ua inditan chua, ua a'songni mitam bakko A'gilsakni Nokking ine minga. Ua chugipa ka'singipa biapo songdonggipa manderang uamang'ni jila jakrangna samrangko am'roroe biapsaoni biapsaona re'rorogiparang ong'a. Uamang janggi tangna namen neng'nikbea; maina mi misirang altuae chaja.

4. Indiba Himalayani ka·machi salgipengo, apalbegipa a·kawerang gnang, jeo dal·gipa chibi·marang joka, sal nanga aro ding·a. A·a a·sal aro chirang bang·ani gimin altuae janggi tangna man·a aro pilak ge·anirang namen sila. Ia a·kaweranga apalbegipa a·ba gita salaramoni saliramona king·king sokpila. Uarangkon Hindustan ba salgroni India minga.

5. Ia a·sal gnanggipa a·dokko salgrochi dal·begipa suurini pakmarang chipchanga aro salaram saliram aro salgipengchi Indian sagal dongpenga. Skangni salrango jahatrang dongja. Chonchongipa ringransan dongaia aro uaranga dal·gipa balwa ta·rakgipa sagalko chobatna man·jachim. Uni gimin chengode Hindustanni a·sal gnanggipa a·songa samgitamchi tu·begipa sagal jokdule aro salgrochi dal·begipa suurini pakmachi dongpenge mamung a·sel gri dongna man·achim.

6. Ia dal·begipa pakmarang Indiani salgro gimikchin wilwile salaramoni saliramona aro sagal·ona sokpile dongode darangba salgrochini ka·singipa a·songrangoni Indiaona ong·onbana man·jawachim. Indiba ia dal·begipa a·brirang samgnini bon·chotachi salaramchiba saliramchiba onro·roanga aro chongipa a·briransan donga aro uarangni gisepgriko batsotram a·gitokrang donga. Uarangkon passrang ba batsotramrang ine minga ;

maina uarang gita manderang batsotbana man'a. Uarangba chubea aro suurian gapronga aro uarang gita re'bana neng'beani ong'a. Indioba ka'donggipa aro bilakgipa manderang uarang gita re'bana man'aha.

7. Chengo salgrochini ka'sinbegipa a'songo donggipa manderang ia a'gitokrang gita ka'machi donggipa a'sal gnanggipa aro ding'gipa a'kaweona ong'onbaha. Jensalo salgroni songona bate uano mairongpile altuabatbee janggi tangna man'a ine nikaha, ua a'kawerangko an'tangtangni song dakaha.

3. INDIANI MANDERANG

CHENGONI MANDERANG

1. Indiani kattara chengo, darang ba gipinchini re'bana skang bilsu hajalni hajal skang uno song-donggipa manderangoni a'bachenga. Chengo India a'songa burungarigipa bang'a matburungrangni aro dal'dalgipa chipurangni dongramsang ongrachim. Song nokrang, ramarang ba songjinmarang gri-chim. Banoba banoba manderang gnang, indiba matburungrang gita rong'kolrang bolgoprango donge biterangko aro ja'dilrangko am'e cha'e tangachim, aro burungjoljol nagande re'roroachim. Ruutbea chasongrangni ja'mano uamang u'iroroe

bolni wa'ni jamdaprangko dakaha. Gana china-
 nina bol bigilrangko aro bikaprangko tarie
 sim'pakrangko doke jakkalaha, matgilrangko
 ganaha. Matgipa rong'pleng aro rong'petcho-
 krangko jakkale matchokrangko aro gipin
 matburunrangko so'otachim. Wa'ldu ra'e
 rong'tot tote wa'alrangko bikote uamang'ni so'ot-
 gimin matburunrangko so'e ange cha'na u'iaha.
 Iamang'ken RO·ONGNI CHASONG ine minga.
 Ua chasongni jakkala rong'plengrangko da'oba
 an'ching gisep gisep bolrangni dal'pripgiminko ba
 a'a ning'rangoniko nikna man'a. An'chingoni
 mitam manderang uarangkon ui'gijasa goera rong.
 pra ba goera goani ro'ong ine minga.

Ruutbea chasongrangni ja'mano ia manderang
 nambata cha'anirangko cha'e be'enni bilrangba
 batbaroroaha aro pilak kamrangon u'ibatroroe
 changbatbaaha. Uamang a'ani me'dik sam'dik-
 rangko dakna aro silrangko bikote uarangoniko
 silchidarerangko dake jakkalna changbaaha aro
 bolni wa'ni nokrangko rike dongaha. Iamang'kon
 SILNI CHASONG ine chanachim.

2. Jensalo dal'dalgipa bilakgipa manderang
 salgrochini ong.onbara, uamang dolgni mande-
 rangko nikeachim. Dolsa dolgipinna bate nitoja-
 batgipa, an'gisimbatgipa, daknangjabatgipa, bolkan
 dikbat gipa aro pilak daka rikanirango changa

sapanirango namen komibatgipa ong'achim. Uamang·kon KOLS ine mingachim. Uamang·oni bang·batan sikar ka'e cha'achim aro jilanirangba dongkujachim ; indiba mitamrang ge'a gamaniko changaha. Uamang·ni songrang aro gittimrang dongaha. Uamang pagitchamrangni me·mang·rangko, putrangko jerangan andalgipa burungo, dintangmancha dal·gipa bol ba rong·marango, chibisik ba mikkim gnanggipa a·briango mite donga ine bebera'achim. Uamang jelororoha aro adita dol ba ma·chongni manderang ong·baaha. Uamang·ni deritchurang da·ororo Bengalni saliram jolni a·briango, Chota Nagpur, Orissa aro Indiani bijatchi jolo piprae dongenga. Uamang·oni mongsongbatgiparang Bhils, Santals aro Mundari-rang ong'a.

3. Dolgipinara iamang·na bate u·ibatkalgiparang ong'achim. Uamang·ko DRAVIDS ine minga. Iamang·ni pagitchamranga baonichong·mot pilakba aganna man·jaha. Mitam skia man·gipa manderang uamang·ko Indiani salgro saliramchini ruutbea bilsirangna skangan re·baaha, indiba ruutbea bilsirangna ding·gipa a·songo donge uamang·ni an·gilrang gisimaha ine chanchichipaha ; maina uamang·ni be·en bimangrang Kolsrangna bate daknangbata aro dal·dalbatachim. Indiba mitam manderang, uamang salgipeng salaram jol a·song-

rangoni, chong·motan Asia aro Australia a·songrangni gisepo donggipa a·a jerangan chengo nangdimachim, indiba mitamrang da·o chichang ong·skaha, ua biaprangoni re·baaha ine chanchi-chipa. Chengonin uamang·o jilanirang gnang aro burungrangko o·e game sue cha·achim. Uamang·ni songrang, gittimrang are songjinmarangba gnangchim. Songko nokko dilgipa nokmarangba gnangchim. Uamang·ni pagitchamrang a·ako, chipuko aro bolrangko mite ine olakkiachim aro uarangna kenachim. Uamang·ni miterang an·chiko ringna sikgipa ong·a ine uamang chanchiachim aro uamang·ko namnikatna gita do·o, do·bok aro matmarangko so·ote uarangni an·chiko boli on·achim. Ruuta bilsirangni ja·mano uamang u·igipa ong·rorobaaha. Indiani salgipeng jolo uamang·ni badinganirang namen apalbeaha. Salgrochini Aryan manderang ong·onbana skangan uamang sagal rikamrango ra·rurae badinganirang bang·aha. Gipin a·songni badinggiparangna mi, segun bolrang, do·de biparang, mongma wagam, chondon to, mosina ba·ra aro indakgipa bang·a bosturangko palataha ine mesokanirang gnang. Uamang·ni gisepo changgipa mistrirang silkamalrang aro ba·ra dokgiparang dongaha aro skangonin u·igipa jat ong·aha ine nika.

Iamang Kolsrang baksa songdongbrinaha; indiba

changbatgipa aro u'ibatgiparang ong'ani gimin a'songni nambatgipa a'ani bakrangko man'achim. Uamang Aryanrangni re'bana skang Indiani namgipa a'kawerango aro salgroni a'songrango songdongahachim. Uamang'ni bringija deritchurang Indiani salgipeng jolo da'oba dongenga. Uamang'ni mongsongbatgipa ku'sikranga Tamil, Telegu, Kanares aro Malayalam ong'a.

4. Rutbea chasongrang re'angaha, Asiani bijatchi jolo, jeko da'o Turkestan ine minga, bilakgipa jatsa gnangchim. Uamang jelbra jelsuae pilakchin pipraaha. Mitam dol saliramchi jitange Europe a'songrango gipaha. Dolgipin salgipengchi jitrobae Indiaona sokbaaha. Uamang bilakgipa ka'donggipa jat ong'achim. Jensalo ia ka'donggipa bilakgipa manderang salgronia'brini batsotramrang gita Indiaona ong'onbaaha, ua a'songo dongsogipa manderang baksa dakgrikaha aro uamang'ko an'tangtangni nokkol dakataha. Uamang'oni mitamko Indiani salgipengchi a'rikataha. Ia salgrochini manderanga changrogipa, an'gitchakgipa aro nitogipa manderang ong'achim aro dongsogiparanga bate dal' dalbatgipa aro bilakbatgiparang ong'achim. Ia salgrochini re'bagipa manderangkon ARYANrang ine minga aro uamang gitchambegipa ku'sik Sanskritko agana. Uamang dongsogipa manderangko chonnikachim; maina uamang'a an'tang-

tang gita bilagipa ba changgipa sapgipa ong.pajachim aro nitogipa manderang ong.pajachim.

5. Ia salgrochini ong'onbagipa manderang Indiao songdongpae dongsogipa manderang baksa brinangaha aro ruuta bilsirangni ja'mano jatsan gita ong'angaha. Ia bringimin jatrangan Hindu-rang ong'aha. Bilsu ruutbeani ja'mano salgrochini gipin gipin dolni manderang apsan batsotram ramarang gita maikai dingtang dingtang somoirango re'baaha, iarangko janapanian mikkangchini Indiani katta onngen. Iamang'a bang'bea jatrang aro bang'a ma'chongni manderang dingtang chasongrango napbaachim. Mitam salgrochini, mitama salaramchini Brahmaputra chibimani a'kawejoljol ong'onbaaha. Skang re'bae dongso-giparango dakgrike a'rike songdongeskaaha aro mitamrang songdongbrine jatrang nangrimangaha. Iamang'ni gisepo Turanian ba Mongolrang Tibet gita salaramchiko napaha. Uamang'ni deritchu su'ritchurang Assamni a'brirango donggiparangan ong'a. Uamang'ni ja'mano salgrochini Aryanrang, Persianrang, Greekrang, Sakasrang, Scythianrang aro Hunsrang napbae salgroni namgipa a'kawerango songdong a'chaaha aro ruuta bilsirangna dingtang dingtang songnokrangko dake songdongkam'aha aro gam gnanggiparang ong'aha. Indiaba hajal bilsirangni ja'mano gipin bilagipa

dolrang salgro saliramchini napbataiaha. Uamang·kon Muhammedanrang ine minga. Da·o bils i ritchaskumang re·angaha, uamang·oni skanggipa re·bachengaha. Uni ja·mano uamang re·badapdapkuaha aro bils i ritchabongamang re·angaha, uamang Hindu rajarangko ame a·songni bang·batakon sason ka·aha. Uamanga Arabs, Turks, Afghans ba Pathans aro Moguls ong·achim.

6. Indiaona chon·kame re·bagiparanga, Euro-peni manderang ong·achim. Uamang badingna mangsongesa dal·dalgipa jahatrango re·baaha. Europe a·songoniko je bosturangko Indjao man·na amja uarangko Indiaona ra·bae Indiaoni bang·a bosturangko jerangko Europe a·songo man·na amja uarangko bree ra·angskana re·baachim. Ia Europe-ni manderanga, Portuguese, Dutch, French, aro Englishrang ong·achim. Uamang·ni Indiaona re·bachengaoni da·o bils i ritchabongana bataha. Ia Europeni manderang badinganio jatsa jatgipin baksa namen susagrikbeaha aro jatsa jatgipinko Indiaoniko a·rikatna joton ka·e namen dakgrik-beachim. Chon·kamao English manderang pilak gipinrangko amtoke Indiaoniko a·rikattokaha, aro ja·manki-tiko India gimikko ong·nasipile uamang ra·aha. India jakgitel ong·kujana kingking ruuta bilsirangna Englishrang Indiako sason ka·aha.

BAK I. HINDURANGNI CHASONG

4. VEDIC CHASONGNI INDIANI ARYANRANG

1. Aryanrangni cheksi jerangan Indiani salgrosaliramchiko napbae Hindustanni a'kawerangosongdongeaha, uamangkon Indiani Aryanrang ineminga. Uamang badita bilsio Indiaona napbae unosongdongaha tale u'ina man'ja. Indiba B.C. 2000 aro B.C. 1500 bilsirangni gisepo ong'a ine chanchia. Saliramchi jelanggipa Aryanrangna bate iamang'ni gimin talbate u'ina man'a. Iamang a.bachengo sea jotanirang dongja beben; indiba uamang'ni miterangna bang'a ring'anirang gnangjeko chasongni chasongna pagitchamrangoni deritchu su'ritchurangona simsakbee skirikrikba'achim. Bilsiruitani ja'mano jensalo seanirangko changaha, 'ua ring'anirangko see rakkiaha. Uarangko VEDAS ba gisik gnangani ine minga.

2. Veda kitaprang kingbri gnang. Uarangoni mongsongbatgipa RIG VEDA onga. Uoni Sama Veda, Yazur Veda aro Atharva Veda ong'baaha. Kingprakon bak gni donga; Sanhitas ba gitrang aro Brahmanas jerango skianirangko aganbewalchirongtale seanirang gnang. Iarangan Hindu toromni a'bachenggipa ja'pang skianirang ong'a. Skanggipa Veda chongmotan Rig Vedako ramrammande sejaha, indiba toromibegipa manderang

jerangko Rishis ine minga, uamang'na Isolni para-pea kattarangsa ine bebera'achim.

3. Napbachengo Aryanrang Punjabni a'kaweo chibimani rikamrango kusi ong'e songdong a'chaha. Uamang Indiaona songkatbana skang sin'-begipa a'songo dongmitingo wa'alko ding'anina aro uamang'ni cha'aniko song'na nangbeachim. Uni gimin uko gamchatnikbeaha ; uni gimin Agni ba wa'alni mite, Surya ba salko aro Varun ba apalgipa salgirangko olakkiachim. Jensalo Punjabni a'kaweo songdongaha uamang'ni mi misina mikkarangko nangbeachim aro salgini mite Indrako olakkina a'bachengaha aro una ring'anirangko ring'na a'bachengaha, Mikka kimpretara uniku'rang aro mikka riprapara uni sel'uni andalgipa aramko su'prote a'barangona mikkako waatani ching'a'ine bebera'achim. Uandake uamang Vayu ba balwako, Rudra ritchagipa mikka kimpreatgipa aramko aro nitogipa an'senggipa Pring ba Ushako olakkiachim.

4. Kristona bilsa hajalsamang skang Hindurang Gangesni a'kawe jolгимiko gipaha. Manderangni gisepo dingtang dingtang kamrangko ka'anirangba indaken dol dol ma'ekangaha, aro deritchu su'ritchurangba apsan kamrangko ka'e janggitangani cholrangko dakaha. Uandake mitam ma'drangrang pangnan toromni bidingo olakkiani aro mingani ba ring'anirangko dakronggipa-

rang ong'e ua kamrango u'ibatgipa aro chang-
 batgiparang ong'baaha. Uamang'an olakkiani kam-
 rango jat gimikna dakdiligipa dolrang ong'aha.
 Uamang'an ja'mano Brahmanni ma'chongrang
 ong'baaha. Uamang'kon chubatgipa ma'chong ine
 chana aro uamang'ko rongtalgiparang ine chanchie
 pilakan mande ra'a. Gnigipa ma'chonga, Kshatriyas
 ong'a. Iamanga a'songko rakigipa sipairang ong'a
 aro a'songna bobilko warachakani salo dakgrikgipa
 manderang ong'a. Ia ma'chongon in rajarangba
 ong'a aro sason ka'ani bidingo donga. Gittamgipa
 ma'chonga Vaisyarang ong'a. Iamang'ni dolara
 badinggiparang, dokaan dakgiparang aro mitam daka
 rikanirangko dakgiparang ba mistrirang ba gipin
 changa sapanirangchi janggi tangani cholrangko
 dakgiparang ong'a. Uamang'ni gisepo mitam
 garme cha'giparangba gnang. Brigipa ma'chongni
 manderanga' Sudrarang ong'a. Iamanga skangoni
 Indiao songdonggiparang jerangan gipinchini
 re'bae amegiparangna bame uamang baksa dong-
 rimpae uamang'ni toromko manipa'giparang ong'a.
 Iamanga gipin manderangna kam ka'e on'giparang
 aro chongipa kamrangko ka'e cha'giparang ong'a.
 Ia ma'chongbrini manderangkosan Hindurang ine
 chana. Iamang'na agreba gipin manderang gnang
 jerangko Hindurang nangrimja aro cha'rim rorimja
 aro galgimin jat gita chana. Iamang nokkolrang

aro mitchigni kamrangko kagiparang ong'a. Ua-
mangkon Pariah ine minga.

5. RAMAYANA

1. Indiani salgro Hindustanni a'kawe jolo
bang'bea dingtang dingtang rajarang dongmanaha
ine iana skang aganbamanaha. Uamang'ni gisepo
bilakgipa aro ka'dongbegipa matgrikrang bang-
achim. Uamang'oni mingsingbegipa saksa Ikshaku



Rama aro Sita

ma'chongni Kshatriya raja pante Rama minggipa
gnangchim. Uni pagipa raja Dasaratha Ayodhya
jeko da'o Oudhe ine minga, a'songnik kosako sason

ka'achim. Ua pilak wilwila a'songrangni gisepo bilakbatgipa aro ka'dongbatgipa ong'aha.

2. Uororo nitobatsranggipa metrara Videha, jeko da'o Behar ine minga, a'songni Janak minggipa gipin Kshatriya rajani demechik Sita ong'achim. Ua chasongo badiaba raja an'tangni dal'gimin demechikna segipako am'na nangode mingsa manianiko dakrongachim ; ukon Syamvara ine minga. Uano a'songni changbatgipa bilakbatgipa aro gun gngangbatgipa panterangko seokachim. Janak rajao dal'begipa aro jrimbegipa chri dongachim aro je raja pantean ua chriko pe'gomna man'a una an'tangni demechik Sitako bia ke'a on'gen ine ku'rachakachim. *Sitara namgipa, gun gnganggipa aro nitobegipa ong'achim aro a'songni raja pangerang pilakan' uko man'na sikachim. Uandaken raja panterang saksani ja'mano saksu ua dal'gipa chriko pe'gomna joton ka'aha, indiba amjaha. Uamang'oni mitamde uko a'aoniko de'tomnan amjachim. Indiba jensalo Rama re'baaha ua altuaen ua jringipa chriko de'tome pe'gomaha aro tong'gni dake be'tongpilaha. Pilak nigipa mande-rang jakpa dokaha aro kusi ong'e inchroaha. Rama Sitako rasong chabee bia ka'aha. Indiba una bobil ong'kataha ; maina bang'a rajarang Sitako man'na sikbeachim.

3. Ramani pagipa uni depanterangni gisepo

Ramana ka'sabatachim aro an'tangni siani ja mano Oudho raja ong'rikchina ua sikachim. Dasarath rajao jikgipa sakgittam gnangchim. Rama uni skanggipa jikgipani dejakra ong'achim. Uni gni-gipa jikgipa an'tangni depante Bharatnasa uni pagipani songnokko man'rikatna sikachim aro ua Ramako namnikjaha. Sal sao ua budepa raja, an'tangko ka'sabee dakchakanina uni gnigipa jikgipana ua jeko uoniko bia ukon on'gen ine ku'rachakaha. Ua ia cholko ra'e rang'san Ramako gipin chel'a a'songchi bilsichi'brina watbrangatchina aro an'tangni depanteko uni pagipani songnokko man'rikatchina bi'aha. Raja namen duk man'be-aha aro ka'sabea depanteko maikai indake dakgen ua jajrengbeaha aro Oudhni manderang jerangan Ramako namnikbeachim aro una ka'saachim, namen ka'o nangbeaha. Uamang uko re'angjachina mol-molaha ; indiba Rama uamang'ni kattako knachakjaha. Rajput raja an'tangni kattako rakina nanga. Angni pagipa an'tangni kattako pe'ana bate anga burungo sian nambata ine, ua aganaha.

4. Rama pagipani katta gita rajani nokoni ong'kate re'angna nangaha. Ua Sitako an'tang baksa re'angatpana sikjabeachim; maina ua rajani demechik ong'e burung bolgrimo un baksa dongpae duk chakpana man'jawa ine ua chanchiaha, aro dongrikchina uko ge'etaha. Indiba Sita dongrikna

sikjaha. Ua inaha, 'Na'a jechi re'a anga uchin re'gen. Anga nang'ni kakketgipa jikgipa ong'a aro anga nang'ko pangnaba watjawa. Nang'ni rajani noko dongan salo dongpanasan anga nang'ko bia ka'jaha ; na'a jeo donga unon anga kusi ong'gen ine anga u'ia. Angni segipa Rama dongode burung bolgrimba rajani nok ong'gen, aro ua dongjaode agilsako nitobatsranggipa rajani nokoba sikdikdik dakgipa burungni jamdap gita ong'aigen, na'a angko dongrikchina aganabe. Jeo na.a donga unon angaba donggen aro jeo na'a sia unon angaba sigen.'

5. Uandake Rama uni pagipani nokko wate uni jikgipa Sita baksa aro uni jonggipa Lakshmana baksa jean uko ja'rikpana sikachim, chel'been re.angaha. A'bachengo uamang Indiani jatchi abrini a'songona re'angaha ; uoni ka'sine ka'sine salgipengchi ong'onroroange dal'begipa aro diltu-begipa burung damsaona sokangaha. Uamang bang'a chibimaranko ringrango batangaha.

6. Ramani Oudhko watani ruutgijan uni pagipa budepa uni depantena duk ong'e kalimbee siangaha. Unon uni denggugipa ma'detang an'. tangni depantean raja ong'e sason ka'gnok ine ka'dongsoengachim. Indiba uni depante Bharat namgipa aro bebegipa pante ong'achim aro uni adatang Ramana ka'saachim. Ua uko rikange uamang'ni pagipani songnokko sason ka'echina

mol·molaha. Indiba Rama re·bapiljachim. Ua indine aganataha, 'Angni pagipa angko bilsichi.-brina burungo dongna nanga ine ge·etaha aro anga donggen ine ku·rachakmanaha. Kshatriya raja pante an·tangni kattako pe·na man·ja. Bilsu chi·bri batangkujana kingking anga re·angpiljawa.' Uni gimin uni jonggipa saksan re·angpilna nangaha ; indiba ua songnokko an·tangna ra·jaha. Ua Ramasa rajachong·mot ong'a ine mesokna gita uni juta jorasako singhasonni kosako done ua re·bapilkujana kingkingsan uni pal gitasa Oudhni kosako sason ka·soaha.

7. Rama burung bolgrimo ruutbea bilsirangna donge uno donggipa manderang baksa ua ripeng dakaha. Uamang chonchongipa, gisimgipa aro daknanggijagipa ong'a aro bolgrimrango dongaigipa ong'ani gimin Kshatriyarang jerangan chang roa, an·gitchak aro nitogipa ong'a uamang·ko makkrerang ine mingachim. Salsao uamang·ni Dan·dakani burungo dongmitingo saksa skal raja Ravana minggipa, Rama aro uni jonggipa Lakshmanni sikar ka·na re·angmitingo, da·nang, Sitako an·tangni song Lanka, jeko da·o Ceylon minga chichangona rime katangaha. Rama uko rikangaha aro bolgrimo donggipa uni gisimgipa ripengrang uko dakchakaha. Uamang·oni dilgipa saksako Hanuman mingachim. Ukon Hindurang da·alona

kingking dal'gipa Makkre Mite ine manienga.
Dakgrikanio Skal Ravanako amaha aro uko so'ote
Sitako rimbapilaha.

8. Bilschi bri batangahaon a'songtang Oudhona
re'bapilaha aro uno raja ong'e bang'a bilsirangna
sason ka'aha. Uni janggi tanganiko segipa ki'tap
kon RAMAYANA ine minga. Ua ki'tapku
Valmiki Muni minggipa saksa toromigipa mande
seaha. Daomangba Hindurang Ramako mandeni
bimangko ra'e atchigipa Vishnu mite ine olakienga,
Hindu me'a bi'sa sakantian Rama gita ka'donggipa
aro kattatangna bebegipa ong'na joton ka'na
nanga aro Hindu me'chik bi'sa sakantian Sita gita
rinok rinok dakgipa, namgipa aro ka'sagipa ong'na
jotton ka'na nanga.

6. MAHABHARATA

1. Ramayanana agreba gipin ki'tap jeko
Hindurang rongtalgipa torom ki'tap ine chana,
gnangpiti. Uan Mahabharata ong'a. Ia ki'tap-
rangko poraie skangni Hindurangni dakbewal,
kamrang aro manianirangni gimin bang'en u'ina
man'a. Uarango rajarang maikai an'tangtangni
raiotrangni namnikaniko am'a aro raiotrangba
maikai an'tangtangni rajarangna kakket ong'a
nikna man'a.

2. Maha-ni mangsongara dal·gipa ong'a aro Bharata-ra saksa skangni Hindu rajani bimung ong'achim. Mahabharatani mangsongara Bharatani deritchu su·ritchurangni gisepo dal·begipa dakgrikani katta ong'a. Hastinapur a·songni raja Bharatani depanterang sakgni gnangchim. Saksani bimung Dhritarashtra aro sakgipinni bimung Pandu ong'achim. Dhritarashtrani dedrang Kurus aro Panduni dedrang Pandavas ong'achim. Dhritarashtra dejakra ong'oba mikgri ong'e atchiachim ; uni gimin uamang'ni pagipani siani ja·mano jonggipa Pandu Hastinapur songnokko sason ka'achim. Indiba uni adatangni tangengpition Pandu siangaha. Unon adasani dedrangni gisepo singhasonko man·rikgnina jegrikani ong'aha. Dhritarashtra uamang'ni dal·batgipa ong'e, adasani dedrangoni bribatgipa Panduni depante Yudhishtirako raja ong'china seokaha ; indiba Kauravasrangoni dal·batgipa Duryadhan ia seokaniko namnikjachim. Iani gimin dal·bea dakgrikani ong'kataha, aro ia dakgrikanio Indiani pilak Kshatriya rajarang pilakan ong'nasipile dolsasikchi chake dakgrikaha. Uamang sal 18 na Kuru-kshetra minggipa biapo, jeko da'o Panipat ine minga, bilongbee dakgrikaha. Gujaratoni raja Krishna minggipa Pandusrangna dakchakah aro Kurusrangko so·ottokaha. Yudhishtira Hastinapurni songnokko man·rikaha.

3. Pandavasrangna dakchakegipa Gujaratoniraja Krishnakon mande pil'gipa mite ine Hindu-rangni bebe ra'ani gnang. Ua kakketgipa Pandavasrangna chakaha aro kakketgipa songnok ba Dharmarajya-ko dakatna gita pilak namgija sason ka'gipa gipin rajarangkoba gimaate bang'a toromni bidingo skianirangko on'aha. Ia skianirangko Yudhishtirni jonggipa Arjunnana kupa'patiani gita seaha. Ua seanikon GITA ine minga.

7. HINDUNI GITCHAM CHASONG (B.C. 1000 oni B.C. 300)

1. Aryanrang, Dravidsrang, Kolsrang aro Turanianrang India a'songo ruuta bilsina songdongbrine dongaha. Uamang'ni ku'sikrang, olakki-anirang aro bebe ra'ani toromrang dingtang ong.rorobaaha. Vedicni chasongo jakkalgipa Sanskrit ku'sik toromko manidilgipa Brahminrang-niseani aro mingani ku'siksan ong'ariaha. Ramram manderangde Prakrit ku'sikkosa aganahachim.

2. Aryanrangni Indiaona re'baoni ruuta bilsini, haida hajal sa bilsirangna bateba Persianrang aro Greekrangni re'baani salrangona kingking Indiani kattako aro uno napegipa bang'a gipinrangni kattako mamung see rakianiba dongjachim, indiba salgro saliramchini jatrang dol dol ia

salrangni gisepo napbaenggenchim ine chanchina man'a. Ia chasongni gisepon Indiao bang'bea dingtang dingtang songnokrang aro rajarang dong-aha. Badiaba chasongo badiaba raja bilakbatsrang-gipa ong'e gipin rajarangko bamataha aro an'tangni ning'o donaha, aro rajarangni kosako dal'batgipa raja ong'aha. Unon uko Rajchakraverty ba Mandaleswar ine mingachim. Iako manianina minggnioni mingsasik dakbewalko jar'ikachim. Mingsako Rajsuya ine minga. Ia maniano pilak rajarang bamaniko mesokna re'bae maiba nokkolni kamko rajana ka'e on'achim. Minggipin bewalara Rajani gureko songsongantichi watatachim aro je rajaan bamna sikja, ua gureko rim'rikachim. Unon ua raja baksa dakgrikachim. Ia bewalkon Asvamedha ine mingachim.

8. BUDDHANI KATTA (B.C. 567-B.C. 487)

1. Bilsa 2500 mang re'angaha, Indiani salgroo saksa Suddhodana minggipa Kshatriya raja Sakyas ma'chongni kosako sason ka'achim. Ua dakgrik-rakgipa aro ka'dongbegipa mande ong'achim ua uni saksakamkam depante Gautamako an'tang gita dakgrikha changgipa ong'atna sikachim. Uni gimin ua una sel'u, chri aro tonualko maikai jakkalna nanga skiahachim. Gautama namgipa aro nito-gipa pante ong'achim. Uni ma'a paa aro uni ma-

chongni pilak Kshatriyarang uo rasong chaachim. Ua saksa nitogipa me'tra, Yasodhara minggipako bia ka'aha aro depante saksako man'aha. Ua rajani nambegipa noko dongachim aro uni janggi tanganio kusi ong'atani pilakan dongachim.



Buddha

2. Gautama pangnan chanchirakbegipa bi'sa ong'achim. Uaku'aganao rinok rinokdakgipa, ka'saniggipaaro pilaknan ka'sachakan gapgipa ong'achim. Pil'nipil sikar ka'mitingo, jensalo ua pilakkoba duk on'gijagipa cha'amenggipa matchokko nika, an'tangni jako tong'sa salgimin chriko gogija dontongrongachim. Da'nang, maina anga janggi gnang-giparangko duk on'na nanga ?

ine inachim aro uni brako chukop ning'o don-pilrongaiachim aro mamungkoba gogijan nok-tangona re'angpilrongaha. Gureo katsusaanioba ua pil'nipil gureni neng'beako aro rake rang'sitako nikon dondikaiachim ; maina uni gurena saknaaniko on'ana bate susaanikon gimaatna namnikbatachim.

3. Salsao sam bolrang ritimani somoio uni pagipa an'tang baksa gureo gakate nitogipa a'barangko nie rona ong'katbachina mong'aha. Ua-

mang ka'sine gakate barirang, chiakolrang, tang-sekgipa samrang me'rakkuni a'barang aro biteari-gipa bolrangan' gapgipa a'barangko battonge re'angon, Gautama namen an'sengnikbeaha aro kusi ong'beachim. Indiba ua saksa a'a wegipani janggilo pari gnanggipa matchuko moangengako aro saknaa amjae ga'aknasipilengoba uko re'atna go'olchi dokengako nikaha. Unikoa ua do'reng atoreni do'kru mangsako chike cha'engako nikaha. On'tisa chel'batkale re'angoa, do'kru mangsani adita tampirangko sue cha'engako nikaha. Iarangko nike uni gisiko dukan gape noktangchina re'angpilaha.

4. Iani adita salrangni ja'mano Gautama jumang mingsako nikaha. Ua bilgribegipa, re'na amjapilgipa aro chadengnan ambrepilgijagipa bu-depa mande saksako nikaha. Uara budepaenba inditan bilgri ong'rahachim. Ua una aganaha, 'Na'aba ia gitan budepagen aro bilgrigen.' Unikoa ua bilongbee sagipa mande saksako saknae tengtoengako nikaha, aro una inaha. 'Na'aba salsao saako man'gen aro ia gita saknaan gap-gen.' Unikoa ua jumangon manggrabakgimin aro suri chikgimin manggisiko a'ao ga'ake dongengako nikon, una intaiaha, 'Na'aba sina nanggen, Gautama.'

5. Salgipino Gautama, jean ua somoio bilsil

kolatchi ong'ahachim, uni pagipa, jikgipa aro degipako wate burungchina re'angaha, jeo ua maiba cholko ; jechi a'gilsako uni samtangtango nikenga dukko, papko aro saknaaniko bon'atna ba komiatna man'gen, chanchina joton ka'e bilsina kingking dongaha. Ja'manki'tiko katchaani-ona kakketgipa ramako man'aha ine ua chanchi-aha. Je bolni ja'pango donge ia torom gitalko man'aha, uko Bobol ine agana aro uko daoba manderang namen dal'nikbea.

6. Unon ua burung bolgrimoni mandeskani dongaona re'baaha aro gital toromko aganprakro-roebilsisotbribongana a'songgimikchi re'roroaha. Ua raja pante ong'angkuna sikjahani giminan'tangni bimung Gautamako gale Buddha ine bimungko ra'aha. Uni mangsongara gisik gnanggipa ba jean budhi ba gisik gnangani donggipa ong'achim. Uni toromko Buddhism ine minga. Bang'bea manderang uko jarikaha aro uni janggitangmiting salrangon hajalni hajal Hindurang Buddhistrang ong'baaha. Indiao Buddhism toroman bilsiritchadokmangna mongsongbatgipatorom ong'aha. Ua bilsisotchet ong'on Kusinagar minggipa biapo siaha.

7. Manderangni gisepo Buddhaan ka'sae dakbatgipa ong'achim. Ua manderangna, pilak janggitgnanggiparangna namna aro ka'sae dakgipa ong'na

uamang'ni dakna nanggni kam ong'a aro jakoba saknaata aro ka'sanenggija daknara pap ong'a ine skiaha. Pilak manderangan Isolni nikao jakgitel aro apsan ong'a. Mande rongtalgipa aro toromigipa ong'e janggi tangode, bebekosan aganode aro pap dakjaode sakgipinrang gitan apsan namgipa ong'a ine ua skiaha.

9. SISUNAG MA'CHONG

1. B.C. 600 na skang Indiani kattarangko sulsul tale u'ina man'jachim. Bilakbatgipa raja gipinrangko bamate adita chasongna dal'batsranggipa ong'oba badiaba gipin raja bilakbatskae amako man'e dingtang dingtang songnokrang ong'kate bang'bea rajarang dongachim. Ia chasongni a'bachengo Kosala a'songni Ikshaku ma'chongni raja Indiani salgroo uni songsul Kasi songnokko ame bilakgipa ong'engachim. Indiba ruutgijan Magadha a'songni SISUNAG ma'chongni raja uamang'ko ame Rajgriha minggipa biapo uamang'ni skotonggipa songjinmako dakaha.

2. Uamang'ni skanggipa raja Bimbisara Kristona skang bilsu ritchabongagipani a'bachengachipara sason ka'aha. Uni siani ja'mano uni depante Ajatasatru bang'bata a'songrangko ame uni songnokko apalen bariataha. Ua Patali minggipa

biapo bilakgipa killa ge'sako rikaha aro uonia mingsinggipa songjinma Patalipura, jeko da'o Patna ine minga, ong'baaha. Ia Bimbisara aro uni depante Ajatasatruni sason ka'miting sal-rangon Buddha an'tangni torom gitalko aganprak-engachim.

3. Bimbisarani sason ka'engmitingo Persiani raja Darius Indiani salgrochi napbaaha aro salgroni rajarangko ame Indus chibimani saliram rikamona kingking kajinako ra'aha. Brigipa ritcha bilsirangni bon'angachipara Sisunag ma'chongni bilrang bon'angaha aro Mahapadma Nanda minggipa singhasonko ra'sekaha. Uan Sisunag ma'chongni chon'kamgipa rajani jik Sudra me'chikni depante ong'achim.

10. ALEXANDER THE GREAT

1. Greece a'songni bilakgipa raja Alexander The Great salaramchi an'tangni a'songko bariatna apalen man'baaha. Persiani a'song gimikko aro Turkestan, jeko Bactria ineba minga, aro Afghanistanko ame B.C. 327 bilsio Indiaonaba sokbaaha. Uni re'bemitingo Punjabo saksa Kshatriya raja Porus minggipa sason ka'engachim. Porus bilake warachaksoaha; indiba amako man'aha. Porus rajako Alexanderni mikkangona rim.gitange ra'angaha. 'Nang'ko mai dakbo' ine Alexander

uo sing'aha. 'Angko Rajako gita dakbo' ine
 Porus aganchakaha. Ia aganchakanina Alexander
 namen kusi ong'beaha. Ua an'tangni ning'o donge
 songnoktangko sason ka'china una on'angaha.



Alexander the Great

Alexander salaramachi Magadhani songnokonan
 re'bana mangsongachim; indiba uni sipairang
 salaramchi chel'bate re'angkuna jechakaha, maina
 tuamang songtangko wate re'bara ruutbeahachim.

Uni gimin ua uonidipetan songtangona re'ang-pilaha.

2. Songtangona pil'angmitingo ua Persiani Susa songjinmaona sokon malaria saako ma'ne B.C. 323 bilsio siaha. Uni songnokko uni sipai ko.okmi dilgiparangni gisepo suale ra'aha. India, Bacaria aro Afghanistanko Seleukos Nikator minggipa man'rikaha. Indiba ua uko ruute rakina man'jaha. Magadhani raja Chandra Gupta uko ra'sekaha aro unbaksa dakgrikna amjawa ine nike songgigrikaniko dakaha. Chandra Gupta una mongma mang 300 ko on'aha aro uaba una Punjabko watangaha.

3. Uororo Indiaio donggipa manderang a'songtangni itihasko seanirang dongja. Indiba skia man'gipa adita Greekrang jerangan Alexander baksa Indiaona re'baaha, Indiaio uamang'ni nika aro knara pilakkon seaha. Indiab uamang'ni seanirangko gimaataha. Uamang'oni mitam bakrangko Greek segiparangni seskaanirang gnanng. Uaragoniko re'anggimin bilsio 200 mi salrango Hindu manderang maikai janggi tanga aro maikai dakbewalrang on'ga aditako u'ina ma'naha.

II. MURYA MA·CHONG (B.C. 321-297)

1. Alexanderni P u n j a b o dongmitingo Chandragupta minggipa Magadhani raja baksa bobil ong'e Punjabona katbaachim. Alexander siaha ine knaon ua Punjabo donge Greekrangni kosako chakatdilaha, aro uno an'tangna songnokko dakaha. Ua an'tangni bobil Magadhaona re·baaha aro chon·kamgipa Nanda raja baksa dakgrikaha. Uno donggipa saksa Brahman Montri Chanakya minggipa una dakchakaha aro B.C. 321 bilsimango Nanda rajako amsrange songnokko ra.srangaha. Uni ma·ako Mura ba Murya ine mingachim aro ua bimungonin Murya Ma·chongni raja ong·baaha.

2. Chanakya uni namgipa montri ong'e a·songko dal·ataha aro Chandragup tako bilakgipa raja ong.ataha. Indiani salgroo Greekni sason ka·gipa, Seleucus Indiao an'tangni man·gimin songnokko man pilna joton ka·beaha indiba amjaha. Chon·kamao ua Chandragupta baksa ku·monggrikaniko dakna nangaha. Ua Indiako kangjaha aro nangrimgrikaniko mesokna ua an'tangni demechik saksako Chandraguptana bia ka'e on·aha aro an'tangni mitam sipai kotokrangko uni ning'o kam ka·china watataha.

3. Greekni saksa dal.gipa baltigipa, Megasthenes minggipa sk'a man·gipa mande saksako

Chandraguptani kachariona watataha. Ua India bilsibonga dongangaha aro ua chasongni Indiani gimin gamchata u. iatanirangko see donangaha. Ua indake janapaha. Magadha bilakgipa songnok ong'a. Uni apala Punjaboni Bebarona ong'achim. Sason ka'anirang nambea aro manderang saksa sakgipino ka'donggrika aro kachario dakgrikani-rang bang'ja, Hindu manderang ramram mesoka aro dal'a dakanirang dongja. Ua chasongo bang'an churangko ringja, maniani salrangna agre ring-rongja. Nokrangko aro gamrangko dingtang-mancha dongtimna nangani dongja. Iarangan ua chasongni manderang gun gnganggipa aro kakket-gipa manderang ong'chongmota ine mesoka. India gimiko songnok 118 gngang. Bang'a songnokrang-on dal'dala songjinmarang dongaha ine agana. Sakgitchakgipa Indiani manderang gngang aro uamang'a chugipa ma'chongni manderang ong'a Gittimprakon pilak kamko ka'gipa aro pilak ma'-chongni manderang gngangchim. Gittimprakan chusokgipa song ong'a ine ua janapaha.

ASOKA

(B.C. 272-231)

4. Chandragupta bilsil kolgrikbrina Magadha sason ka'aha. Uni siani ja'mano uni depante Bindusara uni songnokko B.C. 297 bilsio man'rik-aha. Uni ja'mano Asoka B.C. 272 bilsio sing-

hasono gakataha. Uan Bindusarani gnigipa depantesa ong'achim; indiba montrirang uni skanggipa depante baksa nangrimjaesa Asokako raja ong'ataha. Ian Indiani dal'batsranggipa rajarangoni saksa ong'achim. Ua Magadhani songnokko Pataliputra songjinmao donge bilsa sotbrina sason ka'aha.

5. Dambemitingo ua dakgrikrakbegipa aro ka'o nangravgipa ong'achim ine agana. Ua an.tangni songnokko namen apalataha. Chon'kamao ua Kalinga jeko da'o Orissa ine minga, songnoko napaha aro bilsigittam dakgrikani ja'mano uko amsrangaha. Indiba ia dakgrikanio lakni lak manderangko so'otaniko nika uni gisiko namen saknaaha aro uan uni gisikko dingtangatsrangaha ine agana; maina untal dakgrikanirangko don-tongsrangaha.

6. Ua Buddhist toromni skianina gisik nangna apachengaha. Saksa ia toromko skigipa, Upagupta minggipa uko Budhism toromo napataha aro ua toromo bilavgipa dilgipa ong'baaha. Ua Piyadasi ine upadhiko ra'aha aro an'tangni songnokko Buddhist Songnok dakataha. Ua an'tangni songnokosan toromko gipataijaha; indiba uko gipatna gita Kashmir, Afghanistan, Kandahar, Tibet, Burmah, Deccan aro Ceylon, in a'songrangonaba torom skigiparangko watroroataha. Ua mingchibri

niamrangko, jeko ' edicts ' ine minga, ro'ongrango aro krongrango seate Indiani pilak biaprango songdoataha. Uaranga mongsongbate namgipa, ka'sagipa, kakketgipa aro rongtalgipa ong'china Buddhani skianirang ang'achim.

7. Ua an'tangni manderangna bang'a namgni-rangko dakangaha. Ua songregiparangna bang'a chiakolrangko ramasamrango cho'ataha, aro salak-kimtna gita bolrangko ge'ataha. Ua mande-rangko aro matburungrangko sanna gita sanram nokrang, chong'motan hospitalrangko rikataha. Jilanirangko ka'saninggija jakkalanirangko don-tongataha aro je manianirango matburingrangko so'ote boli on'rongachim uarangko champengaha. Ua bi'sarangko skiatanina bang'a skulrangko kuli-ataha. Ua an'tangni pilak manderangna ka'sagipa ong'achim aro an'tangni dedrangna gita pilakrii dukni kattarangko namen knachakrongachim.

8. Uni mingsa nambegipa dakatania Bilsibong-aprakni Tom'ani ong'achim. Ia tom'anio niamni, jatni dakbewalni ba maiba sasonni bidingo nang-begipa kamrangni gimin chanchigrike tik ka'aniko dakatachim. Uni sina skang ua dal'begipa song-nokko rikangaha. Uni songnok, salgro Indiaoni salgipengchi Deccanona kingking ong'achim. Ia dal'gipa raja B.C. 231 bilsio siaha.

12. INDO-GREEK RAJARANG

1. Asokani siani ja'mano Murya ma'chongni rajarang sak snimang sason ka'angkuaha. Indiba uamang'ni chasongo bilgriroroangaha aro songnokkoba gimaatroroangaha. Chon·kamao Bacteriao donggipa Greekrang uamang'ni songnokko ra'sek-srangaha. Alexanderni siani ja'mano Persia aro Bacteria jeko Turkestan minga, a songrangni kosako Greekrang bilsa ritchasamangna sason ka'achim.


2. Ia Greekrang Afganistan aro Punjabo B.C. 250 oni A.D. 130 mangona sason ka'aha. Uamang'ni raja Demetrios minggipa bilko man'chenggipa ong'aha. Ua salgroni India an'tangni songnokko Punjaboni Sindona kingking apalataha. Uni ja'mano mingsinggipa Menandar jeko Indiani manderang Melinda ine minga, Indus chibraram jol, Gujarat aro Rajputanaona kingking ambaaha aro Magadhani songnoknaba kenani ong'baahachim. Indiba Magadha Mitra aro Sunga ma'chongni songnokko man'chenggipa Pushyamitra uamang'ko bilake aro chusoke warachaksona man'aha.

13. MITRA, KANVA ARO ANDHRA MA·CHONGRANG

1. Murya ma·chongni chon kamgipa rajako uni sipai kotokni pamong, Pushyamitra minggipa so·ote uni singhasonko ra·sekaha aro gital ma·chongni raja ong·baaha. Ukon Sunga ma·chong ine minga. Ua Hindu toromko bilakatna joton ka·aha. Uandaken an·tangni bilko mesokna gitcam dakbewal Asvamedhako manidilaha. In ma·chongni rajarang saksakumang sason ka·angaha. Uamang·oni bon·kamgipa sason ka·gipa saksa Brahmin montrini jakchi so·otako man·aha. Uni bimung Vasudev ong·achim. In ma·chongni sason ka·ani 184 B.C. oni 73 B.C. ona ong·achim.

2. Vasudevni deritchurang Kanva ma·chongni bimungko ra·e 73 B.C. oni 27 B.C. ona Magadhao sason ka·aha. Ia Sunga aro Kanva ma·chongrangni sason ka·mitingon Magadhani songnokrang be·ro-roangaha aro chonchongipa songnokrang uoni ong·katangaha, Indakmiting somoion Indiani salgipeng jolo donggipa Andhrarang bilakbae uamang·ko amsrangaha aro songnokrangko gimaataha.

3. Indiani salgipengo ba Deccano donggipa manderang salgroo donggipa manderang gitan dintang dintang salrango dintang dintang ma·chongni rajarang dongaha aro bilakaha. Uamang



Asokani sason ka'mitingo Muryani songnokni ning'o ong'ahachim. Indiba Asokani siani ja'mano jakgitel ong'baaha aro dingtang dingtang songnokrangko dakaha. Uamang'o riting riting sak 30 mang rajarang bilsa 450 B.C. mang oni 220 A.D. ona sason ka'aha. Ia songnokrangoni mingsingbatgiparanga, Chera, Chola aro Pandya songnokrang ong'achim. Andhrarang Buddhism toromko ra'giparang ong'a. Uamang'oni mingsingipa raja Hala minggipa sea jotanirangko didiatbegipa ong'aha.

14. INDO-SCYTHIANRANG

1. Andhrarang bilakbaen, amkamna man'jaoba uamang'ni bil Afghanistan aro Punjabona sokbaachim. Iandake uamang'ni bil Deccan jolo bilakbe-mitingo Indiani salgroot Scythianrang sason ka'eng-achim. Asiani bijatchi jolo donggipa jatrangko Greekrang Scythians ine minga aro uamang'ni a'songko Scythia ine mingachim. Iamang'ni jat dol dol bang'a aro B.C. 100 aro A.D. 400 bilsirangni gisepo India napaha. Uamang Kashmir, Afghanistan, Punjab, Sind, Gujarat aro gipin saliramni a'songrango songdongaha. A'bachengo Greek songnokrangni sambarango chonchona songnokrangko dakchengaha; indiba ka'sine ka'sine a'songgimikkon amtokaha.

2. Ia jatrangoni dolsako Saka ine minga. Iamang skang sokbachenggipa dol ong'achim. Uamang Sind, Malwa aro saliramni a'songrangko ame Malwao Ujjain minggipa songko skotonggipa song dake bils i ritchabrimangna sason ka'aha. Indiba chon·kamao Magadhani raja Chandragupta Vikramaditya uamang'ko amaha.

3. Ia Indo Scythianrangni gisepo Kushan minggipa ma'chongni Kanishka mingsingako man·begipa raja ong'achim. Ia ma'chongni rajarang Salgro Indiako bils i 180 mangna, A.D. 45 oni A.D. 225 ona sason ka'aha. Uamang'ni skotonggipa song Purushapura, jeko da'o Peshawar minga uan ong'achim. Kanishka Turkestan aro Afghanistan baksa Punjab, Kashmir aro Sind a'songrangko sason ka'aha. Uni chasongo daka tangkarangko bang'en nikna man'engpiti. Ua Buddhist ong'a aro Kashmiro dal'gipa melaaniko dakataha. China aro Asiani bijatchi jolona Buddhism toromko aganprakgiparangko ua watataha.

4. Da'ororo India o bils i chanani sonko raki-kuenggipa Saka Era, jeko Sakabda ine ina. A.D. 78 bilsioni chana. Iako Kushan rajarangoni Kadphises I ong'jaoba Kanishka dakataha ine janapani gngang.

15. GUPTA SONGNOK

1. Andhrarangni bil be'ani aro Guptani song. nokni a'bachengani gisepgriko Indiana ong'a obos-tarangko tale mesokani dongja. Guptani songnok A.D. 300 oni A.D. 600 ona dongaha. Iani bidingoni mingsinggipa raja sak gni gngang.

2. Samudragupta ia ma'chongni bilakbegipa saksa raja ong'aha. Ua A.D. 326 oni A.D. 375 ona sason ka'aha. Ua bilakgipa sipaini dolko rime Indiani salgipengona ong'onangaha aro jechiba ua re'angbo pilakchin uko warachaksona amjachim. Ua a'songrangko ra'jaha; indiba ra'sekgimin gam-rangkosan ra'baaha. Indiba Ua Gangesni a'kawe gimikko an'tangni songnok dakaha. Ia raja bilak-gipa dakgrikrakgipasan ong'jaha; indiba poido sena namnikgipa; ring'ani, sikani moanirangko nam-nikbegipa ong'achim. Ua chasongni jakkala sonani tangkao uni bimangko vinako moengako daka gngang.

3. Samudraguptani siani ja'mano uni depante Chandragupta II uni singhasonko man'rikaha. Ia raja A.D. 375 oni A.D. 413 ona sason ka'aha. Ua Vikramaditya ine bimungko man'aha. Uni skotonggipa song Ujjain ong'achim. Ia rajani gimin bang'a golporangko seani gngang aro ming-singbegipa saksa Hindu raja ong'chongmotaha. Ua

Indiani salgroo je a'songrangko Sakarang sason ka'engachim uarangko ame an'tangni songnoko chapataha. Uni kachario mingsinggipa poido segipa, Kalidas aro gipin mingsinggipa, jerangko ripok rong sni ine mingsinga dongachim.

4. Ia rajani sason ka.mitingo China a'songni Fa Hian minggipa toromna songregipa Buddhistni rongtalgipa biaprangko nina re'baachim. Ua ruuta bilsirangna Indiaio dongaha. Uni seaoniko ua chasongni Indiani manderangni gimin adita u'ina man'aha. Ua Indiaio sason ka'ani nambea aro manderang kusi ong'e donga aro pilakan ong'nasi-pile Buddhismko mania ine janapa.

16. HUNAS (A.D. 450-528)

1. Bongagipa ritcha bilsini bon'angachilbara Guptani songnok bilgriroroangaha. Unochacha Asiani bijatchioni re'bagipa White Huns minggipa jatrang uamang'ko ameaha. Uamang Punjabko amchange ja'mano Jamuna chibimani a'kaweaona ong'onbaaha aro Toraman minggipa uamang'ni dilgipa Guptani songnokko ra'sekaha. Ua A.D. 500 bilsio Malwani Maharajah ine aganprakataha.

2. Uni ja'mano uni depante Mihirgola uni singhasonko man'rikaha, uaba pagipa gita dakgrik-rakgipa ong'achim. Ua bang'bea manderangko

so'otaha ; indiba A.D. 528 bilsio Magadhani raja Baladitya, Indiani bijatchi jolo sason ka'gipa Yosoddharman minggipa raja baksa dakgrike uko katataha. Ua Kashmirni rajao katnapaha ine janapa gnang.

17. HARSHAVARDHAN

1. Hunsrangko amani ja'mano Indiani salgroo bilakgipa rajarang dongjaha. Bang'bea chonchon-gipa rajarangsan dingtang dingtang biaprango sason ka'achim. Dokgipa ritche bilsirangni bon'achibara Thanewarni raja Prabhakarwardhan minggipa antangni songsul rajarangko ame bang'a bilko man'aha. Uni siani ja'mano uni depante Rajyavardhan raja ong'rikaha. Indiba ruutgijan Bengalni raja Sasanka minggipa chalaki dake uko so'otaha. Uni ja'mano uni jonggipa Harshavardhan A.D. 600 bilsio singhasono gakataha aro Siladitya ine bimungko ra'aha.

2. Ua uni skotonggipa songjinmako Thanewaroniko Kanaujona jitaha. Ua Indus aro Gangesni a'kawe gimikko amaha, indiba bilsio 30 mang nangaha. Uni songnok Kashmirni a'brirangtoni Assamona aro Nepaloni Narvadaona ong'achim. Ua Deccankoba ra'na joton ka'ahachim, indiba salgipengni bilakgipa Chalukya rajarang

uko champengaha. Ian Indiani salgroo dal gipa: Hindu rajarangni bon·kamgipa ong·aha.

3. Ua an·tangan skia mangipa ong·a aro skianirangni gimin gisik nangbegipa aro didibegipa ong·achim. Uni kachario mingsinggipa poido aro golporangko segipa, Banabhata minggipa mande dongachim. Asoka gita ia rajaba Buddhismko manigipa ong·achim aro ugitan kangal aro sagiparangko dakchakani nokrangko aro songregiparangna aldarangko bang·en rikataha. Ua an·tangan Buddhist ong·oba Hindu Brahminrangkoba mande ra·achim. Ua A.D. 650 bilsio siaha.

4. Harshavardhanni sason ka·mitingo Chinaoni saksa mingsinggipa toromna songregipa, Hiuen Tsang minggipa re·baaha aro uni seaoniko sason ka·anirangni gimin aro Indiani manderangni obostarangni gimin bang·en u·ina man·aha. Ua Indiani bang·a biaprangona re·ange niaha aro Harshavardhanni kachario ruuten dongaha. Ua India bilsi 15 mang dongaha. Ua Harshani gimin indake agana. Ua bilsibongaprako Jamuna aro Ganges chibimarangni bibrao dal·gipa melaaniko dakrongaha. Unona pilak rongtalgipa manderang, kangalrang aro madrang grigiparang bang·en re·angachim. Ua uamang·na dal·gipa alaniko dakrongachim. Buddhism toromni bidingo indakgipa melaaniko dakoba ua Hindurangnaba uno mande

ra'aniko mesokachim, aro on'anirangko on'on pilaknaba on.tejachim. Alani bon'ahaon ua an'tangan rajani pilak ganding chindingrangko aro gamchatgipa ripokrangko oke kangalrangna suale on'achim aro an'tangan sanyasini ganding chindingko ganskaachim.

5. Skia man'anirang namen apalachim aro mingsinggipa Nalanda Universityona chel'a biaprangonin skie ra'na re'baachim aro uano hajalchikungmang chatrorang dongachim. India torom minggni donga, indiba damsan nangrime donga ine agana. A'songko sason ka'ani nambea aro skia mangiparangko mande ra'bea.

18. MUHAMMAD ARABIANI KATCHI NIKGIPA (596 A.D.-632 A.D.)

1. Chasongni chasong Hindurangni India a'songgimiko gipmanahaon aro songjinmarangko rikmanahao gital ma'chongni manderang salgro saliramni a'songrangoni ia gam bang'gipa Hindustanni a'kaweona ong'onbaaha. Uamanga Muhammedanrang ong'achim. Muhammedanrang'a Muhammadni skia toromko ja'rikgiparang ong'a. Uamang bilsil 712 A.D. mangoni Indiaona re'bana

a'bachengaha. Skanggipa Muhammedanrang Arabrang ong'achim.

2. Arabia a'songo donggipa manderangko Arabrang ine minga. Uamang'ni a'songo chibimarang, chiringrang aro chibolrang dongjachim. Uamang an'chengarigipa a'kawerango uamang'ni gururangna, utrangna aro mes do'bok jakrangni samrangko am'roroebiapsaoni biapsaona uamang'na tamburangko ra'bite re'rorogipa manderang ong'achim. Skangni salrang uamang'ni gisepo bang'a namgija aro ka'saninggijani bewalrang gnan'gchim aro pangnan saksa sakgipinko dakgrikronga aro so'otgrikrongachim. Uamang'ni gisepo ra'seke aro dokprete ra'giparang bang'beachim. Uamang'ni gisepo bang'a miterangko olakiachim.

3. Bilsil 1,400 mang ong'nasiaha, Muhammad minggipa saksa Araboni pamong gnan'gchim. Ua 570 A.D. bilsimango Mecca minggipa songo atchi-aha. Ua uni jat Arabrangni namgija dakbewalrangna namen duk ong'beachim aro uamang'ko nambatatna joton ka'beaha. Isol saksasan donga aro Arab manderang an'tangtangskakao so'otania dal'begipa pap ong'a. Arabrangna aganprakchina Isol angko ge'etaha ine ua aganaha Pilak Arabrang ma.sanni jongada gita ang'na nanga. Miteko olakiania dal'bea gualani ong'a ine ua aganprakaha.

4. A'bachengode ia mikmalgijagipa Arabska-rang uni skiako knachakjachim aro uamang'oni mitam bobil dake uko so'otna joton ka'aha; indiba ja'mano ka'sine ka'sine uni agananirangko knatimaha aro bebe ra'e uamang'na jekai agana indaken dakna a'bachengaha. Uamang'ni mite-rangko pe'e galaha. Indiba mitam namnikjaha aro bobil dakangkuaha. Uni gimin bilsio 622 A.D. mango ua Mecca songoni Medina minggipa song-ona katangaha. Ia bilsikon Hijra ba bilsio chanan; son gita ra'aha. Ua dondikgija skiangkuaha aro uni sina skangan pilak Arabrangan uko ja'rikaha. Ua 632 A.D. bilsio siaha. Uni bimung Muham-mad ong'ani gimin uni skiako ja'rikgiparangko Muhammedanrang ine minga aro uan uamang'ni katchinikgipa ong'a ine bebe ra'chongmotaha.

5. Iani ja'mano Arabrang saksa sakgipinrang baksa dakgrikna man'jaha, maina pilak Arab manderang jongada gita ong'na nangahachim. Indioba uamang'ni gisik skang gitan dakgrikna namnikani aro sikanirang dongkuengachim. Uamang'ni miterangko olakiani uamang'na **gualani** ong'ode gipin manderangni indake olakianiba **gualani** ong'a ine uamang chanchina a'bachengaha. Uni gimin gipin jatrangko **dakgrikna** aro uamang'ni mite dakanirangko gimaate pilakkon uamang gita Muhammedanrang ong'attokna nanga

ine uamang chanchiaha. Uandake uamang gipin a'songo donggipa aro miteko olakigiparangko dakgrikaha aro uamang'ko amaha. Jerangan uamang'na bamachim aro apsan toromko manipa-na ku'rachakaha uamang'ko mamungba duk on'-jaha aro uamang'ni jongadarang ine chanaha. Uamang iandake toromna dakgrike siode Isol uamang'ko namnikgen aro salgiona rimanggan ine bebe ra'achim.

6. Ruutgijan Arabrang salgrochi donggipa pilak a'songrangko amtokaha. Uamang'ni jako ga'aka ra'sekgimin gamchatgipa gamrangan uamang'ko gipin gipin a'songrangko ra'sekrorona sikataha aro mikbokataha. Uandake uamang a'songsaoni a'songsaona re'roroangaha aro songsani ja'mano songsa dake Persia, Asia Minor, Turkestan aro Afghanistanni a'songrangko ra'aha. Ia salona kingking in a'songrang pilakan Muhammedan a'songrang ong'aha.

HINDU PERIOD

Somoigita Sul Sul Ong'anirang

(Line of Time)

1. Itihasna Skang Chason- grang	B.C. 2000 na skang
2. Veda-s-ni Chasong	„ 2000-1500
3. Gitcham Epic-ni Chasong	„ 1500-1000
4. Gitcham Hindurangni Chasong	„ 1000-200
5. Buddha	„ 567-487
6. Alexanderni Napani	„ 327
7. Chandragupta Murya	„ 321-297
8. Asoka	„ 272-232
9. <i>Indo-Greek Rajarang</i>	„ 250-100 A.D.
10. <i>Indo-Scythian Rajarang</i>	„ 150-400 A.D.
11. Sakas	A.D. 1-400
12. Kushan Rajarang	„ 45-225
13. Gupta Songnok	„ 300-600
14. Samudragupta	„ 326-375
15. Chandragupta Vikramaditya	„ 375-413
16. Hunsrang	„ 450-528
17. Gital Hinduni Chasongrang	„ 600-1200
18. Harshavardhan	„ 606-648
19. Muhammad Arabiani Katchinikgipa	„ 570-632

Bak II. MUHAMMEDANRANGNI CHASONG

19. MUSSALMANRANGNI INDIAO NAPCHENGANI

1. Muhamadni siani ja'mano uamang'ko dilania Khaliphani jako ong'aha. Ua a'bachengo Damascus songjinmao sason ka'chenge, ja'mano Bagdadona uni dongramkmo jitangaha. Ia Muhammedan manderang, Indiara namen gam gnanbegipa a'song ong'a ine knarongachim aro Hindustan a'kawena namen mikbokani gnangchim. India aro Europeni gisepgriko uamang'ni dongram ong'e Indiani gamrangko Europeana ra'anganirangkoba nikrong'aha.

2. 711 A.D. bilsio Ceylon chichangni raja Persiani Mussalman Governor Hajjajona adita boksisrangko jahat ge'sao watatachim. Ua jahatoniko Sindni sagal rikamo sagalo ra'seke ra'giparang ra'sekaha. Ia a'selni gimin Sindni raja Dahir dai ong'a ine Hajjaj rim'aha. Sagalo ra'sekgiparangni kosako anga bil man'ja ine Dahir aganchakachim. Indiba Hajjaj ia aganchakaniko ra'chakjaha, aro Damascusni Khaliphani watako man'e Sind a'songona sipairangko watataha; indiba dakgrikanio ama man'aha aro changgnigipa watat-taioba amatako man'achim. Unon Hajjaj ka'onangbee an'tangni chawari Muhammed Bin Kasimko

dal'gipa sipai kotok baksa watattaiaha. Ia dakgrikanio Dahir ama man'e so'otako man'aha. Skotonggipa song Alorko aro uni ja'mano Multanko ra'e bilsigittamni gisepon Dahirni songnokgimikko ra'srangaha, Iani ja'mano bilsu ritchagittammangna Mussalmanrangni ning'o dongaha.

3. Dahirni skotonggipa song Alorko ra'mano Bin Kasim Khaliphna adita boksirangko watataha; uarangni gisepo Dahirni demechik sakgni gnangchim. Dal'batgipademechik an'tangni pagipani song nokko ra'seke uko so'otanina namen gisiktango ka'onange a'jak sokani cholko am'engachim. *Khaliph ia me'chikrangko an'tangni harem ba jikdrangko donani nokona rimangaha.* Uni nitoani Khaliphko muni nangataha aro una mikchabeaha. Indiba ua me'chik una aganaha, 'Anga nang'ni jikgipa ong'na krajaha, maina Bin Kasim angko nang'ona watatna skangan angni kratchagniko ua dakmanaha.' Iako knae Khaliph namen ka'onangbee rang'san Muhammad Bin Kasimni skoko sote ra'bachina hukumko on'ataha. Watata sipairang uko so'ote uni skoko dokrao chipe Khaliphna ra'baaha aro Khaliph uko ua me'chikna onatskaha. Indiba uan kakket ongjachim aro uko ajak soknasa iako dakaha ine ua me'chik ja'mano ku'rachakaha. Khaliph ka'onangbee ukoba so'otchina ge'etaha.

4. Salgipengchi Deccan jolo A.D. 973 bilsil intal Chalukyas minggipa ma'chong bilakna a'bachengaha. Rashtrakutas ma'chongko ame uamang dal'gipa salgipengni songnokko dakna a'bachengaha. Ritchachi'sa bilsini bijatchimango Kalyanko uamang'ni skotonggipa song dakaha. Uamang'oni Pulakesi II Harshani salgipengchiko amanganiko champengsoachim, ine an'ching nikmanaha. Bilsil ritchasamangni ja'mano Chalukyarangni bil komi-angaha. Uamang'ni ning'o donggipa mitam rajarang chakate jakgitel ong'na joton ka'aha aro chon'kamao Devagirini Yadava ma'chong uamang'ko ame songnokko ra'seksrangaha.

5. Indiani salgroo Harshavardhanni songnokni be'mano, bang'bea dingtang dingtang songnokrang ong'kataha. India gimikon ia rajarang saksa saggipin baksa dakgrik dinggrikari salko re'atachim aro gipin a songoni napbagipa bobilrangko damsan warachaksona gita ku'monggrikani dongjasrangchim. Ian Hinduni songnokrangni bilgriani mongsonggipa a'sel ong'aha. Iani a'selsa gipin a'songni manderang napdrabae songnokrangko dakena man'aha ine nikna man'a.

6. Iandake Indiani rasonggri ong'miting sal-rango, Transoxiana a'songgri Samani songnokoni Hiratni governor Alptigin minggipa Afghanistanni Ghaznio 962 A.D. bilsio an'tangna songnokko

dakaha. Indiba ua ruute sason ka'jaha. Ua 977 bilsio siaha aro uni nokkol saksa Sabuktigin minggipa uni songnokko man'rikaha. Ua Kandaharko ame bilakbana a'bachengaha. Ua Indiani salgroo donggipa adita killarangko ra'sekaha.

7. Ia salrango Punjabo sason kaenggipa Raja Jaypal, Muhammedanrangni an'tangni songnokona napbae mitam killarangko ra'ahani gimin dal'gipa sipai kotokkorime Ghazniko gaskana re'chakatangaha. Indiba ramadilo namen suuri onbeachim aro suurini balwa rakdapako amchakjae Sabuktiginna bang'a tangkarangko on'na ku'rachake tom'tom grikaniko dakna draatako man'aha aro songtangona pil'pafilna nangaha. Songtangona sokon, Jaypal an'tangni ku'rachaka tangkarangko on'na jechakaha. Uni gimin Sabuktigin Punjabona chabaaha aro dakgrikanio Jaypalko ame uni songnokko ra'srangaha.

8. A.D. 997 bilsio Sabuktiginni siani ja'mano uni gnigipa depante Ismael minggipa singhasonko ra'aha; indiba bilsignini ja'mano uni adatang Sabuktiginni dejakra, Mahmud singhasonko ra.seke an'tangan Ghaznio raja ong'aha aro Sulta ine bimungko ra'aha. Ia a'songo donggipa mande'rangkon Afghanrang ine minga aro uamang'a pilakan Muhammedanrang ong'a.

20. GHAZNINI MAHMUD
(A.D. 997-1030)

1. Ua salrango Indiara a'gilsako man'e cha'bat-sranggipa a'songrangoni damsa ong'achim. Hindu-rang dal'dalgipa songjinmarangko aro sona aro tangkaan gapgipa gamchatgipa mite nokrangko rikaha. Ia songjinmarangni gisepo gitchambatgipa aro rongtalbatsranggipa songjinmara Kasi ba Benares ong'achim. Ia salrango Indiara Europe aro gipin saliramni a'songrang baksa badinggrikanirang dongmanaha. Indiba gisepgriko Mussalmanrangni songnokrang gnanngchim. Indiaoniko gamchatgipa bosturangko utrango gate Afghanistani batsotram ramrang gita gipin saliramni a'songrangona ra'angskarongachim.

2. Mahumudni bi'samitingo ua pil'nipil ia badinggiparangni riting riting utrangni janggilo India-nigamchatgipa bosturangko gate uamang'ni songko nape re'angarangko nikrongachim. Ua badinggiparang baksa basakoba basakoba agangrike rorongaha aro dal'dalgipa songjinmarangni gimin aro uno gamchatgipa bosturang bang'ani gimin aro sonaan gapgipa mite nokrangni gimin bang'en knaaha. Ua jensalo dal'aha aro raja ong'gen Indiani Hindu rajarang baksa dakgrike uamang'ni mite-rangko dokpegen, mite nokrangko pe'enba sona, tangka aro pilak gamchatgipa bosturangko ra'e

songtangona re'bapilgen ine ua chanchisoaha, aro ua indaken dakaba dakbebeaha.

3. Mahmud bilsio kolatchi ong'o raja ong'aha aro uni mangsonga gita dakna tarisoaha. Ua mikkarang tipkujana kingking aro suurirang Jrongangtokkujana kingking sengaha. Unikoa ua an'tangan sipai kotokrangko rime, 1001 A.D. bilsio Indiaona re'baaha. Ua an'tang baksa bang'bea utrangko aro gurerangko an'tangni ra'sekgimin gamrangko gate ra'na gita mobachapaha. Indiani Rajputrang uamang'ni bobilrangko ka'dongbeen warachaksoaha; indiba Afghanranga uamang'na bate namen dal'dalbata aro bilakbata aro namnam-bata gurerang dongani gimin amchakjaha. Hindu-rangko katataha aro bang'an so'otako man'aha.

4. Indiani salgroni a'sal gnannggipa a'kawerangko jokpakgipa Ganges aro Jamuna chibimarangni rikamo donggipa songjinmarango, sonachi nokking rapgipa aro sonani krongrango rikgipa aro sonachi wa'se angipa mite nokrang gnanngchim. Mite-rangko gamchatgipa ripok do'katchini mikronrang gnanng rongtalgipa sonaniko dakachim. Uarang'ko hirani, muktani aro gamchatgipa ro'ongrangni ripokrangko ganatachim.

5. Mahmud aro uni kengnigipa aro mikmalgi-jagipa Afghan sipairang ia gamchatgipa gamrangko uamang'ni mikkango nikon namen kusi ong'beaha-

Mahmud nokningrangchi an'tangan napange mite-rangko dokpeaha aro sona, mukta aro gamchatgipa ripokrangko ra'aha. Sipairang songjinmao nape nokantionikon sakprakprakan jeko an'tang nam-nika ukon ra'aha ; jerangan uamang'ni gamrangko on'na jechakaha uamang'ko so'otaha. Songjinma damsas mangmangonikon ra'sekgimin gamko mongma mang ritchagittam sotbonga aro hajalni hajal utrang gate ra'angachim. Ua songjinma damsas mangmangonikon mande sak 50,000 Hindurangko rim'gitange Ghazniona ra'ange sorokrangko sakprakko gonggnigni dake nokkolna palachim. Uamang'oni mitamrang Muhammedan toromo ra'paha.

6. Jensalo Mahmud songtangona sokpilaha Ghazni songjinmao dal'begipa alaniko dakaha aro pilak Afghanrangko uona re'bachina okamaha. Sona, tangka, resomni ba'ra aro gamchatgipa bosturangko jerangko ua Indiaoniko ra'seke ra'angahachim, manderang nichina gita dal'begipa mejo badale donaha. Ua pilak re'bagiparangnan boksirangko on'aha. Kangalbatsranggipa Afghannamangba ua bal'bea boksisko on'aha ine agana.

7. Indake Mahmud Indiaona uni Afghan sipairangko changchisnina kingking dilbaaha aro changprakon ka'dongrorobate chel batroroe re'bahachim. Chon'kamao, ua salgipengchi chel'beao donggipa Gujarat a'songonaba 1024 ba 1025 mango

re·baaha. Iano, gam bang·beanina India gimikon mingsinggipa gitchambegipa mite nok dongachim. Ua mite noko put chi·bonga chugipa Soma Nath ba Jajongni mite minggipa dal·begipa mite gngangchim. Ua Inditan chel·ao dongani gimin mamung a·sel nangani dongjawa ine chanchiachim. Indiba dal·begipa a·gisi gita mail 350 ramako ruutbee aro neng·bee re·angmano, ia Afghanrang ua mite nokona sokangaha, aro chel·a biaprangoni ia mitena warachakna rebagipa Rajputrangko katataha.

8. Mahmud an·tangan mite nokona napangaha. Danang, kenbee be·en moenggipa kamalrang ua miteko dokpejachina aro uko watode una bang·bea tangkarangko on·gen ine ku·chake uko mol·mol·beahachim. Indiba ua kengnigipa ku·rangchi, ‘Anga miterangko palgipa ong·ja, indiba miteko pe·gipa Mahmudsa’ ine agane uni silgrakni mong·gotchi ua dal·begipa miteko bilake dokpruaha aro ua be·kningaha.

9. Mahmud dakgrikaniko aro ra·sekaniko nam·nikgipa ong·oba skianirangni giminba gisik nanggipa ong·achim. Uni kachario Persiani poido serakgipa Firdausi minggipa gngangchim. Mahmud una dal·a boksisko on·na ku·rachake uko Shah Nama minggipa poidoko seataha; indiba ua uni ku·rachakako chu·sokatjahani gimin duk man·e uni

Kacharioni kataha. Uni ja·mano ua Mahmudni gimin chonnikani poidoko seaha. Ia rajako gisik mangataha, aro uni ku·rachaka boksisko una on·atachim; indiba ua uko man·srapgijan siaha. Boksisko ra·bagiparang cholgugachiko napbaengmitingon tiktak uni manggisiko cholguga samgipinchiko ra·ongkatangahachim.

Sakgipin skia man·gipa Persiani mandeba uni Kachario dongachim, uni bimung Abu Rihan Al Beruni. Ua Mahmud baksa Indiaona re·baaha aro India bilsi chi·gittam donge Sanskritko poraiaha. Ua Indiani toromni gimin bang·en rongtale seaha.

21. SONGNOKNA DAKGRIKANIRANG

1. Ghaznini Mahmud A.D. 1030 bilsio siaha. Uni siani ja·mano Punjab, Muhammedan rajarangni ning·o ong·angkuoba India gimikko nigopode bilsi 150 mangna gipin a·songni mande·rangni napbae ra·sekanirang donggija tom·tomani gnangchim. Ia tom·tomani bilsirango India maikai dongachim uko agantokna amja; indiba ia salrangko name jakkaljaha aro rajarang an·tangtangni gisepo dakgrik dinggrikanian gape namen bilding bildang ong·ahachim.

2. Kashmiro Utpala ma·chong Lohara ma·chong baksa dakgrike amako man·aha. Gujarato

Chauhanrangni songnokko Indiani salgipengoni Chalukyarang ra'sekaha aro uamang'ba pangnan Malwani Paramara rajarang baksa dakgrikrongaha. Chon'kamao Paramarani raja Bhoja minggipa Chalukyani rajarangko ame bil man'gipa ong'ba-achim. Bengalo gital Sen ma'chongni rajarangko pil'nipil amaha. Iandake ong'mitingo Rashtrakuta ba Rathorni raja Joychandra A.D. 1170 bilsio singhasono gakataha. Ua an'tangko salgro India bilakbatgipa ong'a ine chanchiachim aro pagit' chamrangni dakbewal gita gipin rajarangni kosako dal'batgipa ong'aniko mesokna Rajsuya Bewalko dakatna sikaha.

3. Ua songsulni pilak rajaranko okamaha. Apsan tom'anion ua an'tangni demechikni Shayambar chong'motan skatang segipako seoke ra'aniko dakatna mangsongaha. Ia somoio gipin Chauhan ma'chongni Rajput raja Prithviraj minggipa Delhi aro Ajmereni kosako sason ka'engachim. Uan bilakgipa saksa raja ong'achim. Songsulni pilak rajarang Joychandrani okamaniona re'bae bewal gita bamaniko mesokna maiba dangdike on'aniko dakaha ; indiba Prithviraj re'bajachim. Uko chon-nikaniko mesokna sike Joychandra Prithvirajni bimangko dakate an'tangni nokni do'gacholo do'ga dongtimgipa gita dake songe donaha. Iako knae Prithviraj namen ka'onangbeaha. Ua an'tangni

seokgimin sipairangko rimbite Joychandra rajani nokni sepango, maiba, cholko am'e dongnue dongeaha.

Joychandrani demechik, Sanyukta uni pagipani indake daka kamko namnikjachim; maina uaba bilakgipa raja saksa ong'a aro mikkangpara dakgriksrangosa mandena kraani ong'a ine chanchiachim. Jensalo Sanyukuta uni segipako seokani ong'aha, ua bibalni ripokko joljol ra'ange do'gachalo Prithvirajni bimangko dake dongipao rang'san pateaha. Prithviraj dongnuaoni rang'san ong'ate ua mechikko de'tome an'tangni gureo gate rang'san a'songtangona katangaha. Joychandra ka'onangan gape mai cholchi a'jak sokgen chanchibeengachim.

4. Indake salgroni Indiao dakgrikanirang ong'engmitingo Afghanistano bil gnanggipa gital raja sason ka'engachim. Ia ma'chongni mande-rangko Ghoris ine minga. Uamang Ghaznini Mahmudni deritchurangni songnokko ra'seke Afghanistanni nokgipa ong'baaha. Ia rajani jong-gipa Sahabuddin bilakgipa dakgrikdiligipa ong'a-chim. Ua Punjabko ra'aha aro Indiakoba ra'na mangsongaha. Prithviraj Indiana kengniko nik-soaha aro sepango donggipa bang'a rajarangko ku'monge warachaksona tariaha. Joychandrani agre pilak rajarang nangrimaha. Bils 1191 A.D

o, Talwarao skanggipa dakgrikani ong'aha. Shahabuddin ama man'aha aro uni sipairang bilding bildang ong'aha. Ua an'tangan bilonge matakoman'aha aro gureoni ga'ake nom'bokengmitingo uni kakketgipa nokkol Khalji minggipa uko gureogate joka biapona ra'angaha. Shahabuddin an'tangni dongspa sipairangko chimonge Ghoriona re'angpilaha.

5. Ia cheanio Hindurang manen kusi ong'beaha aro ruutana mamungba simsaksojaha. Bilsisani ja'mano Shahabuddin an'tangni bilaggipa sipai kotokko rime re'bataiaha. Prithviraj, re'anggimin bilsio ama man'aniko gisik ra'e re'angpilchina una chitiko seataha. Indiba Shahabuddin, 'Angade angni adatangni watata mandesa uo sing'atchengkugen' ine ua somoiko bi'on una indake dakna on'aha. Aganchakanina sengsoengmitingo Hindurang *mamungkoba tarisojaengachim*. Uko mike Mussalmanrang rang'san chadrapaha. Hindurang chimonggitike bilongbee warachakahaoba amako man'aha. Prithviraj rim'gitangako man'e so-otakoman'aha. Unon Delhini songnok Mussalmanrangni jako ga'akaha aro Muhammad Ghoriraja ong'chengaha. Gipin bilsio A.D. 1193 mango Joychandrani songnokkoba ra'aha aro uaba so'ota man'aha. Bilsichikungmangni ja'manon

Shahabuddin Indiani salgrojolgimikkon amsrang-
aha aro Ghori ma'chongni songnok dakaha.

22. TURKI ARO AFGHAN RAJARANG

1. Bang'bea Afghan aro Turki rajarangni gisepe,
Indiaona re'bae gamrangko ra'seke manderangko
so'ote songtangona pil'angachim. Uamang'oni
Mahmudara skanggipasan ongaia. Bilsa ritcha-
bongamangna kingking indake dakgiparangsang
ong'achim. Indiba ja'mano jerangan Indira mai-
rongpile nama, ding'a aro altuae janggi tanganiko
man'na ama ine nikaha, Indiaona songdongkam'na
a'bachengaha. Uandake aditani ja'mano Turki
rajarang Delhio sason ka'kamaha aro wilwila
asongrango an'tangna songnokko dakaha.

2. Ia bangbanggipa Gangesni a'kaweo donggipa
Rajput pamongrang ba duramongrang, dal'dalgipa
aro jrimgipa gurerango gakatgipa Turkrangko
dakgrikchakna amja ine nika, ua a'songoni pilak
biaponin an'tangtangni jik dedrang, matchu
matte aro gamrangko ra'e ritchani ritcha mail
chel'gipa salgipengchini a'songrangona katangaha.
Uamang Aravali a'brirangni salaram saliram aro
Vindhya a'brirangni salgrochi chugipa biaprangona
re'angaha. Ia biaprango Rajputrang Turkrangko
warachakna amachim. Uamang a'songgimiko
killarangko rikaha aro uno songdongkamaha. Ua

sal intal ua biapko Rajputana ba Rajputrangni a'song ine mingaha.

3. Delhio sason ka'gipa Turki aro Afghan rajarang gimik sak kolgriksku gnang aro uamang-
oni bang'bean ka'saninggijagiparang ong'achim. Mitamrang mitamna bate namen ka'saningjabata-
chim aro Hindurang uamang'ni gamrangko on-
jaode uamang'ko so'otna kraa ine chanchiachim. Iamang'oni skanggipa dolko *Nokkol Rajarang*
minga; maina uamang'oni bang'batan janggitangani a'bachengao nokkolrang ong'ahachim. Uamang'ni
kakket ong'anirangchi nokgiparangni namnikani-
ko man'e dal'roroaha aro chon'kamao nokni
mande ong'e raja ong'aha. Ia ma'chongni skang-
gipa raja *Qutubud-din* ong'achim. Ua bi'samitingo
Ghorni rajani jonggipa Shahabuddinni nokkol
saksa ong'achin. Ua dal'roroen 1206 bilsio
Delhini singhasono gakataha. Ua rikanirangko
namnikbegipa ong'achim. Ua Delhini sepango,
25 mite nokrangko pe'e uarangchi put 250
chugipa dal'gipa krongko songdoaha. Uan a'gilsako
chubatsranggipa krongrangoni ge'sa ong'a. Da'o
uko rikani bilsio 700 batangahaoba dongengpiti.
Ukon *Qutub minar* ba Qutubni krong ine minga.
Qutubuddin bilsibrisan sason ka'angaha. Unu
ma'chongni rajarang gimik sakchet aro rani saksa
Delhio sason ka'aha. Uamang'ni gisepo *Altamsh*

mingsinggipa saksa ong'achim. A'bachengo uaba nokkolsa ong'achim; indiba rajani namnikaniko man'e dal'oroaha aro chon'kamao Qutubuddinni chawari ong'e uni simano singhasonko man'rikaha. Ua bang'a a'songrangko dakgrike ame an'tangni songnokko bariataha. Uni sason ka'miting salrango Mogulrang Indiaona napbachengachim; indiba Altamsh chu'onge warachaksona man'aha. Altamshni siani ja'mano uni depante *Ruknuddin* singhasonko man'rikachim, indiba ua ruuta bilsina sason ka'jaha. Uni abitang *Reziya*-na ua biap on'aha. Ia rani gisik gnanggipa, changgipa aro ka'donggipa ong'achim. Ua sasonni niamrangko nambatataha aro kakket ong'e sason ka'achim. Indiba uni nokkol saksa Yakut minggipana ding-tangmancha namnikaniko mesokania uni kachario dal'gipa kam ka'giparangna namnikgijaniko ong'katataha. Uamang'ni gisepo Altunia minggipa chakatdile chon'kamao an'tangan uko bia ka'aha. Indiba ruutgijan rani ra'seke ragiparangni jakchi so'otako man'aha.

4. Rani Reziyani ja'mano uni jonggipa Bahram dikdiksana aro uni ja'mano uni adatangni depante Masaud raja ongrikachim, indiba uamang chang-giparang ong'achim. Ia ma'chongni gipin mingsinggipa raja *Nasiruddin* ong'achim. Uan toromibegipa ong'a ine agana. Ua nokkolrangko rakija;

uni jikgipaan una song'e chane on'achim. *Raja* gamni nokgipa ong'ja, indiba jinmani gamko don-timgipasa ine ua chanchiachim. Ua an'tangan Qoranko seskaesa pale cha'achim ine agana. Uni siani ja'mano uni sipairangni pamong *Ghiasuddin Balban* raja ong'rikaha. Uni ja'mano uni gnigipa



Alauddin

depante Bugra Khanni depante *Kaikobad* singhasonko man'rikachim ; indiba uan ka'saninggijagipa ong'achim aro uni montringoni saksa uko so'ote uni singhasonko ra'sekaha. Uni bimung *Jalaluddin Khilji*. Iano Nokkol rajarangni bon'ani ong'aha aro *Khilji* ma'chong sason ka'na a'bachengaha.

Jalaluddin uni gritang Alauddinchi so'otako man'aha, aro singhasonko ra'sekaha.

5. Ia ma'chongni saksa ka'saningjabegipa raja *Alauddin* ong'achim. Ua Hindurangko matchok rangko gita sikar ka'achim. Ua uni sipairangko a'songko apale changdulate me'asa, me'chik aro bi'sarangkoba jatchiona rikomachim aro uamang katna joton ka'ode uamang'ko so'otachim. Ua adita a'songrangko ra'seke an'tangni songnokko apalataha. 1297 bilsio Gujaratko ra'aha aro uni ja'mano 1303 bilsio mingsinggipa Chitor songjinmako ra'aha. Uni Chitor Songjinmako ra'aniko golpo gita aganani gnang. Ua chalaki dake Chitorni nitobegipa rani Padminiko an'tangna man'na sike uni segipa Bhimsing Rana Ratan Simhako antangona okamaha aro patoko chipaha. Rani Padmini kakketgipa aro gisik gnanggipa ong'achim aro uni changanichi uni segipako jokataha. Indiba dakgrikanio amako aro so'otako man'aha. Indiba Padmini an'tangko on'jaha. Uni segipa so'otako man'aha ine u'iarion dal'begipa ganchiko dake bang'a Rajput me'chikrang baksa ching'chaenggipa wa'alo bilprue sipaha. Alauddin an'tangni mangsongako man'jaha; indiba Chitor songjinmako ra'aha.

6. Alauddin uni sipairangni pamong Malik Kafur baksa salgipengchi re'ange Deccanni song-

rangko ra'aha aro uno Governorrangko donaha. Malik Kafur Gujaratoniko rim'gitanga man'gipa saksa Hindu ong'achim. Ua Mussalman ong'aha aro rajani namnikaniko man'e dal'roroaha aro sipai kotokni dal'batgipa pamong ong'baaha. Alauddinni sason ka'mitingo Mogulrang nabataiahachim, indiba uamang'ni napaniko champengsona man'aha. Khilji ma'chongni rajarang gimik bilsio 33 mang sason ka'aha. Uamang'oni chon'kamgipa Khasru ming-gipako saksa Tughlak ma'chongni Ghaji Beg ming-gipa so'ote A.D. 1320 bilsio *Ghiyasuddin Tughlak* ine bimungko ra'e Delhio raja ong'aha.

7. Ghiyasuddin Tughlak bilsibrisan sason ka'aha. Uni siani ja'mano uni depante Juna Khan, *Muhammad Tughlak* ine bimungko ra'e 1325 bilsio singhasono gakataha. Ua skia man'begipa ong'a; indiba ka'onangrakgipa aro skatang dakna namnik-gipa ong'achim aro bang'a amgijanirangko dakdrae nianichi an'tangni bilko bon'atachim. Ua bang-bea sipairangko gimaataha aro bang'a gamrangko rusiaha. Ua pagla raja ine bimungko man'pilaha. Uni sason ka'ani gnigipa bilsio Mogulrang re-bataiahachim, indiba uamang'na bang-bea tangkarangko on'e a'songko dikdiksana rakina man'aha. Ua 1361 A.D. bilsio siaha aro uni ja'mano uni abitangni depante *Firoz Tughlak* raja ong'rikaha. Turki aro Afghan rajarangni gisepo ia saksa

namgipa raja ong'aha. Ua Indiao atchigipa ong'e ukon songtang gita nikaha aro gipinoni re'bagipa uni pagitchamrang gita Indiao donggipa mande-rangna ka'sagija dakjaha. Ua kakket dake sason ka'na joton ka'aha. Ua raiotrangna bang'a namgnirangko dakaha. Uarang'oni mingsa dong-kamgipa kam Jamuna Canal ba dongge ong'achim. Uni ro'a mail 200 ong'a aro da'ona kinging dongengpiti. Ua bilsio sotsku ong'o 1388 bilsio siaha. Uni siani ja'mano uni deritchu su'ritchrang adita chasongna sason ka'anguaha, indiba name dakjaha. Chon'kamgipa Mahmud Tughlak rajani songnok Delhi aro unit wilwilao donggipa district-rangsan ong'aiaha.

23. TIMUR JA·KORA

1. Tughlak ma'chongni chon'kamgipa rajani salrango ka'saningjabatgipa aro mikmaljabatgipa manderangni kotok Turkestan a'songoni, uamang'-ni pamong *Timur* minggipa baksa Indiaona ong'onbaaha. Uko ja'kora ong'ani gimin Tamar Lame ba Timur Ja'kora ine mingachim. Uni jaksirang ro'roa aro dal'dalachim aro ja'arang ro'roachim. Uni mikronrang ching'a aro nikprotsusu nikpila-chim. Ua changrogipa aro an'gitchakgipa mande ong'a. Ua ka'ting aro uni ka'tong ro'ong gita

rakgipa ong'achim. Ua chasongo ugita mandeskako so'otgipa a'gilsako darangba dongkuja ine agana.

2. Ua 1398 bilsio bang'begipa Tartar, Turks aro Persianrangni kotokko rime, balwa mikka tarakgipa gita Indiaona napbaaha. Uni re'anga ramajoljol songjinmarangko gitimrangko so'aha aro gamrangko ra'sekaha. Ua inditan bang'e



Timur Ja'kora

manderangko rim'gitangaha, uni sipairang uamangko nitimna amchakjapilahachim ; uni gimin uamang'oni bilsil 15 batgipa pilakkon so'ote galaha aro uan sak 100,000 ong'pilaha. Delhiona sokna skang manderang namen kenbeaha. Uno donggipa

Tughlak raja skangde songjinmani guare ning'o chipchange dongachim ; indiba goka gita ong'-kataha aro dakgrikaha. Uko neng'gijan amaha aro Delhi songjinmao nape ka'namgijagipa sipairang skatang salbongana kingking re'roroe nokrangko so'aha, so'otaha aro bang'bea gamrang. ko ra'e Afghanistanni Kabul gita 'Turkestanona re'angpilaha.

3. Ua Indiani salgroo jabongasan dongangaha ; indiba manderang uko pangnaba gualjaha. Uni re'baani jumang gita ong'pilaha. Hindustani manderang ruutbea bilsirangona kingking ia ka'sanenggijagipa, moelagipa gingsidepgipa 'Tartarrangko aro unmang'ni pamongni ku'rang aro mikkang bimangko gisik ra'kuengachim.

4. Mahmud Tughlak 1412 bilsio siaha aro Delhini songnokko uni kacharioni dal'gipa manderangoni saksa Daulat Khan Lodi minggipa ra'aha. Indiba ruutgijan Multanni governor *Khizr Khan Syad* jean Timurni Delhio napani salrango uan dakchakpae adita bil man'gipa ong'paaha, 1414 bilsio Delhio napaha aro Daulat Khan Lodiko uoniko a'rikataha. Uni ja'mano *Syad* ma'chongni rajarang sakgitam Delhio sason ka'anguaha. Indiba 1451 bilsio Lahoreni governor *Bahlul Lod* bon'kamgipa Syadni rajako salone gale an'tangar-singhasono gakata aro Lodi ma'chongni sason

ka'aniko a'bachengataha. Uni ja'mano uni depante *Sekunder Lodi* adita bilakgipa raja ong'e, Indiani salgrojol gimikko ong'nasipile Beharona kingking an'tangni songnoko chapatna man'aha. Indiba uni ja'mano raja ong'rikgipa Ibrahim Lodi bilgri-gipa aro namgijagipa ong'achim aro uko pa'sike Punjabni gevernor Daulat Khan Lodi, Kabulni Mogul raja Babarko okamaha.

MOGULRANG

24 KA·DONGGIPA BABAR (1526-1530)

1. Timurni siani ja·mano uni songnok tongtang tongtang ong'aha aro chonchongipa songnokrang ong-kataha. Uarang'ni gisepo Turkestanoni Kokand, Babarni pagipani jako ga'akaha, maina uaba Timurni su'gipani depante saksa ong'achim. Babarni pagipani sion ua bilsi chi'gitam sanpitichim ; indioba ua uni pagipani songnokko man'rikaha. India ua

rutgijan uni ka'saninggijagipa wanggipa baksa dakgrikna nangahachim. Maina uni chongipa songnokko uoniko ua ra'sekachim. Ua bilsi kolgrikna biapsaoni biapsaona katrorona nangahachim aro pil'nipil bangbang porongronggipa biaprango tusina nangahachim. Ja'mankitiko uni a'songtang Turkestano donganguani namgni



Babar

dongja ine ua nikaha, maina uano una bate ka'-donggipa aro bilakbatgipa nokma ba pamongrangan gapachim. Uni gimin ua an'tangko ja'rikpagipa manderangko an'tang baksa salgipengchi katonna namnikgenma sing'aha. Uamang'ba ugitan songdongkam'ani biap dongpajachim. Uni gimin unbaksa re'pana kusi ong'beaha. Uamang Hindu-Kush a'brini a'gitokrang gita ong'onbae Afghani-
stanona sokbaaha.

2. Afghanrang ka'donggipa aro dakgrikraggipa ong'a; indiba ia salgrooni Turki dakgrikraggiparang uamang'na bateba ka'dongbatgipa aro bilak batskagiparang ong'achim. Babar rutgijan Kabul aro Ghaznini a'songrangko ra'aha. Ua uano 1504 bilsi intal adita bilsirangna sason ka'aha; unon salgipengchi chel'batkale re'angkuna gita uo chu'onga bil dongaha ine an'tangan chanchiaha. Unomiting chachao Punjabni governor uko okamaha. Ua Indiaona re'bana kusi ong'beaha, maina ua Timurni deritchu ong'e Indiako uni man'rikgni gita chanchiachim. Ia somoio Babar an'tangan bilsi sotbri ong'aha aro uni sipairang sak hajal chi'gitammangsanchim; indiba uamang'oni sakprakan bang'bea dakgrikanirangko dakgrik-mangiminrang ong'achim. Uamang ka'dongbee Punjabni a'kaweaona ong'onbaaha, aro Delhiona joljolan re'baha.

3. 'Pathan raja Ibrahim Lodi uni laksa sipairang baksa warachaksoaha. Ia dakgrikanio Mewarni raja Rana Sangram Sinha Babarna dakchakaha ; maina uororo Indiani salgroo donggipa Rajput rajarangni gisepo uan bilakbatgipa ong'engachim aro Pathanrangko Indiaoniko a'rikate dal'gipa Hindu songnokko ong'atna mangsongani gnangchim. Babar re'baoba dongkamgipa ong'jawa ine ka'dongachim. Ia dakgrikani 1526 bilsio Panipat minggipa biapo bilongbee dakgrikaha. Pringoni a'bachenge atamona kingking dakgrikaha aro chon'kamao Pathanrang amsrangako man'aha aro Ibrahim Lodi so'ota man'aha. Ia cheani Babarko Delhini songnokni nokgipa ong'ataha. Iana agreba ia salgroni Indiao Mussalmanrangni songnok dambonga aro bang'a Hinduni Rajput rajarang dongengpitichim. Babar Indiaoni re'angpiljawa ine nike Rana Sangram, adita Afghanni pamongrang baksa nangrime Babarko 1527 bilsio Sikri minggipa biapo dakgrikaha. Iano bang'bea manderang so'otako man'aha aro Rana Sangram amako man'aha. In cheanirang Babarko salgroni Indiao nokgipa ong'ataha.

4. Indiani Muhammedan rajarangni gisepo Mogulrangan dal'batsranggiparang ong'a. Babar aro uni deritchurangkon Moguls ba Mongols ine minga. Uororo Indiao donggipa manderang, jerang-

an gipin a'songni gimin bang'e u'ijachim, Babarko Asiani jatchijolo donggipa a'song Mongoliaoni re'baha ine chanchiachim. Ia ma'chongni rajarang gimik sakchibonga gnang aro bilsu 200 na sason ka'aha. Indiba iamang'ni gisepo skanggipa sakdoksan bilakgipa aro mingsingbatgipa rajarang ong'aha ; bangkirangde bimungnasan raja ong'aiaha aro bil bang'jachim.

5. Babar kattani ortoara singho ong'a aro ua singho gita bilakgipa aro ka'dongbegipa ong'achim. Ua changrogipa mande sakgniko jaksamprako sakprak de'tome chugipa pakmani kosako ga'akgija katjoljolna man'achim. Ua uni nikdika chibima dilantikon jrobataiachim aro pil'nipil salprako mail ritchaprakko gureo gakate re'rongachim. Indiba ua uni atchugitcham Timur gita ka'sanenggijagipa ong'jaha. Ua Indiaona manderangko so otna ba uamang'ni gamrangko ra'seke ra'angna mangsonge re'bajaha ; indiba an'tangna songnokko dake gisik gnanggipa aro namgipa raja gita uamang'ni kosako sason ka'nasa re'baaha.

6. Babar ruuta bilsina Delhio sason ka'jaha. Ua bilsibrisan Delhio sason ka'aengpitichim, unon uni ka'sabegipa dejakra depante Humayun belongbee saako man'aha aro sichongmotgen gita nikaha. Babar uni ka'sabegipa depanteko gimaataniko chakchikna amjachim. Uochacha saksa toromi-

gipa mande uona re'bae una aganaha, ' Naa Isolo bi'ode aro nang'o je nambatgipa gamchatbatgipa bostu gnang ukon Una on'gen ine ku'rachakode, haida Isol nang'ni depanteni janggiko rakikunaba donga ; jekai aganna man'a, nang'ni Agraoniko ra'bagipa dal'gipa hirako.' Unon Bapar inaha, ong'ja ango ganggipa gamchatbatsranggipa bostuara angni an'tangni janggi ong'a. Anga angr'i depanteni janggina an'tangni janggikon on'gen.' Indine agane ua uni depanteni tuchakaniko changgitam re'dule uni depanteni janggiko rakichina aro uni an'tangni janggiko ra'skachina Isolo bi'aha. Unikoa ua an'tangan uni depanteni saaniko ra'skaaha inani pal gita, 'Anga uko ra'manaha,' ine chrikwat-aha. Isol uni bi'ako knachakaha gitan uni depante an'sengrorobae bilakaha, indiba an'tangsa saako man'skae aro bilongroroe siangaha. Ua A.D. 1530 bilsio Agrao siaha.

25. KA'SAE DAKGIPA HUMAYUN

1. Humayun kattani ortoa rasong gnanggipa ong'achim; indiba Humayun skanggipa aro dal'batgipa Mogul raja sakdokni gisepo rasong gribatsranggipa ong'achim.



Humayun

2. Babaro depante sakbri gnangchim aro ua uamang'na pilaknan ka'saachim. Ua an'tangni sina skang an'tangni dejakra Humayunko okame una aganaha, 'Angni siani ja'mano Isol angni songnokko nang'na on'ode nang'ni jonggiparangna ka'sae dakbo ine anga nang'ko geeta.' Humayun mikchi ong'e, uni pagipani kattako mamung saloba gualjawa ine ku'rachakaha; aro beben una indake dakna neng'ani ong'jachim. Ua uni jonggiparangna ka'sara aro uamang'ko duk on'na sikjachim. Ua sakpraknan uni pagipani songnokni mitamko on'aha aro an'tangnade Delhi-ni songnokkosan ra'aha.

3. Uni jonggipa Prince Kamranna ua Kabul aro Panjab a'songrangko on'aha. Ia on'ania uni gisik gnangani kam ong'jachim; maina uni jong-

giparang una ka'saskajachim. Babar uni tang-
mitingo ua jolonikosa uni bilakbatgipa aro ka'dong-
batgipa sipairangko aro una nambatgipa dakchak-
giparangko man'rongaha. Prince Kamran una
dakchakani pal batesa uni songnokko ra'sekna
joton ka'achim. Humayun samtangtango dong-
gipa gipin Afghan rajarang baksa dakgrikbena
nangaha. Uni jonggiparangko an'tangko dakchak-
pachina ua mol'molaha. Indiba uamang una
dakchakaniko on'ani pal batesa unbaksa dakgrik-
aha aro uko so'otna joton ka'achim. Afghan
rajarangni gisepo salaramchini Beharni raja *Sher*
Khan be matcha raja uni bilakbatgipa bobil ong-
achim. Ua pil'nipil amako man'aha aro changsana
bate so'otako man'asiachim. Changsao 1539 bilsio
Buxarni sepango dakgrikanio waljatchio Sher
Khanni sipairangni chadrapako man'e an'tangni
jangginna Ganges chibimaona bilprue katna nang-
ahachim. Ua saksa chi ko'timgipa mandeni bigilni
chi ko'aniko on'e una dakchakachisa Ganges
chibimako jrobate jokaha, aro neng'edikesa Agra-
ona sokangpilaha. Ua chi ko'timgipana dal'a
boksisko on'aha aro adita kontarangna raja dakate
uko kusi ang'ataha. Bilsio gipino ua Sher Khan
baksa Kanaujo dakgrikaha, unoba amako man'e
an'tangni janggina mongma mangsako maibakai
man'pae uni janggilo gakatesa Ganges chibimako.

'bate kataha. 1540 bilsio Sher Khan Delhi aro Agrako ra'srangaha aro Hindustan a'kaweni raja ong'srangaha. Humayun bilsichikungsan Delhio sason ka'ari da'o uko gimaataha.

4. Humayun uni jonggipa Kamranona uni dakchakaniko man'pana ka'donge katangaha. Uaba Sher Khanni namnikgijako man'na kenchake uko nokchakhaja. Uni ja'mano ua Mewarni rajao katnapaha ; maina uaba changsao uni songnokni ning'o ong'ahani gimin ka'sachakaniko man'pagen ine ka dongachim ; indiba uaba uko nokchaksona sikjaha. Uandake Humayun bilsu gitamna katro-roani ja'mano a'gisiko battonge Umarkot minggipa biapona re'baaha. Uano 1542 bilsio Octoberni 14 gipa salo una depante saksa atchiaha jeko ua Akbar mingaha. Uororo Mogulni raja pante atchiode raja an'tangni dal'gipa manderangna sona ba gamchatgipa ripokrangko, an'tangni kusi ong'aniko mesokna, on'rongachim. Indiba danang, Humayuno ia uni katroromiting salrango uni jako mamung gamchatgipa ripok ba sonarang dongpajachim. Indiba uni ra'bita dotsa namen similibegipa matchok ganduri (matchokni gandil) dongachim. Ukon ua unbaksa donggipa uko kakket ong'e jarikgipa bang'gija manderangna on'tiprak on'aha. Uni simila pilakchina gipangon Humayun aganaha, Jensalo angni depante raja ong'gen, unon uko

mingsingani a'gilsak gimiko gipgen ine anga ka'donga. Anga uko Akbar minggen, jeni orto, Namen Dal'gipa ong'a ; maina ua dal'begipa raja ong'gen ine anga ka'donga.'

5. Humayun chon'kame Sindko ra'taina joton ka'aha, indiba chu'sokna man'jaha aro Khanda-harona katangaha ; uan uni jonggipa Kamranni songnokni ning'o ong'achim. Uanoba ua an'tangna jokani ong'ja ine nike Persiaona katangaha, indiba uni depante Akbarko uni wanggipa rimrikaha aro an'tangni skotonggipa song Kabulo donaha.

6. Humayun uni jikgipa aro uko bang'gija jarikpagiparang baksa Persiani Shah be rajani sokgipa ong'e adita bilsirangna uno dongpaaha. Shah una ka'sae dakaha aro hajalchikung donggipa sipai kotoksako una on'aha. Uamang'ko rime ua Afghanistona re'bataiaha aro bilsu chikung-mangna uni jonggiparang baksa dakgrikaha. Ja'mankitiko jonggiparangoni saksa so'otako man'aha ; saksara Meccachi re'angaha aro gitamgipara amiko man'aha. Indiaonare'babiltaina bil chu'ongkujina kin'kin' adita bilsirangna ua Kabulo sason ka'aha. Ia salrangni gisepo Sher Khan simanaha aro uni ja'mano raja sakgitam uni songnokko sason ka'aha. Uamang'oni bon'kamgipa bilgri aro sason ka'na amgijagipa ong'achim. Uochacha Humayun an'tangni sipai kotok baksa

Indiaona re'bae Delhi aro Agrako altuaen ra'aha aro jeko bilsa chi'bongana gimaatahachim, ua songnokko man'pilaha.

7. Ua uni re'bapilani ja'mano ruuta bilsina sason ka'jaha. Bilsisa ong'kujaon salsao an'tangni libraryni kosakgipa gadangoni ong'onba-engachim; unomiting chachao torom nokoni olakianina okamaniko knae rang'san ja'sku dipane bina dakoa, uni su'chalenggipa goldik maibakai su'skoka gita dake ua ga'akonaha. Uni skoni greng be'aha aro rang'san siaha. Humayun namgipa aro ka'sanenggipa mande ong'achim; indiba uo jak ka'singipa aro dakninggijagipa bewal dongachim aro uachin una bang'a chu'sokgnioniko champengaha aro uni minggipin namgija bewal, chong'motan aping cha'ani gimin uni gisikko bang'en bilgri ong'ataha.

26. SHER SHAH (SUR MA·CHONG)



Sher Shah

1. *Sher Khan* Beharni Sasaramni jagirdarni depante ong'achim. Uni chonmitingo uni bimungko Farid mingachim. Salsao ua an'tangni tonualchi matcha mangsako so'otaha ; untalsa uko *Sher Khan* ba matcha nokma mingaha aro uonisa *Sher Khan* ba *Sher Shah* ong'baaha. Ua chonengaonin gisik seng'gipa ong'baachim. Uni pagipa an'tangni a'kingko nirokaniko uni jako donachim aro ua uko name chu'sokatna man'aha. Indiba uni ma·de-

rang uko mikbuani gnangchim aro uni gimagniko-sriksrik dakna joton ka'aha. Iako u'ie ua uni pagipani a'kingoni ong'kate re'angaha. Bang'a obostarangni ja'mano ua Beharni Governorona doangaha. Jensalo Humayun Bengalko bamatna joton ka'achim, ua unbaksa dakgrikna a'bacheng-aha.

2. Humayunni Indiako wate re'angmano Sher Shah an'tang songnokko kimkimatchengna jotton ka'aha. Bengalko bamatsrange uko sason ka'aniko Governorni jako on'gija. Sarkar chi'sku dake suale kam ka'giparangko donaha. Uonisa da'alona kingking district dake sualani ong'baaha. Ua Punjab, Sind, Malwa aro Marwarko bamataha. Iarangni gisepo Marwarni Maldev rajako neng'beesa amaha. Sher Shah an'tangni rikanggimin a'songko ruute sason ka'angna man'jaha. Kalinjarko dakgrikmitingo killako pe'na bomko goaton ua tang'datpile an'tangni bom donramosa ga'akonbae bom dona gimikko bretataha. Unomitingo Sher Shah uni sepango chadenge dongengachim. Ua bilongbee kamako man'aha aro ruutgijan siaha.

3. Sher Shah gisik gnanggipa aro changgipa ong'achim. Ua mande ramramoni Indiani Maharaja ong'aona kingking doangaha. Ua bimchipgipa aro kakketgipa mande ong'achim. Ua Hindu-rangko duk on'jaha aro Hindu-Mussalman gimikna

apsanko dakesa songnok mangrakna man'gen ine bebera'achim. Raiotrangna on'timintiba duk on'ako namnikjachim. Basakoba uni sipai kotok mini a'bako re'pake saoba mini bidangko dingsamang chottomatode una jrima sastiko on'achim. Uni gingtingni ku'chotko pue uno mini didangko sikkroke dingdeate sipairangni donga biap gimikka re'roroate uko sasti on'achim. Badiaba a'bani sepango sipai kotok waltuna tambu ping'ode, saksani a'sel dolgimik sasti man'jana gita sipairang an'tangtangan bodol bodol walgimik a'bako dongtimachim. Rajani sason namen rakachim; cha'ugiparangna kenna nangani bang'ja, ramadilma rango jekoba done bangbango tusina kenani grichim. Sorkarini dal'gipa kam ka'giparang saonikoba maikoba kragija ra'ahaode nokgipana gamatpilorongachim.


4. Sher Shah a'songna namen tom'tomaniko on'na man'achim. Uni chu'sokgipa kam mingsara a'ani kajinako tik ka'anio ong'aha. Game cha'agiparang bimchipjaode aro chu'ongnikaniko man'jaode a'song silrorona man'ja ine ua u'iaha. Uni gimin ganggipa sakprakni a'arangko tik ka'atchengaha. Bite man'aoni bakbrini baksako sorkarini kajinana ra'aha. Indiba biteni pal tangkako on'anikoba ra'chaka aro didiachim. A'songgimikko Sarkarang dake sualaha aro Sarkar damprakko Perganas

dake suaiaiaha. Perganasprako bichal ka'gipa aro kajinako chimonggipa saksako aro pulisni bil gnanngipa kamrangko dakatgipa dal'gipa kam ka'gipa saksako donaha.

5. Ua an'tangni sipai kotokko nambatataha aro pangnan tangkako dormaha on'aha. Bading-giparangko chelchake pangnan didiachim. Ua Chitagongoni Punjabona dal'gipa ramadilma ba Grand Trunk Road aro gipin dal'gipa sorokrangko oaha. Mailbriprakon neng'takani ba waltuani aldarangko rikate uarangko rakina gita a'arangko on'e chaukidarrangko rakiaha. Ia aldarango je Jatba waltuna man'achim. Uororo songregiparangna jokanisan ongaija, indiba kusi ong'ani aro dongtoaniba ong'achim.

Uni dikdiksasan sason ka'aniko chanchie, uni nama kamrangni gimin aiao inmanani ong'a. Ua ruute sason ka'angkuna man'ode Mussalman rajarangni gisepe haida ian dal'batgipa sason ka'gipa ong'naba gnanngchim ine chanchiani gnanng.

6. Sher Shahni siani ja'mano uni depante Islam Shah sason ka'rikaha. Ua uni pagipani kamko jarikna joton ka'aha; indiba uaba ruute dongjaha. 1554 bilsio Adil Shah singhasonko man'rikaha. Ian choligijagipa aro bil grigipa ong'achim. Sikandar Sur uko bobil dake un



songnokni saliramchipakni pilak songrangko ra'-sekaha. 1555 bilsio ia Sikandar Surko ame Delhiko man'pilaha aro Sur ma'chongni sason bon'aha.

27. DAL-GIPA AKBAR (1557-1605)

1. Akbar uni pagi-pani sio bilsichi'git-amsan ong'engpitichim aro sason ka'na gita agre dambechim. Uni gimin uni wanggipa, chong'motan uni pagi-pani nogipani segipa Beiram Khan ming-gipa Turki nokma uni pal sason ka'soaha aro raja bi'sana simsakaha. Uan Akbarna gure gakatna, chi jrona aro chriko, sel'uko aro tonualko jakkalna skiaha. Ua una sena poraina skijaha ; maina ua an'tangan sena poraina changja-chim. Uni chonmitingo ka'singipa biap Kabulo dongani gimin Akbar an'seggipa bilakgipa aro



Akbar

kamna baigipa mande ong'e dalbaaha. Uni wanggipa uni pal bilsu bonganasan sason ka'aha. Ua skatang dakgipa aro bilko skatang jakkalgipa mande ong'ani gimin, kachario dal'gipa kamka'giparang uko namnikjana a'bachengaha aro Akbarko an'tangni jako kamko ra'china didiaha. Akbar an'tangba bang'a uni kamrangko namnikjaha aro an'tangan bilsichi'chet ang'aepitioba rajani kamko an'tangni jako ra'aha ine aganprakataha. Beiram Khan namnikjabeaha aro adita sipairangchi chakatdilaha: indiba Akbar bamataha aro Beiram Khanku kema ka'e Meccachi re'angchina watataha. Indiba re'angmitingku ramadilon saksa Afghan jeni pagipako ua so'otachim, Gujarato uko so'otskaha.

2. 1560 bilsio Akbar singhasono gakatchengaha. Unemitingo uni songnok, Punjab, Delhi, aro uni wilwilasan ong'achim aro uni samtangtango bang'bea Muhammedan aro Rajput rajarangni songnokrang g'angchim. A'bachengo ua an'tangni songnokni ning'o donggipa chonchongipa bil man'gipa dilgiparangko bamate tom'tomataniko dakchengna nangaha; maina bang'a bamna sikkija jakgital ong'na joton ka'giparang g'angchim. Ia kamnan ua bilsisnimangko re'ataha. Jensalo an'tangni songnokko kimkim ong'atmanaha, ua gipin a'songrangko a'na ra'bachengaha. Akbar gisik gangbegipa aro chanchirakgipa raja ong'a.

Ua Hindurangko una ka'saatana agre uni songnok pangnaba bilakgipa aro kimkingipa ong'jawa ine u'iachim. Uni gimin ua uamang'ko ka'sabee jakkalaha. Ua pilak kamrangan Hindu aro Muhammedanni dintanganiko mesokjaha aro pilaknan apsan niam aro apsan kakket bichalko on achim. Gipin Mussalman rajaran gita mite-rangko gimaatjaha aro maniatangtangko tom'tome nanina man'achim. Darang Hindu rajaba Akbarna bate Hindurangna ka'sabate dakna nan'jawa-chim ine agana.

3. Ua Hindurangko ripeng dakna aro nangrime donganiko ra'bana joton ka'aha. Ua an'tangan Rajput me'chikko bia ka'aha aro uni pagipa aro adatang jonggiparangko uni kachario dal'gipa manderang ong'ataha. Uni depante *Salim* dal'ahaon unaba Hindu mechik *Jodhai* minggipako bia ka'e on'aha aro uni adatang Rajah Mansingh uni sipai kotokni dal'batgipa pamong ong'aha. Rajput rajaran una bamna sikjachim aro a'bachengo uko warachake dakgrikaha ; maina gipin Turki rajaran gita uamangko ua duk on'gen ine chanchiachim. Indiba ua mairongpile bilakgipa aro ka'adonggipa ong'a ine nikon, uamang una kenaha aro uko nam-nikbeaha. Maina Rajputrang chugipa jat ong'a aro ka'donggipa, bilakgipa aro pilak namgipa gun gnanggipa manderangko uamang namnika aro

dal·nikachim. Ua Rajput rajarangko bamatoba a·songtangkon sason ka·na on·e an·tangko dal·batgipa maharaja gitasan manichina ge·etachim. Ia Rajput rajarangni dakchakanichi ua bangki Pathan rajarangko amsrangaha.

4. Akbar namen dal·begipa songnokko dakang·aha. Salgrochi Kabul aro Kashmereoni salgipeng·chi Ahmednagar Berar aro Khandesh, salaramchi Bengal aro Orissaoni saliramchi sagal rikamona kingking ong·achim. Singhasono uni gakatchengo uni songnokko mesokgipa mep baksa aro chon·kamao uni songnokniapalako mesokgipa mep baksa tosusae niode ua mairongnile apalataha uko nikgen. Ua a·songgimikko Suba ba Province chi·bonga dake سوالها. Subaprako saksu Viceroy ba Subadar saksako donaha aro uan pilak sason aro sipai kotokni kosako bil man·gipa ong·achim. Uni ningo kajina ra·ani gimin dakchakgipa Dewan, bichalni bidingo dakchakgipa Kazis aro pulis gita dakchakgipa Kotwalrang gnan·gchim.

5. Uni kachario kam ka·gipa gisik gnan·gkipa saksu Hindu, *Todar Mull* minggipa gnan·gchim. Uan skango Sher Shah rajani ning·o kam ka·gipa saksu skia man·gipa ong·achim. Uni ku·patianichi ua songnokgimikni a·arangko toataha aro a·ani a·sal gnanganina krae tokchikung dakataha aro a·ani kajinarangko biteni bak gitamni baksakosan

sorkarina, chong motan rajana ra'achim. Kajinarangko bilsichikungprako tik ka'atachim. Akbar an'tangan skia man'gipa ong'jaoba bang'bea kitaprangko chimonge rakina namnikbeaha aro hajalni hajal kitaprangko an'tangni kitap donram ba libraryo donataha. Ua git ba poido'angko namnikbegipa ong'aha. Uororo mingsinggipa skia man'gipa manderangko uni kachario rakiachim. Uni namnikbegipa saksa *Abul Fazl* ong'achim. Ua Akbarni songnok aro uni sasonni gimin Ayeeni Akbari minggipa kitapo rongtale seaha. Akbar ia mandena ka'sabeani gimin uni depante Salim uni kosako mikbuani gngangchim aro namen bobil dake sipai saksana sriksrik tangkako on'e uko so'otataha. Akbar namen duk man'beaha aro salgni walgnina mamungkoba chagija kalimaha.

6. Akbarni sason ka'mitingo manderang skangna bate namen kusi ong'beachim aro tom'tome dongna manachim. Uamang'nikajinarangritchenga. Una skang sason ka'gipa Mussalman rajarang dingtangmancha. Hindurangoniko mangmang ra'gipa Jazia minggipa kajinako dontongataha aro pilaknan kajinako apsan dakataha. Pilakkon toromtangtangko tom'tome olakkina on'aha. Je dakbewalrangnan namja aro kraja indakgipa dakbewalrangkosan dontongataha. Mingsa Hindurangni bewalo saniba segipa siode uko soani ganchio uni tangenggipa

Jikgipa so·chapako man·na nangachim. Ia dakbewalko Suti ba Sootee ine minga. Ia dakbewalko Akbar dontongataha.


7. Akbar bimang nitogipa changrogipa, chel apalgipa jak ja'a ro·rogipa, kni aro mikronrang gisimgipa ong·achim. Ua an·gitchakgipa ong·oba budepachibara gisimbaroroaha. Uni pagipara Turk aro uni ma·gipara Persian ong·achim. Uni bil namen bang·sraga. Ua rama re·na bilakgipa aro gure gakatna namnikbegipa ong·achim aro pil·ni pil salprako mail kolatchi ba sotbri dake re·rong·achim. Ua namen chi jrona changachim aro bang·en jrorongaha. Ua bilakgipa ong·ani gimin chugipa a·brirangko neng·gijan dona man·achim. Ua a·songtango slai gona changbatgipa ong·achim. Uni nambatgipa slaiko "Straight shooter" ba sronge gogipa ine mingachim aro ua slaichi matburung mang hajalgni ong·nasipile goaha ine agana.

Ua gimik bilsio 51 sason ka·aha aro bilsio 63 ong·o 1605 bilsio siaha. Uni siani ja·mano uni depante Salim uni songnokko man·rikaha.

28. JEHANGIR (1605-1627)

1. Akbarni simano jensalo Salim singhasono gakataha, Jehangir ba a·gilsakko ra·gipa ine bi-

SINGHASONO GAKATCHENGO
AKBARNI SONGNOK



mungko ra'aha. Ui ma'gipara Rajput ong'a ; uni



Je. angir

gimin ua samsa Hindu ong'achim. Uni pagipa gita ua adita Rajput me'chikrangko bia ka' ahaaro uamang'onisaksa Prince Khurramni ma' gipa ong'achim, jean ja' mano singhasonkoman' rikachim. Indiba uni sason ka'ani bilsidok mangja'manosaksa. Persian me'chik *Nur Jehan* minggipako bia ka'aha

aro uan Indiao mingsingbatgipa ranirangoni saksa ong'aha.

2. Akbarni sason ka'engmiting salrango saksa kangalgipa Persian, Gheias minggipa Turkestanong'achim. Ua skia man'gipa ong'a, indiba kangalgipa ong'achim. Saoba uko Indiaona re'angchina ku'patiaha, maina ugita skiaman'gipa mande Indiao altuae kamrangko man'gen ine ka'dongataha. Uni gimin ua an'tango donga mangsa kochor budepao an'tangni jikgipako gate Indiaona dakbagipa ramako re'chakatbaaha. Uamang'ni songtangko watbaani ruutgijan uamang'na demechik saksa atchiaba. Ua nitobegipa bi'sa ong'achim. Uni

gimin uni pagipa uko *Mirh-un-nixa* bamechikrangni sal ine mingaha. Indiaona re·baani rama namen chel·a, balwa ka·sina aro batsotramrang suurian gapachim aro songregiparangna namen neng·beani ong·achim. Ruutgijan uamang·ni ra·bitbara cha·anirangba bon·srangahachim, aro je gureo jikgipako gate songrepaengachim, uaba ga·ake sisrangaha. Uni jikgipa namen bilgribeengpiti aro re·nan ambrejachim. Ua ma·a aro bi·sako de·tome re·na amjachim. Uni gimin ua chongipa Mirhko ramasamo boldimni ning·o, saoba uko re·pakbagen aro ka·sachake uko ra·anggen ine ka·donge sriksrik donangaha. Indiba ruutgijan uni jikgipa uko u·iaha aro re·ange ra·epilchina uko ge·etaha. Ua re·angpile boldimona sokoa mangsa dal·gipa gisimgipa chipu ua bi·sako minokna ine ku·angengako nika·ha. Ua chipuko so·otaha aro tiktak somoeo bi·sako jokatna man·ahani gimin Isolko mitelaha, aro uni ma·gipaona uko ra·angpilaha. Unomitingchachao adita badinggiparang utrango gakate Indiachina re·baengachim. Uamang uko nike ka·sachakaha aro cha·anirangko uamang·na on·e Indiaona re·baani dakchakaha.

3. Delhiona sokbaon ua kamko altuaen man·eaha aro ua gisik gnanggipa aro changgipa ong·ani gimin kam mingsaoni mingsaona dororoangaha aro chon·kamao ua Akbarni kachario dal·gipa

mande saksa ong'aha. Chongipa Mirh Delhio donggipame|bi'sarangnigiseponitobatsranggipa aro nambatsranggipa ong'e dal'rorobaaha aro ua jekai nitoa indaken gisik gnanggipa ong'baaha. Uochacha Persiani saksa dal'gipa mande gnangchim. Ua bilakgipa aro ka'donggipa pante saksa ong'achim. Uni bimung *Sher Afghan* ba matcha so'otgipa. Uko indake minga, maina ua changsao matcha mangsako uni tonualchi bilsa den'ari so'otahachim. Ua Bengalo Burdwanni jagirdar ong'achim. Ua Mirhko nike una kasaaha aro uni pagipao uko bia ka'na bi'aha. Mirhni pagipa kusi ong'en ku'rachakaha. Indiba bia ka'na skang Jehangir uko maibakai nikmanaha aro mikcha-beaha aro uaba uni pagipao sing'aha. Indiba sakgipinna ku'rachakmanahani gimin ua an'tangni kurachakako pe'jaha. Salim uni pagipa Akbaro janapaha; indiba uaba una dakchakna jechak-srangaha. Mirhunnisa Sher Afghanko' bia ka'e Bengalona re'angaha.
| |

4. Jensalo Salim raja ong'aha, ua skatangko dakna man'aha. Ua 1607 bilsio Sher Afghanko rajani kosako bobil dakgipa ong'a ine pasikaniko ra'baate Bengalni Governor Kutbuddin Khanna uko sastina rim'bachina ge'etaniko on'ataha. Sher Afghan iako u'isogija uko ja'rikgipa sakgnikosan rimbite Governorko grongna re'angachim. Gover-

norni tambuona sokahaon rang'san uni bang'bea sipairang uko duulako ua nikaha. Unon ua u'iaha aro an'tangni tonualko saloke Governorko den'aha



Nur Jehan

Sipairang rang'san Sher Afghanko den'tongtong-aha. Governorba ruutgijan ja'mano siaha Mihrko, jean da'o segri ong'aha, uni chongipa demechik baksa Delhiona rajani kachariona rimangaha. Unon ua uko Nur Mahal ba Rajani nokni Seng'a ine mingaha. Ua uni segipako gimaatanina namen duk ong'beaha aro ruuta salrangna kingkingan

Jehangir baksa agangrikjachim aro mikronan nijachim. Ua bilsidokna kingking kalimaha. Uni jamansa Jehangirko bia kana kurachakaha. Jehangir kusi ongan gapaha aro rasong chabee bia kaha. Ua sal inal uko Nur Jehan ba Agilsakni Seng'a ine bimungko donaha.

5. Nui Jehanni rani onghaon Jehangir sasonni pilak kamrangkon una pakwataha aro ua jeko sika ukon dakna onaha; maina rani una bate gisik gnangbata aro nambate sason kana man'a ine ua nikmanaha. Raja antangan salanti nama chaniko aro chuko man'ode chu'ongnikachim. Nur Jehan sasonni pilak hukumrangko onachim. Uni budepa pagipa aro uni jinggipako songnokni dal'gipa manderang ong'ataha. Rajanipal ranisa asongni pilak nanganirangna soi kachim. Ua indake bilsa chidokna sason kaha. 1614 bilsio jensalo Englandni raja, James I, adita English bandinggiparangko *Sir Thomas Roe* baksa India baksa badinggrikaniko dakna sing'na watatachim, ranisa uamang'na hukumko onaha.

6. Sir Thomas Ree India bilsigitam dongaha aro Indiani gimin kitap kingsako seaha Jehangirni chasongo Akbari chasongo gita namjaha ine mesoka. Dingtang dingtang governorrang bang'a salon raiotrangko kasaninggija jakkalaha. Asong gimikon raseke ragiparang bang beaha aro bilak-

gipa nitimgiparang gri a'sel nangaoni jokani ong-brejachim. Raja an'tangan atamantian dal'a al-anirangko dake kusi ong'anirangko dakronga. Chu ringrakbegipa ong'a aro salantian chu pekrongachim.

7. Jehangirni sason ka'ani bon·kamachibara uni depante Khurram una adita dukrangko on'aha. Uni pagipani ja'mano ua an'tangan singhasonko man'rikgen ine u'ie sengnapgija dakaha. Jensalo uni pagipa una Shah Jehan ba A'gilsakni Raja ine bimungko on'aha, rajani bilko rang'san an'tangni jako ra'na joton ka'aha. Nur Jehan rajani janggina kenchake sipairangni dal'gipa dilgipa Muhabat Khan minggipako chelchakchina okamaha aro uni dakchakachi Shah Jehanko Deccanona a'rikataha. Unikoa Muhabatni pilak kamrangko nike an'tangan raja ong'na joton ka'enga ine u'iaha aro uko so'otna mangsonge an'tangni kachariona okamataha. Indiba Muhabat bang'bea sipai kotokko rime re'baaha aro Jehangirko tambuo dongengako nike uko rim'aha aro patoko chipaha. Ua uko so'otna mangsongjachim; indiba an'tangna kenchake uko watjaha. Nur Jehan uko jokatna joton ka'aha, indiba man'jaenba an'tangan patoko napaha aro aditani ja'mano Nur Jehanni chalak. kichi patokoni jokaha. Unon Muhabat an'tangni janggina kenani ong'a ine nike salgipengchi Deccanona katange Shah Jehanko nangrimeaha.

Iani ja'mano ru'utgijan Jehangir siaha. Shah Jehan 1627 bilsio singhasono gakataha aro Nur Jehanna pensionko on'aha. Iani ja'mano Nur Jehan bilsikolgrik mang tangkuaha.

2.9 SHAH JEHAN (1627-1658)



Shah Jehan

1. Shah Jehano Turkni an'china bate Rajputni an'chi bang'bataha; maina uni magipa Rajput ong'a aro uni pagipara samsa Rajput aro samsa Turk ong'achim. Ua Mogul rajarangni gisepo mikkim chabatstranggipa ong'aha. Uni bilsikolat-,

chi sason ka'ani gisepo Indiani namnambatsrang-gipa gopramrang, olakiani nokrang aro rajani nokrangko rikaha.

2. Ua raja ong'arion uni jonggiparangko aro bilgrigipa chonchongipa uni pilak gritangrangko so'ottokaha, jedakode darangba unbaksa singha-sonna dakgriknasigipa dongjawachim. Ua indake ka'sanninggija kamchi uni sason ka'aniko a'bacheng-ahaoba ua a'songko name sason ka'aha aro uni pagipa Jehangirna bate nambatgipa ong'achim. Ua ugita aratgipa aro chuko ringrakgipa ong'jachim.

3. Shah Jehanni jikgipara nitogipa Persian me'chik Mumtaz Mahal ong'achim. Uan Nur Jehanni namchiktang, chong'motan. Nur Jehanni jonggipani demechik ong'achim. Ua uni segipana namen ka'sabeachim aro uni segipaba uni ka'tong gimikchin una ka'saskaachim. Uamang'ni bia ka'ani bilsichi'bri ong'ani ja'mano ua bilongbee saaha aro uni siani sal sokaha ine u'iaha. Uni grapenggipa segipa una ka'saako mesokna maiko dakako nam-nikgenchim uo sing'aha. Ua aganaha, 'Naa angna ka'saode anga dongjahaon angni biapo gipin me'chikko bia ka'tainabe aro angni bimungko jringjrotna tange rakina gita angni kosako gopramko rikbo.'

4. Shah Jehan uni siangenggipa jikgipani ge-etako dakna ku'rachaha aro an'tangni kattako

name rakiaha. Ua gipin jikko kimtaijaha aro



Taj Mahal

Mumtaz Mahalni
gopram kosako
mingsinggipa Taz
Mahalko rikaha.
Uan a'gilsako nam-
batsranggipa aro
dam rakbatgipa
gopram ong'aha.
Uan Agrao Jamuna
chibimani rikamo
donga aro meja-
losan rikaha in-

gipa gita gital dake dongengpiti. Uan iongtalgipa
gipokgipa marbolni ong'a aro gamchatgipa ro-
ongrangchi kipachim. Uko rikani tangka lak
kolatchi bon'achim aro bilsil kolatchi nangaha.
Una agreba Shah Jehan Delhio Jumna Musjid ba
Dalgipa olakkiani nok aro Agrao Moti Musjid ba
muktani olakiani nokkoba rikataha.

5. Shah Jehanni sason ka'engmitingo English
badinggiparang East India Companyni bimungo
Madrasni gitim damsako 1639 bilsio Chandragirini
rajaoniko breaha aro uno Fort Saint Georgeko
rikaha. Ua salrangni gisepon Mogul rajaoniko
hukumko man'e Bengalo Calcuttani mail 25 chel'ao
Hugli chibimani rikamo karkana ge'sako rikaha.
Ian Bengalo English manderangni badingani
biapko man'chengani ong'aha.

6. Shah Jehanni chon·kamani salrang namen dukni ong·achim. Uo depante sakbri gngangchim. Dal·batgipa Dara ka·donggipa, nitogipa, cha·chipil-gijagipa aro jaksramgipa ; indiba gaora de·gipa aro skatangko rang·san chusokataigipa ong·achim. Uan Delhini Governor ong·achim. Ua Akbar gita Hindurangna ka·sae dakgipa ong·achim. Indiba Mussalmanskarangoni Sunni dol uko namnik-jachim. Gnigipa depante Shuja ong·achim. Ua atchutang gita chuko namnikbegipa ong·achim, indiba gisik gnganggipa aro ka·donggipa ong·a. Gittamgipa depante Aurangzeb bil man·na sikkipa, ka·donggipa aro sipairangni changgipa pamong ong·achim. Ua rakgipa Mussalman ong·a. Uni jonggipa chonbatgipa Murad ong·a. Ua sason-rangni gimin chanchibreja aro chu ringna, sikar ka·nasan gisik nanggipa ong·achim. Iamang sakprakon dal·gipa sipai kotokrang gngang aro sakprak-an province ge·prakni Governor ong·achim. Shuja Bengalni, Aurangzeb Deccanni aro Dara Gujaratni Governorrang ong·achim.

7. Bilsil kolatchi sason ka·ani ja·mano Shah Jehan bilsil sotsnini budepa ong·aha. Unon changsao ua sabeaha aro sigen ine chanchiachim. Unon uni depante sakbri pagipani singhasonna dakgrikna a·bachengaha. A·bachengo Aurangzeb uni jonggipa Muradko tol·napaha. Ua an·tangan

singhasonna mikbokja batesa toromi ong'e donge an'tangni janggi tanganiko Isolna kam ka'e re'at-nasa sika aro Muradkon an'tangni pagipani pal raja ong'atna sikenga ine bebe ra'ate Muradni pilak sipairangko Aurangzebni sipai kotokrang baksa dondimaha. Ia nangdingimin sipai kotokrang Dara aro Shujani sipai kotokrangko amsrangaha. Dara so'otako man'aha aro Shuja amako man'e Arakanchi katangaha aro uonin uni kaitako knataijaha. Ja'mano ua Muradkoba Gwalliorni killao chipchange donaha. Murad Aurangzebni kakketgijaniko u'iaha aro uni kosako chakatna joton ka'aha, indiba rim'a man'aha aro kengni ong'a ine chanchie maiba pa'sikaniko dake so'otataha. Uni pagipa saa an'sengpilahaon ukoba chipchange bilsisnina uni sikujana kingking donaha. Ruutgijan Aurangzeb 1658 bilsio Alamgir ba A'gilsakko Amgipa ine bimungko ra'e singhasono gakataha.

30. AURANGZEB (1658-1707)

1. Uni pagipani sason ka'mitingko Aurangzeb Deccano Indiani salgipengo donggipa Muhammedan songnokrang baksa dakgrike salko re'ataha. Uaranga Bijapur aro Golconda ong'achim. Ua Mir Jumla ni dakchakaniko man'aha. Mir Jumla

a'bachengo Golcondani man'e cha'gipa badinggipa



Aurangzeb

ong'achim, indiba ja'mano Golcondani raja Abdullah an'tangni kachario rakkiha aro dal'oroangen dal'batgipa montri dakataha. A d i t a ruutani ja'mano ua an'tangni nokgipako watgale Aurangzeb baksa nangrimaha aro Shah Jehan sachangenba Aurangzeb Delhichina chaba-jaode ia songnok ge'gnikon

amsrangginokchim.

2. Aurangzeb singahasono kim'kim ong'arion an'tangni songnokko bariatani gimin chanchina a'-bachengaha. Ua Mir Jumla ko Bengalni Governor ba Subadar dake watataha aro Assamko ra'china ge'etaha. Mir Jumla dal'gipa sipai kotokko rime Daccaoni re chakatbaha aro Assamni skotonggipa songjinmako 1661 bilsio amaha. Indiba ua bakan katangpilna nangaha, maina bang'a saanirang uni sipai kotoko napaha aro bang'bea uni manderang siaha. Ua an'tangba saako man'aha aro Daccaona sokpilna skangan siaha.

3. Akbarni Hindurangna ka'sabee jakkal-ani kamrangko an ching nikbaaha. Hindurang uni songnokni krongrang ong'aha aro uamang'ni

dakchakachisa uni dal·begipa songnokko mangrake aro tom·tome rakina man·aha. Ua kakketgipa aro ka·sae daggipa ong·ani gimin, Rajputrang aro gipin Hindurangba uamang·ni kosako sason ka·atna namnik beaha. Gipinko duk on·anina agre uamang·ni dakbewalrangko jakgitel ong·e manina on·achim aro uamang·ni pagitchamrangni toromko dingtang·atna joton ka·jachim. Indiba Aurangzeb indake dakjaha. Ua chasongni bang·bea Mussalman rajaranggitagipin toromo donggipa manderangnaka·sae dakode Isol namnikjawa ine bebe ra·achim. Ua darangoba ka·donggijagipa aro darangnaba ka·sagijagipa ong·achim. Uni ning·o kam ka·giparangoni saoba bil gnanggipa ine nikode uni kosako bang·a kenchakanirang pangnan dongachim. Ua Hindurangni kosako *Jizia* kajinako ra·taiaha aro bang·bea mite nokrangko aro miterangko pe·ataha. Hindurangni doke dam·e kusi ong·e ring·anirangko dontongataha. Changsao Hindurang maikoba manggisiko gita ripee, chrike grape uni nokni sambako repakangengachim. Uko nike Aurangzeb, Sani siako gopna ra·angenga ine sing·ataha. Ringanirang sijok aro chinga uko gopna ra·angenga, ine aganchakataha. Ning·tue gope, jedakode ua chatpiltajawa inesa ua aganatskaha.

4. Aganbagimin ka·sanninggija kamrangchi Aurangzeb an·tangni songnokni krongrangko be·ataha aro dal·begimin Mogulni songnokni be·ani a·selko

ra'baaha. Jatsrang, Rajput ma'chongsa, chakataha aro Satnamis minggiga Hindurangni dolsa uni kosako warachakaha. Ia chonchongipa chakata-nirangko ua tom'tomatna altuaen man'aha ; indiba uamang'ni saknaenggipa gisikko bilchi pindape donasan ong'aha. 1678 bilsio Marwarni raja, Jasovanta Sinha jean Aurangzebni dal'gipa sipai-rangni dilgipaba ong'achim Kabul songo siaha. Uni jik dedrang mamung watani ba Indiaona re'baani hukumko mangija Kabulko wate songtang Rajputanaona re'chakatbaaha. Iako dos ine pasike Aurangzeb uamang'ko rim'na joton ka'aha aro sipai kotokchi dongdulataha. Indiba maiba chol-chi Rajputrang jokate songtang Jodhpurona wa-tatna man'aha. Ia kam pilak Rajputrangko ka'onangataha. Rathorni Rajput dilgipa Durgadas aro Mewarni Rana, Raja Sinha Aurangzebni kosako chakatdilaha. Ua uamang'ko bamatna bang'en tarihaoba amchakjaha aro Hindurangni namnika gita tom'tomaniko dakna nangaha. Untal uamang *fixia* kajinako on'jaha.

5. Aurangzeb Deccan gimikko an'tangni song-nokona ra'bana miksongani gnangchim. Uni singhasono gakatna skangan Bidar, Berar aro Ahmednagar a'songrangko man'manaha ; indiba Golconda aro Bijapurni songnokrangko man'kuja-chim. Ua pil'nipil an'tangni dakgrikdilgipa pa-

mongrangko watataha, indiba chu'sokna amja-chim. Uni gimin ua an'tangan dal'begipa kotokko rime, an'tangan sotdokbonga bilsu ong'ahaoba Delhioni re'chakatangaha. Ua uni sason ka'ani samsa gimik, bilsu kolgrikbongako Deccanni dakgrikani a'barangon re'ataha. Indake bilsu ruutana dakgrikani ja'manosa neng'bee ua Golconda aro Bijapurni songnokrangko amaha aro an'tangni songnokona chapataha.

6. Indiba Western Ghat jolo donggipa Mahrattarang bilakbana a'bachengaha. Uamang'ni duramong ba pamongrangko Bijapurni raja champengsorongachim; indiba da'o ua songnok be'ahaon Aurangzeb uamang baksa nangtingna nangaha. Uamang uamang'ni gital dilgipa Sivajini ning'o namen bilakbaaha aro Aurangzeb uko mamungsaloba amna amjaha. Dolgipin salgrochiba Punjabo Sikhrang ong'kataha. Babarni dongmitingo saksa gisik gnanggipa Nanak minggipa gnangchim. Ua Hindurang aro Mussalmanrangni gisepo pangnan dakgrikanirangko nika namen duk ong'achim. Uni gimin ua torom minggnioniko namnambatgipa skianirangko ra'e nangrimgimin torom mingsako skiaha. Uko jarikgiparangko Sikhrang ba Sninggiparang ine minga. Babar aro uni jam'ano sason ka'giparang uamang'ko skatang manina onaha; maina uamang rajana bama aro nanga kajinarangko

on'achim. Indiba Aurangzeb uamang'ko ka'sae jakkaljaha. Uamang'ko biapsaoni biapsaona rikroroe so'otaha. Uamang uko warachakaha; indiba amchakjae Himalya a'brirangchi doe kataha. Indiba Aurangzebni ja'mano re'bapile bilakgipa sipaini jatrang ong'skaha. Uamang Salgroni India bilakbatgipa jat ong'aha.

7. Chon'kamao Mahrattarang baksa ruuta bil-sina dakgrike uni sipai kotokrang neng'aha aro cham'aha gita ong'aha. Cha'anirang chu'ongjaha chirangko bisi on'tokahani gimin ringani chirangba bang'jabeaha. Aurangzeb an'tang bilsio sotsku ong'aha aro una dakchakgipa darangba griahachim. Uni depanterangba uni ruutbee sason ka'aniko neng'nikpilaha; uandaken uamang'oni saksa Mahrattarangni dolo napaha aro sakgipin Persiach katangaha. Uandake bilgribee budepamano 1707 bilsio ua siaha. Uni siani ruutgija ja'manon Mogul-ni songnokrang bilding bildang ong'srangaha aro be'aha.

31. MAHRATTANI RAJA SIVAJI (1627-1680)

1. Sivajini pagipa Shahji Bhonsla Carnatic a'songo Bijapurni rajani ning'o dal'gipa Jagirdar ong'achim. Una agreba Poonaoba uni jagir ba a'king man'a dongachim. Sivaji 1626 bilsio atchi-

aha. Uni pagipaoniko man'rikgipa Poonao donggipa jagirko nirokchina gita Bhonsla saksa



Sivaji

Brahman, Dadaji Kondeo minggipa mandeko donachim.

Sivajiko uni simsakani ning'o donaha. Maina ua an'tangan poonao dongrongjachim.

Ia Brahman Sivajina sena ba poraina skijaha ; maina una namgni dongja ine chanchiachim. Indiba gure gakatna, slai gona, tonualko aro sel'uko jak-

kalna aro dakgrikanirangkosan skiachim. Ua una Hinduni gitchamgipa ki'aprangoniko Ram aro Krishnani gimin aro chengoni gitcham rajarangni gimin agane on'rongaha aro gitrangko ring'e mesokrongachim. Ua ia dambegipa Sivajina skangni rajarang jekai dakaha uandake uaba an'tangko mingsingatna nanga ine didirongaha.

2. Mahrattaranga Indiani saliramchi, jeko Bombay Presidency ine minga Western Ghat ni ab'rirango donggiparang ong'a. Uamang'o bang'a nokma ba pamongrang gnang aro abrirangni kosako killarangko rikachim aro samtangtango dongigipa songrangni kosako nokgipa ong'achim. Sivaji

ia nokmarangko jatsan ong'ataha. Ia Mahratta nokmarang a'kaweaona ong'onbae dakgrike ra'seke an'tangni killaona ra'doe katrongachim. Sivaji uamang baksa re'angrongpaaha. Bilsil kolgrik ong'on an'tang gita bilakgipa ka'donggipa dolsa pante-rangni skotong ong'e dilgipa ong'baaha. Uandaken 1646 bilsio Poonani salgipengo donggipa Torna minggipa a'brini killa ge'sako ra'aha. Uan Bijapurni rajani songnokni ning'o ong'achim. Bilsigipino uni saliramchi donggipa Purandhar minggipa gipin killako ra'aha. Uoni ruutgijan an'tangna Raighar minggipa gital killako rikaha. Killa ge'sani ja'mano killa ge'sa dake ra'roroangen pilakchim mingsingani giproroangaha.

3. Ruutgijan Bijapurni raja uni kamrangko knasoaha. Sivaji bilakroroe ka'dongroroaha aro 1648 bilsio salgroni Concanko ra'aha aro sorkarini tangka donramko ra'sekaha. Bijapurni raja namen ka'o nangbeaha. Ua Shahji Bhonslako uni depanteni a'sel dai ong'a ine pa'sike rim'e patoko chipaha. Shahji uni depanteni kosako ua bil man'ja ine aganoba uko manigija Sivaji adita salrangni ja'mano bamjaode uni pagipakon so'otgen ine ka'mikkenataha. Iana kene Sivaji Mogulni raja Shah Jehano mol'molaha aro Shah Jehan uko dakchakna ku'rachakaha. Mogulni sipairang napa-na kene Bijapurni raja Shahjiko watpilaha, aro uni

Carnaticni jagirko una on·pilaha. Iani ja·mano bilsu brimangna Sivaji tom·tom dongaha. Indiba jensalo uni pagipa Carnatico joke dongengaha ine nikaha, ua ra·sekrorona a·bachengtaiaha.

4. Bijapurni raja bang·bea sipai kotokko on·e uni sipairangni dilgipa Afzal Khanko Sivajiko bamatchina wata aha. Sivaji Afzal Khanni tarigimin sipairang baksa parake bangbanggipa dakrikani a·bao dakgrikna amchakjawa ine u·iaha; maina uamang·o mande bang·bata aro dakgrikani silchidarerang bang·batachim. Uni gimin Khan saksan re·bae, un baksa ku·monggrikaniko dakode una bamgen ine kattako watataha. Khan uko bebe ra·e mande saksa rimbitari mamung silchidareko ra·bitgija Sivajiko grongna re·baaha. Sivaji uni a·brini killaoni niwataton aro Khan uko grongne re·baengaha ine nikon ua uni ma·gipaona re·ange, haida grongpiltaiani ong·janaba donga ine chanchie una patiatchina bi·aha.

5. Sivaji an·tangni ba·ra ganani ning·o silchidarerangko aro kotip ning·o silchini tupiko ganachim. Ua chola jak ning·o me·konchek ba scorpion minggipa kom·kugipa su·aniko ra·bitachim; uni jakrani jako Waknak ba matcha jakskilrang minggipa silchini matgipa jakskilrangko ganachim. Uarangko chonchongipa jakstem ge·gnichi jaksio kachapachim, uni gimin ua jakkipode

jakstem gegnigitasan nikna man'achim. Afzal Khan Sivajiko grongon ripengskako gita gipakna dakchim unon Sivaji antangko so'otna ba maiko-ba daknasiengakon ine chanchie rang'san uni jakko oe matcha jakskilrangchi uko su'aha aro uni su'aniko saloke uchi so'otaha. Unon rang'san Sivajini manderang jerangan sepango bolgrimo dongnuengachim, chaongkate Afzal Khanni sipairangko dakgrikeaha. Uamang mamung tarisoani dongjani gimin katpilna nangaha.

6. Unon Sivaji uni manderangko a'songgimik. chi re'dile ra'sekroangaha. Gipin Mahratta Nokmarang ua muikai Khanko so'otaha aro uni sipairangko katpilataha knatokaha aro uamang.oni bang'an uni dolo napaha. Ua Hindurangko Muzsalmanrangni jakoniko jokatna re'baaha ine kattako a'songgimikchi gipataha. Uororo Deccanni Pathan rajiranga Aurangzeb baksa dakgrikengachim; uni gimin Sivajiko bamatna chol ong'jachim. Ja'mano Bijapurni raja nangrimgrikaniko dakna draatako man'e saliramchi donggipa pilak Mahrattani a'songrangko Sivajina on'srangaha.

7. Sivaji an'tangan bilakaha ine nikoa Mogulni songnokni mitam songrangkoba ra'sekaha. Iako knao Aurangzeb uni mamatang Shaista Khan minggipako bang'bea sipai kotokko on'e Sivajiko bamatchina watataha. Maina uan Deccano

Viceroy ong'engachim. Ua dal'gipa sipai kotok baksa Poonaona re'baaha. Sivaji indake bilakgipa bobil baksa parake dakgrikna amchakjawa ine u'iaha. Uni gimin saksa Hindu bi'ame cha'gipa gita ganding chindingko ganaha ; indiba uni ba'rani ning'o silchidarerangko, skango jekai dakaha indake ganachim. An'tang baksa seokgimin ka'donggipa pante sak kolgrikko an'tang gita ganate Poonaona re'angaha. Uno bia ka'aona re'enggipa jinma baksa nagrimangpaaha. Jensalo Shaista Khanni dongenggipa nokni sambaona sokaha, uamang rang'san uchina chapinapangaha. Shaista Khan niksoe rang'san kilkiko chokone kataha ; indiba uni jakko kelkioniko ra'e katna skang Sivaji uko srape den'rikaha aro uni jaksi gong'gni chottomaha. Dongtingiparang gam'ako knae cha-baon uamang katangsoaha aro soroko re'enggipa jinmao napangpae brinangahani gimin darangkoba man'rikjaha. Shaista Khan namen kena napaha aro Poonaoni katangpilsrangaha. Sivaji ua a'song jolgimiko jakgitel ong'e re'roroaha ; aro an'tangni bimungo raja ine tangkarangko dakaha.

8. Unon ruutgijan 1664 bilsio Sivaji Surat song-jinmao napaha aro uoni gamrangko saldokna kingking ra'seke ra'angaha. Aurangzeb namen ka'onangbeaha aro dal'gipa sipai kotok baksa Raja Jay Sinha aro Diler Khan minggipa duramongrangko

uko bamatchina watataha. Sivaji ianpako bamdrana nangaha aro uni man'gimin bang'bea killaranko on'na nangaha aro bangkirangkoba Mogulni ning'o jagirdar gitasa nokgipa ong'na on'aiaha. Iani ja'mano Sivaji Bijapurni songnokko ra'sekna Aurangzebko dakchakaha, aro an'tangko inditan mingsingataha, Aurangzeb uko Delhiona re'bachina okamaha. Indiba uan mande ra'changmotna Aurangzebni mangsongani ong'jachim. Jedakode Sivajiko an'tangni jako man'gen uasan uni mangsongani ong'achim.

9. Unon Sivaji Mogulni kachariona, Agraona re'angaha; indiba uno uko inditan namjabee jakkalaha, ua an'tangni janggina kengni ong'a ine rang'san nikaha. Ua sabeenga ine agane an'tangko nok te'sao chipchange dongaha. Aurangzeb uni dongramko an'tangni sipairangchi dongdulataha. Sivaji an'tangni chakkolrangko bang'a mitairangko kokrango ra'baataha aro ra'angpilmitingo ua kokrangoni ge'sao an'tangko ra'atange an'tangna jokani cholko dakaha. Rajani dongramoni jokangarion ua an'tangni ku'simangrangko roke, be'engimiko tap'ra nonge bi'amgipa gita tarie songtangona jokangaha. An'tangni song Raigharona sokangon 1674 bilsio Mahrattarangni raja ine mukutko stikaha.

10. 1675 bilsio Sivaji Mogulni songnokoni

Khandesh Berar aro Gujaratko ra'sekaha aro ruut-gijan Mysore aro Carnaticni pilak killarangko Jinji, Vellore, Bengalore aro Balleryko ra'aha. Jeje a'songrangko ua ra'aha, Chauth kajinako on'na ku'rachakaha. Chauthara man'a kajinani bakbrini baksa ong'achim. Ruutgija ja'mano bilsio sotbongagni ong'on Sivaji 1680 bilsio siaha. Uni ja'mano pilak Mahiatta rajarangba ugita changgipa aro bimchipgipa ong'jaha. Sivajini ja'mano Sambhuji singhasonko man'rikaha. Indiba ua uni pagipa gita ong'jachim. Ua ka'saninggijagipa aro aratgipa ong'achim. Ua Mogulrang baksa dakgikanio chu pekmiting somoco rim'ako man'aha. Aurangzeb uko Mussalman ong'china ge'etaha ; indiba ua una chonnikesa aganchakaha. Unon uni mikgronko wal'chagipa silchi ange kana ong'ataha aro uni sreko rasote dukko on'aha aro chon'kamao uko so'otaha.

11. Sambhujini depanteko Aurangzeb an'tangni noko rakkie donaha aro una Sahu ine bimungko on'aha, jeni ortoara "Kakketgipa" ong'achim. Sivaji aro uni depante Sambhujiko chonnikani pal gita ia bimungko on'aha ; maina Sivaji aro Sambhujiko ua "Cha'ugiparang" ine mingachim. Sivajini depanterangoni saksa Raja Ram minggipa kate joke uko Jinjio raja donaha ; indiba 1698 bilsio ukoba Mogulrang ra'aha.

32. MOGUL SONGNOKNI GIMAANGANI

1. Aurangzebni siani ja'mano uni dal'batgipa depante Bahadur Shah ine bimungko ra' esinghasono gakataha. Indiba ua bilsibongasan sason ka'aha. Uni ja'mano bilsisnimangmangni gisepon Delhio raja sakgitamna agre komijachim. Kachari-ni dal'gipa manderang jerangan uamang'ko raja dona, salone gale sakobara so'otachim. Aurangzebni siani bils chi'gnimang ja'mano 1719 bilsio uamang'ni deritchurangoni saksa Muhammad Shah minggipako singhasono donaha. Ua bils 30 na, 1748 ona bimungmangmangna raja ong'aha.

2. Aurangzebni siani ja'manon dal'dalgipa pro-vincerangni Subadhar ba governorrang Mogulni rajana namedake bamsranga ong'jaha aro province-tango sason nokgipa chong'mot ong'aiaha. Kajinarangko sikagitasan watatrongachim. Kosakode Subadharrang Maharajani ning'o ine chana; indiba chong'motde Delhimangmangnisan raja chong'mot ong'ahachim.


3. Uandaken Nawabrangni kosako Subadhar-rangba bil man'jaha aro an'tangtangan nokgipa ong'ange, bimungnasan Subadharni ning'o ong'achim. Iamang'oni dal'batgiparanga Indiani sal-groo donggiparang Oudeni Subahdar, Bengal aro Beharni Nawab aro salgipengoara Hyderabadni

Subadhar jean Nizam-ul-mulk ine bimungko ra'a aro Carnaticni Nawab ong'achim.

4. Mogulni raja Muhammad Shah 1784 bilsio siaha. Uni ja'mano raja sakgni singhasono gakatachim, indiba bimungna mangmangsang on'g'iaha. Skanggipa mikgri ong'aha aro gnigipa so'otako man'aha. So'otako man'gipa rajani depante Shah Zada minggipa gnangchim. Uni pagipako so'oton ua Oudeni Nawabo katnape chakaha. Iamang sakgnian Clive aro uni sipairang baksa Panipato dakgrikachim ; indiba ama man'aha. Indiba Shah Zada, Shah Alam ine bimungko rae Mogulni raja ong'aha. 1764 bilsio Shah Alam aro Oudeni Nawab Suzadaulah Englishrang baksa dakgrike, Buxar minggipa biapo amsranga man'aha.

Englishrang Shah Alamna bilsiprako lakhbonga tangkako on'e Allahabado songdongchina on'aha. Indake Mogulni songnok bon'srangaha.

MOGUL RAJARANGNI MA·BIDING



33. NADIR SHAH (1739)

1. Aurangzebni siani bilsil kolatchimangni ja'mano Nadir Khan minggipa ra'seke ra'gipa dolni pamong saksa Nadir Shah ine bimungko ra'e Persiani rajani singhasono gakataha aro ruutgijan ua Afghanistanko ra'aha. Ua Delhini moharaja Muhammad Shahona, rajaskana gitan saksa baltigipako watatachim. Indiba uan ra'sekdrae raja dakgipasa ine chanchie krara ra'chaksoaniko mesokjaha. Iani gimin Nadir Shah namen ka'onangbeaha aro uan kakketgipa Mussalman raja ong'ja, mite olakigiparagonikoba Jazia kajinakoba rajaenga, uni gimin sasti on'na nanga ine pa'sike Persiani aro Afghanni dal'gipa sipai kotokko rime Delhiona re'baaha.

2. Nadir Shah putdok changroa aro be'en dal'a, sakgisim aro mikskimrang ritchara, mikronrang rongchinga aro ku'rang mikka kima gitachim. Ua dal'gipa gisingipa mes bigilni cholako kruachim aro uni skoo dal'gipa aro ro'gipa tupi gitchakko stikachim. Uni mikkang bimangan ka'namjasusu dakaiachim. Ua pangnan uni kang'kareo kandikgipa su'aniko aro uni jako dakgrikani ruako ra'bitrongachim.

3. A'bachengo ua bang'bea tangkarangko una on'ode Delhi songjinmako dokjawa ine ku'rachaka-

chim, aro uno napahaoba manderangna mamung dukkoba on'jaengachim; indiba walsao Delhini sipairangni gisepo Nadir Shah siaha ine jangaha aro walo uni mitam sipairangk, so'otaha. Nadir Shah iako knaon namen ka'onangbeaha aro an'tangni sipairangko songjinmako ra'sekchina ge'etaha. Timurni T'artar sipairang jekai dakaha ia Persian aro Afghan sipairangba namen ka'saning-gija dake songjinmani manderangko so'otaha, gamrangko ra'sekaha aro nokrangko so'aha.

Delhini raja, Nadir Shahni ja'ao tugope so'otani-rangko dontongatchina mol'molaha. Unon Nadir Shah dontongataha. Salgipino ua aro uni mande-rang songjinmani pilak gamchatgipa bosturang, ripokrang, jerangko Babarni chasongoni intal chimongbaengachim, ra'tokaha. Shah Jehanni mingsinggipa hira, jeko Kohinur ine minga, do'de bipani singhason aro rajarangni donramoni sonani mukutrang aro gamchatgipa ripokrangko, nambat-gipa mongmarang aro gurerang, kamanrangko aro songjinmao donggipa man'e cha'giparangni pilak gamchatanirangko Persia a'songona ra'angaha.

4. Ua Delhiko wate re'angna skang Muham-mad Shahko singhasono donanguaha, indiba Indus chibimani saliramchi donggipa pilak a'songrangko Persiani songnoko chapataha. Uni re'baachi Delhi-ni rajani bilko be'astrangaha. Mitam governor-

rang bamaniko mesokkuoba bang·batan jakgitel ong·jolaha. Uni songnok Delhi songjinmako wilwile adita mailrangonasan ong·aha.

34. MAHRATTARANG

1. Aurangzebni siani ja·mano Sahuko a·song-tangona watataha aro Mogul rajarangni ning·o donge sason ka·china on·aha. Uni skotonggipa song Satara ong·achim. Indiba ia raja mahamaha dake dongna namnikgipa, neng·na sikkijagipa aro kusi ong·e katchae roanikosan namnikgipa ong·aiachim. Sasonni pilak kamrangko uni Brahman montri jeko Peshwa ine minga, uni jako pakwatachim. Ia montrini kamko paoni deona man·rik-rikatani dakaha. Uni gimin adita ruutani ja·mano Peshwarangsa Mahrattarangko sason ka·chongmot-giparang ong·baaha. Rajade bimungsan ong·aiaha.

2. Sahuni Mogulni kachario dongmitingo Sambhujini jonggipa Raja Ram Kolhapuro donge Mahrattarangni raja ong·engachim. Ua 1700 bilsio siaha aro uni depante Sivaji III raja ong·rikaha, indiba chondugaengani gimin uni ma·gipa Tara Bai rani ong·soaha. Sahu re·bapilon Mahrattarangni giespo dolgni ong·aha. Dolsa Sahuko ra·chaksoaha aro dolgipin Sivajiko namnikachim. Sivajini skotonggipa song Kolhapur ong·achim. Dolgni an·tangtangni gisepo bilonge dakgrikaha

aro jatgimikni nangrime bilakaniko champengaha.

3. Chon'kamao Sahu cheaha. Ua uni gisila gnunggipa Montri Balaji Viswanathni changachi ong'bataha. 1708 bilsio ia Balaji Raoko skanggipa Peshwa ong'china rakichengaha. Ua 1720 ona montri ba Peshwa ong'aha. Uni simano uni depante Baji Rao bilsio 1720 oni 1740 ona Peshwa ong'aha. Uni chasongo Mussalmanrangni bilko champengna gita Mahratta nokmarangni nangrimaniko (Mahratta Confederacy) dakaha aro bilakgipa sipaini pamongrangko bijatchi damprako donaha; indiba uamang Peshwani ning'o ong'achim. Ianoni pangchakesa ruutani ja'mano Nagpurni Bhonsla, Gwaliorni Sindhia, Indoreni Holkar aro Barodani Goekwar ong'baaha. Baji Rao 1740 bilsio siaha. Uni ja'mano uni depante Balaji Baji Rao Peshwa ong'rikaha.

4. Mogulrangni ja'mano ia Mahrattani rajarangan India bilakbatgipa dol ong'aha, maina uamang'ni bil gimikko Peshwa nangrimatahim. Sivajini deritchurang Satarao ba Kalhapuro donggiparangba gipin Mahratta nokmarangni kosako bil man'brejachim. Mahratta Confederacy namedake kimkim ong'jahaoba aro dingtang dingtang nokmarangni gisepo miknenggrikani aro bobil dakgrikani gngangoba Peshwako uamang'ni dalgipa gita maniengpitichim.

5. 1748 bilsiko Indiani itihase dingtangmancha gisik ra'na krabea ; maina ua bilsion Maharaja Sahu siaha aro ua bilsini a'bachengao Ahmad Shah Abdali Indiao napbachengaha. Ua apsan bilsion Hyderabadni Nizam-ul-mulkba siaha. Iarangni a'sel Indiao bang'a bilding bildang ong'anirang dong'aha. Ahmad Shah Abdali changbrina king'king Indiao nape Mogulni dongspa songnokko gimaataha aro bilakbaenggipa Mahrattani bilko be'ataha.

6. Gitangipa napani ja'mano Ahmad Shah an'tangni depante Timurko Punjabo sason ka'china donangaha. Delhini rajani dal'batgipa Montri Ghaziuddin Mahrattarangni dakchakaniko bi'aha. Balaji Baji Raoni jonggipa Raghoba re'bae Delhiko ra'aha. Uoni ua Punjabchi re'angaha aro Timurko a'rikate Punjabni province gimikko man'aha. Ia somoeo Mahrattarangni songnok Indiani saliram gimik ong'nasipile salgrochi Himalayaoni salgipengchi Deccanni bon'chotaona king'king ong'aha aro ua gita bilko rakina man'ode India gimik changsa Hinduni songnok ong'taiani chol gnangchim. Indiba Nokgipani donsoa indake ong'jaha.

7. Punjabko ra'aha inc knaon Ahmad Shah ka'onangbeaha aro dal'gipa sipai kotokko rime 1759 bilsio Indiao naptaiaha aro Oudeni Nawab aro

Rohilarang baksa ku'monge uamang'ni chakaniko man'aha. Ian Hindurangni Mussalman rajarangko chon'kame dal'batgipa warachakani ong'aha. Ia dal'gipa kotokrang 1761 bilsini January jao Panipat Dakgrikram biapo gronggrikaha. Bilongbea dakgrikani ong'aha aro lakhna bate manderang so'otako man'aha. Chon'kamao Mahrattani sipairang amsrangako man'aha aro bilding bildang ong'aha. Uamang'ni Peshwa ia dukko knaon namen ka'a be'aha aro ruutgijan siaha. Uni simano uamang'ni nangrimani be'aha, aro Englishrangna cholko oaha.

35. AHMAD SHAH ABDALI (1761)

1. Mahrattarangni bil bon'angachibara salgroni Afghanrang India napbaaha. Uamang'ni dilgipa Ahmad Shah Abdali ong'achim. Mogulni bilakbatgipa rajarangni chasongo, Babaroni Aurangzebona kingkingan Afghanistan uamang'ni ning'o ong'achim aro Mogul rajarangni nambatgipa sipairanga uamang'an ong'achim. Indiba Aurangzebni siani ja'mano Persiani Shah ua a'songko man'aha.

2. Persiani raja *Nadir Shah* uni ning'o kam ka'giparangni jakchi so'otako man'aha. Ahmad Shah Abdali uamang'oni saksa ong'achim. Nadir

Shahni ja'mano ua Kandaharoni ong'onbaaha aro 1748 bilsio Punjabo napaha. Ua changdokna kingking re'bataitaie bang'a mite nokrangko so'aha aro mitamko uaiango matchurangko so'ote ong'siataha. Ua a'bachengo a'songko ra'jaha; indiba gamrangko ra'seke mande so'ote aro nok songrangko so'e songtangona re'angpilaiachim.

3. 1751 bilsio ua Punjabona re'bataie uko ra'srangaha. Indiba Delhiko sason ka'enggipa rajani montri Ghaziuddin Lahoreona dobae uko ra'aha. Iako knae Ahmad Shah Abdali Delhiko 1756 bilsio gaskaaha. Uno bang'bea manderangko so'ote songjinmako ra'aha. Uko ra'mano ua Hindurangni rongtalgipa songjinma damsa Muttrako ra'sekaha aro unoba ka'sanninggija bang'bea manderangko so'otaha. Ruutgija salrangni gisepo uni sipai kotokni gisepo sajinma napaha aro bang'en gimaatako man'aha aro songtangchi katangpilna draatako man'aha.

MUHAMMEDAN PERIOD

Somoigita Sulsul Ong'anirang— (A.D. 622-1739)

(Line of Time)

1. Muhammadan Toromni
ong'katchenga .. A.D. 622
2. Mahmud of Ghazni .. „ 997-1030
3. Muhammad Ghorī .. „ 1190-1206
4. Turki aro Afghan Rajarang .. 1206-1526
5. Timur Lane-ni rebaa .. „ 1397
6. Panipato Dakgrikani .. „ 1526
7. Babar .. „ 1526-1530
8. Humayun .. „ 1530-1556
9. Akbar .. „ 1556-1605
10. Jehangir .. „ 1605-1627
11. Shah Jehan .. „ 1627-1658
12. Sivajini atchiani .. „ 1627
13. Englishrangni Madrasko man'a .. 1639
14. Englishrangni Calcutta ko man'a .. 1640
15. Aurangzeb .. „ 1658-1707
16. United East India Company Daka 1708
17. Englishrang Bombayko man'a .. 1662
18. Sivajini raja ong'a .. „ 1674-1680
19. Nadir Shah India o napa .. „ 1739
20. Ahmad Shah Abdali (Durani) .. 1761

Bak III. ENGLISHNI CHASONG

36. ENGLISHRANG INDIAONA MAINA
RE·BAAHA ARO MAIKAI FRENCHRANG
BAKSA DAKGRIKAHA

1. English manderang Indiaona badingnasa re·bachengaha. Uamang je bosturangko Europeo man·na amja, uarangko brena aro jerangko India man·na amja uarangko palskana re·baaha. Mi, jal·ik, kil, niri, e·ching, mosla, narikel aro poppy jeoniko apingko daka aro grit jeoniko chiniko bikota, England gita sin·gipa a·songo chaja aro skangni salrango kilni aro resemini ba·rarang Englando dakarangna bate Indiao dakgiparang nambatachim. Indiba ia badinggiparang Indiaona mokmol aro kimilni ba·rarang, tamani sil, ba·ra, silgrak aro silchini bosturangko jerangko ia a·songo man·na amja uarangko ra·baskaachim.

2. Bilsi ritcha gitamna bate re·angaha, sak ritchasa English badinggiparang India baksa badinggrikna mangsongaha. Englandni Rani Elizabeth uamang·ko indake dakna bilko on·aha. Uamang saliramni sagal rikamo, Suratona uamang·ni jahatrangko watatchengaha; maina uan Mogul songnokni mongsonggipa jahat karam ong·achim. Uamang an·tangtangko East India Company ine mingaha. Ia Badinggiparang, ja·mano

sagal rikamni adita songjinmarangko man'aha. Uarang'oni mongsonggipa songgitamara Calcutta, Madras aro Bombay ong'achim. Iarang unomitingo chongipa gitimrangan ong'achim; indiba ua sal intal dal'rorobaaha aro da'o Indiao man'e cha'batgipa aro dal'batsranggipa songjinmarang ong'aha.

3. English East India Company inditan lapko man'aha, gipin English badinggiparangba Company rangko dakaha aro apsan daken India baksa pading-aha. Ja'mano, bilsil ritchasa batangmano ia pilak Companyrang nangdimtokaka aro ge'sa dal'gipa Companyko dake uko United East India Company ine bimungko donaha. Englandni raja uamang'-nasan India baksa badingeani bilko on'aha.

4. Europeni gipin jatrangba badinggiparangko Indiaona watataha. Uamang'ara Portugueserang, Dutchrang aro Frenchrang ong'achim. Frenchni mongsonggipa songjinmara Madrasni salgipengo donggipa Pondicherry ong'achim.

5. Bilsil 200 mang re'angaha, Europeo English aro French manderangni gisepo dakgrikani ong'ka-tahachim; uni gimin, a'gilsak gimikon, jeo English aro French manderang donga saksa sakgipin baksa dakgrikna a'bachengaha. Dolprakan dolgipinko Indiaoniko a'rikatna joton ka'aha. English aro Frenchrangni gisepo dakgrikania bilsilol'grikmang-

na dongachim, aro chon·kamao Englishrang amaha. Frenchrangni dolchi mongsong dilgipara Dupleix aro Englishrangchi dilgiparang Lawrence aro Clive ong'achim.

37. ROBERT CLIVE, INDIAO ENGLISHNI BILKO MANCHENGGINA



Robert Clive

1. Robert Clive Indiao donganggiminrangni gisepo mingsingbatsranggina English manderangoni saksa ong'achim. Ua'bi'sa chonbemitingo noktangan gipin bi'sarang baksa inditan dakgrikna namnika, unipagipa uko maian dakpilgen u'ijachim. Uni gimin ua uko skulchi watataha. Skuloba ua

dakgrikana agre mamungkoba dakjachim. Gipla chongipa bisarangni dolni skotong dake, ro'ong-rangko ra'bite, gitimoni dokandairang baksa dakgrikaniko dakachim aro uamang na mamungkoba on'jaode uamang'ni kelkirangko be'atachim.

2. Changsao ua skulo dongmitingo, dokan gesako rim'aha aro an'tangni be'enchi chikareko tupenge chiko ditate uchina chiko jokatachim aro uko mrikatachim. Skulni skigiparang uno dongani mamung namgni dongjawa ine aganachim; uni gimin ua skulko watarin uko gelna gita uni pagipa uko Indiaona watataha.

3. Dambegipa Robert Clive Madrasona rebachengon, una setimzipani kamko on'aha. Ruutgijan ua ua kamko neng'nikaha aro jensalo Frenchrang baksa dakgrikani a'bachengaha, ua inditan name dakgrikaha, Madrasni Governor uko nisan de'timgipa ba sipai kotokni chongipa officer dake donataha. Ua ruutgijan gipin manderangko maikai name dilna man'a mesokaha. Ua kenani salo kadingachim aro kena maia u'ijachim. Songpangni sipairang uko namnikbeachim aro Clive uamang'ko dilode jechiba re'achim. Uamang uko 'Sabit Jang' ba dakgrikao kimkingipa ine mingachim.

4. Frenchni dilgipa, "Dupleix namen gisik seng'gipa ong'achim, aro ua Indiaa ruuta bilsi-

rangna dongaha. Ua English badinggiparangko Indiaoniko a'rikatna am'aha, jedakode Frenchrang pilak badinganirangko man'tokgen. Uo hajalbri songpangni sipairang dongachim; jeko 'Sepoys' ine minga, jerangko French dilgiparangchi dakgrikna tariachim.

5. Skangde Frenchrang Englishrangna bate bilakbatachim. Dupleix Madrasko ra'aha; indiba dikdiksani ja'manon Major Lawrence sakaa ka-donggipa English dilgipa Englandoni sipairang baksa ong'katbaaha aro uko rikataha. Unon tom'tomgrikaniko dakaha aro English aro Frenchrang mikkangpara saksa sakgipin baksa dakgrikangkuna man'jaha.

38. ARCOTKO RIM·ANI (1751)

1. Frenchrang Englishrangko parake dakgrikna man'jahaoba Dupleix Englishrangko Indiaoniko arikatna uni mangsongako watgalkujachim. Ua uni sipai kotokko rakiengpiti aro Englishrangko dakgriktaina man'jana kingking, uni mande-rangna dormahako on'na man'na gita, ua songpangni saksa raja Chanda Sahib minggipana uko dakchakna uamang'ko bhara on'aha, jean Carnaticni songnokko ba Indiani salgipengni dal'gipa a'kaweko sakgipin raja Muhammad Ali

ra'sekna joton ka'engachim. Chanda Sahibni skotonggipa songjinmara Arcot ong'achim aro Muhammad Alini skotonggipa songjinmara Trichinopoly ong'achim.

2. Chanda Sahib, Frenchni dakchakako man'e, Muhammad Aliko katataha aro Trichinopolyo chipchangaha aro ua songko changdulaha. Muhammad Ali uni bobilrang una bate bilakbata ine nikaha aro Madraso donggipa Englishrangna seataha aro uko dakchakchina mol'molataha.

3. Madrasni Governor rang'san bang'gija sipai kotokko adita cha'ani aro silchidarerang baksa Muhammad Aliko dakchakchina watataha. Ua-mang'ko Ensign Clive dilangachim, jean Trichinopolyona Frenchni sipairangko dakgrikjoljolang-achim aro ua inditan ka'donge dakgrikaha, uko Captain ong'ataha. Muhammad Ali ruute rakkina man'angjawaha ine ua English Governorna aganaha aro nambatgipa cholara Arcotko ra'na sipai kotoksako watatna ong'achim; maina Chanda Sahib an'tangni skotonggipa songjinmako ra'aha ine knaode Trichinopolyko wate re'anggan ine ua aganaha.

4. Englishni Governor, jekae Clive aganaha uandaken dakaha. Ua sipai sak ritchabongakosan watatna man'achim, English sipai sak 200 a'song-tangni sipai sak 300, aro uamang'a iana skang

dakgrikchong motao darangba dongkujachim. Indiba uamang Captain Clivena chu'ongachim. Arcotona sokna saldok nangachim, jean Madrasoni mail sotsni chel'achim aro uni manderangko iana skang name drill ka'kujani gimin re'angengmitingo salanti uamang'ko drill ka'atjolangaha.

5. Clive Arcotona cholguga samsachi gita napangon Chanda Sahibni sigairang cholguga samgipinko ong'kate katangskaha. Ua ua songjinmao donggipa manderangko ka'sae jakkalaha aro uamang'o donga mamungkoba indin ra'e katjaha aro uni manderangna ra'bara cha'anina ua damko name on'achim. Jensalo Arcotni manderang Clive maikai ka'sae dakgipa ong'a ine nikaha, uamang uni pilak nangarangko ra'bae on'tokaha aro killani pakmarangko, jerangan gitchambeaha aro mobeahachim, taritaina uko dakchakaha.

6. Chanda Sahib an'tangni skotonggipa songjinma Areotko ra'aha ine knaha aro uni depante Raja Sahibni ning'o sak hajalchikung sipairangko uko ra'pilchina watataha; tiktak Cliveni agansoaha gitan ong'bebeaha. Raja Sahib indinsa killako rapilna jagnina kingking joton ka'aha. Uni manderangko dilbaa changantian Clive aro uni ka'donggipa sipairang uko amataitaiachim. Killani ning'o donggipa nanderang adhana baten siaha aro chon'kamao uamang'o bang'gijasan cha'ani

dongaeahachim. Indiba saksaba an'tangko on'na chanchia dongjachim. Cliveni gisikan sakantion gapaha. Songpangni sipairangba Englishrang gitan apsan ka'donge dakgrikaha. Jensalo cha'anirang dongangsrangjaha, mi kakketko English sipairang-na on'china aro uamang'na mini men'dikosan on'aichina mol'molaha,maina uan uamang'na chu-onggen ine uamang aganachim.

7. Ja'manki'tiko English Governor bang'bata mandetangko Cliveko dakchakna watataha. Uamang'ni re'baengako niksoarion Raja Sahib katsoaha. Indiba Clive uko biapsaoni biapsaona rikroraaha aro uko inditan kenataha chon'kamao ua dakgrikan donge on'jaha, indiba Clive re'baenga ine knarion kataiaha.

8. Major Lawrence aro Clive unon Trichinopolyona re'angaha aro bilonge dakgrikani ja'mano Frencharangko a'rikataha. Uamang Muhammad Aliko Carnaticni raja dakaha. Chanda Sahib Tanjorona katangaha aro ua a'songni raja uko so'otaha ine chanchichipa.

9. Captain Clive Englandchi re'angon Englandni raja uko sipai kotokni Colonel dakaha. East India Company una £500 gamchatgipa tonu-alko on'aha. Ua man'e cha'gipa aro mingsinggipa ong'aha aro uko 'Hero of Arcot' ba Arcotni Ka'donggipa ine mingsingaha.

30. SIRAJ UD-DOULAH ARO MIR JAFAR



Siraj-Ud-Doulah

1. Indiani salgipengo Arcotko rim'ani
 ja'mano bakan Bengalo, jean bimungmang-
 mangnade Mogulni songnokni ning'o ong'engpiti-
 chim, Siraj-Ud-doulah ba A'songni Chaki
 minggipa pante saksa singhasono gakatdaldale
 sason ka'engachim. Uko Nawab mingachim.
 Ua bilsu kolgrikbonga ong'engpitichim aro name
 dal'atako man'jachim. Uni pagipani nokonin
 ong'katrongbrejachim aro uni ma'gipa jekoba
 ua bi'bo on'aiachim. Ua bilgrigipa, ka'saninggi-
 jagipa, aro skatangko dakgipa ong'achim, aro raja-
 ni nokni a'paloni a'gilsakni gimin mamungkoja

u·ijachim. Ua Calcutta man·e cha·gipa songjinma ong·a ine knaaha aro uko ra·seke ra·na sikachim.

2. Uni singhasono gakatani ruutgijan ua English rangko uamang·nikillani pakmarangko pe·e galchina ge·etaha, aro Jensalo uamang indake dakjawa ine aganaha, ua 50,000 sipairangko rimbite Calcuttaona re·chakatangaha. Killao Englishrang sak 170 san dongachim aro uamang·ni kosako Clive gita ka·donggipa dilgipa dongjachim. Uamang adita salrangna namen warachakaha, unikoa me·chikrang aro bi·sarangko chibimaona uamang·ni jahatrangona watataha, Jahatrang choe katangaha aro dongrikgipa me·asarang killako wate on·aha aro uamang·ko rim·gitange patoko chipaha.

3. Siraj-ud-doulah songjinmak, uni sipairangni pamong saksani jako donange an·tangan re·angaha. Calcuttako rim·ania dambegipa Nawabna dal·begipa chu·sokani ba cheani ong·ahachim aro ia cheanichi ua Englishrangko Bengaloniko a·rikataha ine ua chanchiachim. Ian gualani ong·achim ; maina uamang sagalo bilakbatgiparang ong·engpichim aro bang·bata sipairangko aro nangnirangko Englandoniko ba Indiani gipin bakranganikoba pangnan ra·bana man·achim.

4. Calcuttako gimaataha ine Madraso knasoa·haon uno donggipa manderang duk ong·aha aro, ka·o nangbeaha. Colonel Clive gital sipairang

baksa Englandoni pil·badaldalchim. Ua rang·sar Bengaolna chochakatangaha, indiba unona sokna jagitam nangachim maina unororo jahatrang aro reilrang dongkujachim. Da·ororo jahato re·ode salbrisan aro reilo re·ode salgnisan nangachim. Calcuttaona sokon Clive mande saksakoba gima-atgijan uko ra·pilaha. Clive Bengalona re·bapilaha aro Calcuttako ra·pilaha ine Nawab knaon ua kenna a·bachengaha. Ua singhasono gakata bilsisasan ong·engpitioba uni sason namjani gimin manderang neng·nikengahachim aro uko watna sikahachim. Uni manderangoni mitam gipinko raja songskana gita sriksrik ku·mongrikaniko dakengachim. Uamangoni dilgipara uni dal·batgipa sipairangni pamong, Mir Jafar minggipaan ong·achim. Ua Siraj-ud-doulahko dakgrikode ua un baksa nangrimpagen ine Clivena seataha.

5. Unon Clive an·tangni sipai kotok baksa Calcuttaoni salgrochipak re·chakatangaha. Uo English sipairang sak 1000, songpangni sipairang sak 2000 aro kaman pong 10 san dongachim. Nawabode ja·chi re·gipa sipai sak 50,000 gureo gakatgipa sipai sak 18,000 aro kaman pong 50 dongachim. Uamang PLASSEY minggipa biapo 1757 bilsio dakgrikaha. Mir Jafar an·tangde Englishrangko dakchakbeade ong·jaha; indiba sachi amgen ukosa srisrik nie dongachim. Mir

Madan minggipa Sira-jud-doulahni ka'dongna man'batgipa dilgipaan an'tang-ni gureni sipairangko Englishrangchi chaprakdilaha ; indiba rang'san guli nangako man'e siaha aro uni manderang bilding bildang ong'srange katbildangaha. Clive unsalo amsrangaha aro bang'gija sipairangkosan gimaataha. Atamo Siraj-ud-doulah kataha ; indiba Mir Jafarni depante, Miran uko rikroroaha aro ja'mano rim'a man'e uko sa'otaha.

6. Ruutgijan Colonel Clive Songtangona re'angpilaha aro raja una Lord upadhiko on'aha aro Songtango dal'gipa manderangoni saksa ong'aha. Warren Hastings 1772 bilsio skanggipa Governor General ong'e Indiaona re'baaha. Ua East India Companyni sason ka'ani niamrangko nambatatua joton ka'aha. Unbaksa kamko ka'na gita England. oni sakgitam Councilrang re'baaha. Iamang India-ni obostako tale uigipa ong'jachim aro unbaksa melie kamko ka'na amjaha. Uamang ku'cholsan ong'jae Warren Hastingsni kosako mokordomako ra'baaha. Indiba chon'kamao Warren Hastings cheaha. Uni sason ka'mitingo mongsonggipa dakgrikania Mysoreni Hyder Ali baksa ong'achim. Ua 1785 bilsio sontangona re'angpilaha.

Mir Jafar name sason ka'jahachim. Ua an'tang-na mahamaha dake kusi ong'e roanikoson am'aha. Uni gimin Englishrang uko gale uni chawari Mir

Kasimko Nawab ong'atskaha; maina uororo Englishrangan bil manbatsranggipa ong'engachim. Uaba ruute sason ka'jaha: bilsigitam ba bilsil brimang sason ka'ani ja'mano, ua English mande-rang baksa dakgrikna aro uamang'ko a'rikatna mangsongaha. Ua gipin songsulni rajarang baksa ku'monge Englishrangko dakgrikaha. Unbaksa Mogulni raja Shah Alam aro Oudhni raja Shujad-doulah dakgrikpaaha. Indiba 1764 bilsio Buxar minggipa biapo uamang'ko amsrangaha.

7. Irani ja'mano Lord Clive Governor ong'e Bengalona rebapile Mogulni Maharaja Shah Alam baksa 1765 bilsio nangrimgrikaniko dakaha. Ia tik kagrikanio Englishrang Bengalko man'srangaha. Uoni dal'roroe Bengal Presidency ong'aha. Iana skang Madrasni salgrochi donggipa Northern Circar minggipa a'songko Frenchrangoniko man'aha; uaba dal'roroen ja'mano Presidency damsa ong'pilaha. Cliveko India Englishni bilko man'chenggipa ine mingrongaha.

40. MYSORENI HYDER ALI

1. Mysoreni chugipa a'songa, Eastern aro Western Ghatrangni gisepo aro salgipengchi Nilgirini a'brirang unga. Uno donggiparang Canarese manderang ong'a aro uamang'ko a'songtangni rajarangan sason ka'achim aro uko dakchak-

gipa ministerrang gnangchim. Ua Hinduni songnok ong'a; indiba bilsu sotbongamangna Mussalman raja sakgni, Hyder Ali aro uni depante Tippu Sultan sason ka'aha.



Hyder Ali

2. Hyder Ali bilsu 1722 mango atchiaha. Uni pagipa saksa kangalbegipa Mussalman ong'achim. Ua sena ba poraina changja. Ua sipai ong'e an'tangni-janggi tanganiko a'bacheng-aha. Ua adita chongipa manderangni pamong ong'achim. Indiba ua uamang-na dormahako on'gija uamang'ni ra'seke man'gimin gamrangko suale on'achim. Uamang gitimrangona re-ange mes dobokrangko, matchurangko mi misirangko aro je man'a bosturangko ra'seke ra'rongachim. Ra'sekgiminrangoni samsako an'tang ra'rongaha aro samsako an'tangko ja'rikgiparangna suale on'aha.

3. Adita bilsirangni ja'mano uko ja'rikgipa manderang bang'oroaha aro killa damsako ra'sek-na man'ahachim. Unon ua an'tangko saksa raja ine minge an'tangni manderangko sipai dakate silchi-

darerangko on'aha aro drill ka'aha. Mysoreo sason ka'gipa Hindu raja uni gimin knaaha aro uko okame an'tango kam ka'ataha aro uni sipairangna dormahako on'na man'na gita una dormahako on'aha. Ua mane cha'gipa aro bilakgipa ong'rorobaaha aro ja'mankitiko Mysoreni sipai kotok gimikni dilgipa ong'aha.

4. Unomitingo Mysoreni raja chonenga aro dambeengpitichim, uni gimin uni mamatang ua dal'kujanakingking sason ka'engachim. Mainiba a'sel mamasa jegrikani ong'aha aro Hyder raja bi'sachi chaka dake bilgimikko an'tangni jako ra'aha aro rajani bimungo sason ka'aha. Aditani ja'mano rajako sriksrik patoko donate an'tangan Mysoreni raja ba Saltan ine Singhasono gakat-aha.

5. Ua Mysoreo bilsa 22 na sason ka'aha aro ia salrango Deccanni Mussalman raja baksa, jeko Nizam mingachim aro Carnaticni Nawab Muhammad Ali baksa aro Mahrattarang aro Englishrang baksaba dakgrike an'tangni janggi tangniko re-atangaha. Ua Mysoreko jekae ra'aha, uandake Indiani salgipeng gimikko ra'na sikachim, aro Englishrang dongjaode Muhammad Alini songnokko man'genchim, maina Hyder Ali una bate ka'dongbata, bilakbata aro nambata sipai kotokrang gngangchim. Indiba indake ra'na man'jaha,

maina jensalo Hyder Muhammad Aliko dakgrika Englishrang una chakachim.

6. Changsao Hyder an·tangni gureni sipairangko rime Madrasni sepangrangona kingking a·kawejolgimikko ra·sekdileaha. Bang·bea mande-rangko so·otaha, matchu matte aro mi misirangko ra·seke ra·angaha aro nok songrangko so·aha, Englishrang Madrasni Fort St. George·onin wa·al-rangko nikatna man·achim. Ua indita sepangona re·bana ka·donggen ine English manderang chan-chijachim aro uamang·ko warachakna chu·onga gita sipairangba uamang baksa dongjachim. Uni gimin Calcuttaona Governor Generalna u·iataha aro Warren Hastings, Sir Eyre Coote baksa Bengaloniko sipairangko watataha aro uamang Hyder Aliko sepangoniko a·rikataha. Hyderni sipaiiangni ka·sanninggijani kamrangko ruuta salrangona kingking Carnatic jolo donggipa man-derang gisik ra·achim.

7. Uamang adita salrangna tom·tom dongaha ; indiba jensalo Englishrang Maheko Frenchrang-oniko ra·na joton ka·engachim, Hyder Ali uko on·jaha, maina ua uni songnokni ning·o ong·achim. Uni gimin English baksa dakgrikani ong·taiaha aro bang·a chang dakgrikani ja·mano Englishrang amaha. Hyder Ali 1782 bilsio siaha ; indiba uni

depante Tippu Sultan Englishrang baksa dakgrik-
anguachim.

41. TIPPU SULTAN

1. Pagipa Hyder Alini siani ja'mano Tippu Mysoreo raja ong'rika-chim. Ua uni pagipa gitan ka'donggipa ong'a, indiba ugita gisik gnanggipa ong'jachim. Ua bilsa 25 na sason ka'aha. Ua Hinduranko Mussalman ong'draataha; uni pagipa antangan Mussalman ong'oba indake dakjachim aro Hinduranko toromtangko manina aro bewaltangko jarikna mamungba champenganiko dakjachim.



Tippu Sultan

Indiba Tippu Mysore aro uni wilwilao donggipa manderangko Mussalman ong'ataniara uni kam ong'a ine chanchiachim aro uamang ra'chakjaode uamang'ko so'otachim.

2. Tippu English manderangko mitchia; maina ua uni pagipani sipai kotok baksa ua dakgripa'achim aro uamang Carnatic-ko ra'e, uni kosako raja ong'gnioniko uamang'an champenggipa ong'a

ine ka'o nangbeachim. Ua Englishrang baksa joljol dakgrikjaha ; indiba saliramni Ghat'o donggipa Coork-ni Hindu songnoko nape bang'bea manderangko so'otaha aro bang'bea manderangko Mysoreona rim'gitange ra'baaha. Una agreba ua Saliramni sagal rikam jolrangona re'ange Malabar aro Canarani songrangko ra'aha. Ianoba ua namen ka'saninggija kamrangko dakaha aro bang'beakon Mussalman ong'draataha. Malabarni skotonggipa songjinma Calicuto donggipa mitam badinggiparang Tippuni bi'a gita bang'a tangkarangko on-jachim. Uni gimin ua uamang'ko sagalni jatchio donggipa dal'begipa rong'brakona watatachim aro okkrie sijana kingking unon donachim. Indaken bilsichetmangni ja'mano, Tippu bilakrorobaaha. Ua gaora de'gipa ong'aha aro an'tangan India bilakbatsranggipa raja ong'a ine chanchiachim. Ua chel'bee salgipengchi Travancoreona ong'onangaha aro ua songkoba ra'na joton ka'aha. Travancoreni raja namen kenbeaha. Ua Tippu gita bilakgipa raja baksa dakgrikna amjawa ine u'iachim aro Coorg aro Malabarni manderangko maikai ka'saninggija jakkalachim, uko ua knaman'aha. English manderangna agre'una dakchaknasingipa dongjachim ; uni gimin ua Tippuoniko jokatchina mol'mole chiti kingsako uamang'na seataha.

3. Warren Hastings 1785 bilsio Indiako wate re'angaha aroꝓuni ja'mano Lord Cornwallis India Governor General ong'rikaha. Ua Tippuna Travancorko mamungba jakdangdikjachina seataha, indiba jensalo Tuppu mamungba knachakjaha Englishbrang unbaksa dakgrikani ongaha.



Warren Hastings

Ia dakgrikanio Nizam aro Mahrattarangba Englishrangchi chakpaachim ; maina Tippu mai-kai bilakrorobaengachim uko nikaha aro Travancoreko ra'manode uamang'koba ra'gen ine uamang'kenahachim. Lord Cornwallis an'tangan

Calcuttaoni Madrasona re'bae Mysoreni a'bri-rango Englishni sipairangko dile Tippuko ki'sang ki'sang rikaha. Nizam aro Mahrattani sipairang mamungnaba choliachim, maina uamang dak-grike man'gimin songranganiko ra'seke ra'nanan charoroaiachim aro dakgrikanikode English sipai-rangan dakaiachim.

4. Englishni sipai kotok Bangaloreko ra'c Tippuni skotonggipa song Siringapatamona re'-chakatangaha. Uan Mysore songjinmani sepang aro uko Kaveri chibima jokdulachim. Englishni slairang songjinmani pakmarangko ga'akatna a'ba-chengon uni songjinmako ruutgijan ra'chongmot-gen ine Tippu nikaha aro tom'tomgrikna mol-molaha.

5. Tom'tomgrikaniko dakon Tippu pilak dak-grikani korosrangko on'na nangaha; uan crore gitam ong'achim aro uni a'songni samsako on'na nangaha, ukoa Nizam aro Mahrattarang baksa Englishrang suale ra'aha. Englishrangna agre gipinrang man'pana krajachim, maina uamang dakgrikchong'motpagipa ong'achim. Iano Englishrang Malabarko aro Madura aro Salemni a'song-rangko man'aha.

6. Iani ja'mano 1793 bilsio Lord Cornwallis songtangchi re'angaha aro Sir John Shore India Governor General on'grikaha. Uni' dong-

mitingo mamung dal'a obosta dongjachim ; maina Tippu bilsisnimangna tom'tom dongaha. Uni ja'mano, Lord Wellesley 1798 bilsio re'baaha.

Tippu bilsisni tom'tom dongani ja'mano Englishrangko dakgriktaina mangsongaha. Ua Englishrangni bobil Napoleonna re'bae uko dakchakchina chitiko seataha aro Englishrangko Indiaoniko a'rikatna gita Muhammad Alikoba unbaksa dakrimpachina sing'ataha. Lord Wellesley Calcutaoni ong'onbae uni sipai kotok baksa Mysoreona re'angaha. Tippu skanggitan Seringapatamo chipchange dongachim. Ruutgijan Englishrang songjinmako ra'aha aro Tippu ua dakgrikaon so'otako man'aha. Mysoreni je bakan skangni Hindu rajani songnok ong'achim ua bakko raja gitcamni deritcharangoni saksana on'pilaha. Uni bimung Krishna Rajah ong'achim. Uan 1799 bilsio ang'achim aro untal ua Hindu rajani songnok ong'taiaha.

7. Lord Wellesley ni sason ka'mitingoniko mingsako gisik ra'na nangani gnan, cong'motan ua Subsidiary System-ko dakangaha. Iachi bang'a songnokrangko Englishrangni ning'o chapataha. Je rajaan iako ra'chaka, Englishrangko uamang'ni kosako dal'batgipa bil ine ku'rachakna nanga aro watako man'gija gripin bilrang baksa mamung ku'mongrikaniko ba dakgrikaniko dakna man'ja-

chim aro dakgrikani somoio Englishrangko dakchakna nangachim. Indiba gipinni ra'sekgnioniko Englishrang chelchakgenchim aro una sipairangko rakiani korosko raja on'na nangachim.

42. ENGLISHNI SASON KA'NA SKANG INDIANI OBOSTARANG

1. Mogulni raja bilakgipa sakdokni ja'mano uamang gita India gimikko tom'tome rakina gita bil chu'onggipa raja saksaba dongjachim. Uni gimin Aurangzebni siani ja'mano bilsu 100 mang ong'nasipile Indiani pilak bakon kenbeani aro so'sonjengjeng ong'anisan ong'achim. Bang'bea Hindu rajarang Mussalmanni Nawabrang baksa dakgrikjringaiachim. Uni kosakoba salgrochini kengnigipa Afganrang aro Persiani nokmarang Hindustanni a'kawerangona re'bae gamrangko aro matchu matterangka ra'seke, nokrangko songrangko so'e aro manderangko so'ote katangrongachim. Aro indakgiparangko champengna gita bil chu'onggipa raja saksaba dongjachim aro ku'monge warachakna gitaba raja saksa raja sakgipin baksa ku'mong nangrimanian grichim.

2. Deccan aro Indiani bijatchi jolo Mussalman aro Hindu rajarang dandikgijan dakgrikrangkam-

aingachim. Hajalni hajal manderang so'otako man'aha aro bang'bea a'arangko gamgija galchipna nangaha. Mahrattani gure gakatgipa ra'sekgiparang tokni tok a'songgimikchi re'roroe mi misirangko uamang'ni gurerangna den'e on'achim aro manderangko so'ote uamang'ni gamrangko ra'seke ra'angachim. Unomiting salrango gitimantion bilakgipa guarerang aro bu'suchi kadulanirangko ra'seke ra'giparagoniko rakina gita donrongachim. Gamgiparang tonual ba gipin dakgrikani silchidarerangko ra'bitesa a'batangtangona re'angachim, jedakode je somoioba ra'sekgiparangko dakgrikna man'gen. Bang'a biaprangon chugipa borangrangko chue rike uarango manderang pangnan dongtime niwatsoachim aro ra'seke ragiparang re'baengako niksoode mailsa chelaona knagipa dalgipa damarangko dokatachim, unon a'bao kam ka'gipa manderang rang'san gitimni guare ning'chi nape katachim. Bilakgipa re'rikgiparang gri gipinchi songre songgabatna man'jachim aro pilakchina re'ani ramaba jokani dongjachim. Skango jakkalgimin ramarangko galchipaha aro barangba uarangha simsakgipa dongjahachim.

3. Indiani salgipeng ka'masrangchia an'ching jekae nikbaman'aha, Hyder aro uni ja'mano Tippu Pilak wilwilachikon an'tangni gureo gakatgipa ka'saniggijagipa dalarangko rime nokrangko so'e,,

gamrangko ra'seke aro manderangko so'ote so'so
engjeng ong'atachim.

Indakgipa obostao India gimikan a'gisi ong'gen-
susu aro banga biaprangon mandean saksaba
dongpiljawahasusu nikachim.

43. MAIKAI ENGLISHRANG INDIAKO SASON KA·GIPA ONG·BAAHA

1. Lord Wellesley ni Indiaona re'bana skang
English Indiakosason ka'na mangsongani dong-
kujachim. Mitam a'arangko ba songrangko man'a-
haoba ra'na draatako man'ahani giminsa ong'aha ;
maina basakoba basakoba songpangni rajarang
uamang'ko dakgrikaha aro a'rikatna joton ka'aha
aro dakgriko amahaon korosni pal gita a'rangko
on'na nangahachim. Maina uamang'ni mang-
songara tom'tome badingnasa ong'achim. India
tom'tome songdonganiko aro badinganiko ia
somoio ra'baatna nangode, ra'seke ra'giparangko
aro so'otanirangko dontongatna man'na gita
bilakbatsranggipa, pilakko bamatna man'gipa sason
ka'gipa dongna nanggenchim. Ia somoio indake
bil gnganggipara Englishrangsan ong'aiachim.
Uandake tom'tomataninasa Englishrang sason ka'-
na a'bachengaha. Lord Wellesley Subsidiary
System, ba Subsidiary Alliance ine jeko minga,

uno napchina bang'a rajarangna seataha. Hydarabadni Nizam Mahrattarangna kenani gnangchim, uni gimin rang'san ra'chakaha aro uni a'songko rakina gita Englishrang bilakgipa sipai kotokko donaha. Tippuba indake ku'rachakpaode da'ona kingking uni deritchurang Mysoreo sason ka'kuenggenchim. Mitam Mahrattani rajarang a'bachengo ku'rachakaha; indiba ja'mano an'tangtangni ku'rachakakon pe'pile Englishrangko dakgrikachim. Uamang iani ja'mano bils kolgrik-mangna kingking dakgrikangkuaha aro uamang'oni mitamko Lord Wellesleyan amangaha. Uni dongmitingo bang'bea a'arangkon Englishrang man'aha; uni gimin Lord Wellesleyko gitamgipa British Indiako dakgipa ine mingako man'aha. Lord Clive skanggipa aro Lord Cornwallis gnigipa ong'achim Lord Wellesley 1805 bilsio Indiako wate re'angaha.

2. Lord Wellesleyni re'angmano Lord Cornwallis changsa re'bataiachim; indiba ua ruute dongjaha. Ua jagittamni ja'manon Indiaon siaha. uni ja'mano Sir George Burlow Governor General ong'e bilsignimangsan dongangaha. Uni ja'mano Lord Minto bils 1807 oni 1813 ona dongaha. Uni dongmitingon Bengalo dakaitrang namen jelsrangachim.


3. Lord Mintoni ja'mano Lord Hastings re--

baaha aro Lord Wellesley ni amanggija mitam Mahratta rajarangko ame Bombay Presidency aro Central Provincerangko dakaha. Iana skang Lord Wellesley Madras Presidencyko aro Lord Clive Bengal Presidencyko dakangaha.

4. Lord Hastings 1823 bilsio re'angaha. Uni ja'mano chetgipa Governor General Lord Amherst ong'achim. Uni chasongo Burmani raja Englishni a'ao napaha aro Governor Generalko sonani hat-khorachi teke rim'anggen ine ka'mikkenatachim. Uni gimin Englishrang uni songnokko gaaha, unon Burmani raja tom'tomaniko dake Assam, Tenaserim aro Arrakanko Englishrangna on'aha, aro crore-sa tangkako dakgrikani korosna on'aha. Lord Amherst 1828 bilsio re'angaha.

44. LORD WILLIAM BENTINCK

1. Englishni skanggipa Governor sakchet bang'a dakgrikanirangko jako ra'na nangaha; indiba Lord William Bentinck Indiaona skugipa Governor General ong'e re'baon pilakchin dakgrikani dongjaha. Uan Lord Wellesley ni Englishrangko Indiaon pilakni kosako dal'batgipa dake donangani giminsan ong'aha. Pilak rajaba rajaska baksa dakgrikna man'jaha, maina indake dakode Governor General uko dondikatgenchim. Manderangba mamung kenani gri dongna man'aha. Uamang'ni



rajarang uamang'ko duk on'na man'jahachim ; maina indake dakna jotton ka'ode Governor General uko champenggenchim.

2. Dakgrikani somoio sason ka'giparang uamang'ni sipai kotokni gimin simsakna nanga aro dakgrikna tarina nangachim. A'songni bang'bea tangkarangko dakgrikanina koros ka'na nanga. Indiba jensalo tom'tomani gnang sason ka'gipa an'tangni raiotrangni gimin simsakna aro maikal a'songko nambatatna aro manderangko kusi ong'batatna chanchina somoiko pilakchin tom'tomani dongahani gimin Indiani manderangna bang'bea namgniko dakna somoiko man'aha.

3. Pilakna skang uni dakchenggipara re'ani ramarangko a'sel gri aro kenani gri ong'atani ong'achim. Maina uni re'bana skang ruutbea salonin bilakgipa re'riktingipa gri songrena man'jachim. A'songgimikon ra'seke ra'giparangni dolrang, dokpretgiparang, Thugs ba kachote so'otgiparangan gapachim. Bangbea manderang songreange noktangona pil'bagijagiparang gnangchim. Uamang'ko ra'seke ra'giparong so'otaha aro uamang'ni jik dedrang uko pangnaba niktaijaha.

4. Dakaitranga ramram songregiparangni ganding chindingrangko gane, sak 30 ba 40 dol dake re'roroachim. Uamong bano man'e 'cha'giparangni nok donga uko sandie walo bilchamrangko nate

re'bae napdrae ra'seke ra'rongachim, uamang'ni tangkarangko mesokchina gita nokni manderangko namen saknaata aro duk on'achim aro pil-nipil so'otrongaha.

5. Dakaitrangna bateba Thugsrang kenbegni ong'batachim. Dakaitranga tangkarangko on'jaosa duk on'a ba so'otachim, indiba Thugsrangde pangnan so'otaiachim. Uamang Kali miteko olakia aro manderangko, so'otode ua kusi ong'a ine uamang chanchiachim. Uamang bang'gija dol Dake re'roroa, aro ramram namgipa songo game cha'giparang gita gana chinachim aro saksan songregiparang baksa ripeng dake re'rime songoni chel'ahaon buringo ba ramasamrango rumalchi rang'san gitokko kachote so'otrongachim. Unon uamang'o je gnang uko ra'enba manggisiko gope galachim. Songtang noktangchina re'angon gipin manderang gita a'barango aro dokanrango kamrangko ka'achim. Uamang'ni jikdrang dedrangba aro darangba uamang mai chong'mot aro maikai manderangko so'ota u'ijachim. Uamang an'tangtangsang u'iaigipa ku'sikrang aro sriksrik uiatgrikanin chinrang gnangchim aro uarangko an'tangna agre pilak gipinde u'ijachim.

6. Lord William Bentinck English kam ka'giparangko. Thugs aro dakaitrangko am'china watroroaha aro Major Sleeman minggipa digipani

jakchi bilsisnimangni gisepo sak 1500 mang thugs-rangko rim'e patoko donataha. Adita bilsirangni ja'manon songregiparangna mamung kenani gri ong'ataha.

7. Gipin Hindurangni kragija dakbewal, *Sati* ba *sootika* dontongataha. Hindurangni gisepo jensalo segipa sia uko so'ani ganchio tanggipa jikgipakoba so'chaprongachim. Ia dakbewalko 1829 bilsio dontongataha.

8. Lord William Bentinckni sason ka'mitingo gisik ra'na kragipa gipin kamrangba gnan. Uni dongmitingko Indiani manderangko sorkarini dal-gipa kamrangko ka'pana cholko on'aha aro English ku'sikko skiataha, aro kacharion Persian kusikko jakkalgija Indiani ku'sikko jakkalna on'aha.

9. Lord William Bentinckni ja'mano Sir Charles Metcalfe dikdiksana Governor General ong'aha. Uni dongmitingo Indiani chapa ka'aniko jakgitel on'aha. Uni ja'mano Lord Auckland 1836 oni 1842 bilsiona Governor General ong'aha. Uni dongmitingo Afghanrang baksa dakgrikani ong'aha. Ua somoio Russiarangni bilrang Asiani bijatchi jolona sokbaachim aro India napna kenchakani gnanachim. Uni gimin Afghanni raja baksa nangrime warachakaniko dakna nangachim. Afghanni raja Dost Muhammad indake Britishko namnikgija batesa Russia baksa ku'monggrikaniko

dakachini. Uni gimin Englishrang dakgrike Dost Muhammadko Calcuttaona rim'baaha aro Kabulo gipin sason ka'gipako done Britishni sipairangko donaha. Ruutgijan Afghanrang chakattaiaha, Britishni sason ka'gipako so'otaha aro Britishni sipai kotokko katataha.

Uni ja'mano Lord Ellenborough re'bae 1842 oni 1844 bilsiona Governor General ong'aha. Ua rang'san sipairangko watate Kabulko ra'ataha aro uni bazarko gopretaha. Dost Muhammadko Calcuttaoniko jakgitel wate unon Amir ong.china donaha.

10. Lord Ellenboroughni ja'mano Lord Handing re'bae 1844 oni 1848 bilsiona Governor General ong'angaha. Uni dongmitingo Sikhrang baksa dakgrikani ong'aha. Umang'ni raja Ranjit Singh tangmitingo Englishrang baksa nangrime dongaha. Indiba Ranjit Singh 1839 bilsio siaha aro uni simano uni songnokko uni depante Dulip Singh man'rikaha ; indiba agre dambe ong engani gimin uni ma'gipa sason ka'soaha, indiba tom'tome rak-kina neng'aha aro Englishni a'ani ningo napaha. Iani a'sel dakgrikna nangaha. Englishrang Lahoreko ra'raha, indiba Dulip Singhko sason ka'na on'angkue tom'romaniko rakkina Britishni sipairanko donangkuaha. Ia dakgrikanio Bisa aro Sutlej chibimarangni gisepo donggipa a'ako Englishrang-

na on'aha aro bang'bea tangkako dakgrikani korosni pal on'na nangaha ; indiba Dulip Singh on'na amjani gimin Kashmirni raja Gulap Singh on'chake an'tangko jakgitelgipa raja ong'ataniko man'aha.

45. LORD DALHOUSIE BONGAGIPA BRITISH INDIAKO DAKGIPA

1. Lord Dalhousie 1848 bilsio chigitamgipa Governor ong'e Indiaona re'baaha aro Indiako skangna bate man'e cha'batgipa aro kusi ong'batgipa ong'atna gita bang'bea namgnirangko dakang'aha.

2. Uko bongagipa British Indiako dakgipa ine mingaha, maina ua bang'a a'songrangko Britishni sasonni ning'ona ra'baataha. Ua a'songrangoni skanggipara Sikhrangni a'song Punjab ong'achim. Uamang'ni dal'batgipa raja Ranjit Singh Englishrangni ripeng ong'e Punjabo sason ka'achim, indiba uni siani ja'mano Sikhni dilgiparang Englishrang baksa dakgrikaha ; indiba amako man'aha. Unon Englishrang Punjabko ra'srangaha ; aro ka'donggipa Sikh sipairang Britishni bilakgipa dolsa sipai kotok ong'baha. Godavary aro Mahanadi chibi-manu gisepgrik Hyderabadni salgroo donggipa Mahrattarangni a'songko Central Provinces dakaha.

Ua a'songni raja siaha aro man'rikgnigipa depante dongjani gimin Britishrangni a'ao chapataha.

3. Oudh a'songni raja namen namjabeachim aro raiotrangko namen duk on'beani gimin uamang Governor Generalo nalis ka'aha, Lord Dalhousie una changni chang mikrakataniko on'aha aro nambatjaode uni songnokko ra'e katgen ine ka'mikkenataha ; indioba ua namasa namjabatroroachim. Uni gimin ukoba Britishni a'ao chapataha aro budepa Nawabna pensionko on'e Calcuttao dongchina ge'etaha.

4. Ia somoio Britishni a'arang skangna bate changgitam bataha. Burmani rajaba gisik gri dake Englishrangko dakgrikaha, indiba amako man'e Burmani bak Pegu minggipako uni skotonggipa songjinma Rangoon baksa British Burmano chanchapataha.

5. Lord Dalhousieni bang'a a'songrangko chapatman'o India Britishni a'a namen apalbeaha. Iana skang Bengalni Governoran India gimikniba Governor General ong'achim. Indiba da'o agre apalahani gimin 1853 bilsil intal Bengalko Lieutenant Governorni jako donaha aro Governor General India gimikko nirokna jakgitel ong'bataha. Untal uni dongramkoba Calcuttaoniko Punjabni Simlona jitangaha.

6. Ia salrango Madras, Bombay aro Calcutta ba ugita dal'gipa biaprangoni gipin biaprangona re'na nangode na'a suk ong'e namgipa reil gario asonge kantaprako mail 30 ba una bateba re'na man'a. 1853 bilsina skang Indiaa reil ramarang dongjachim. Da'ororo salsa re'na man'gipa ramako antisa ba una bateba nangachim. Lord Dalhousie 1853 bilsio mail 20 mang skanggipa reil ramako dakchengaha. Da'o mail 40,000 bate dongaha. Skangni salrango dakgimin bosturangko gitim-rango man'na neng'bea aro man'oba dam rakbea ; maina badinggiprang matchu garirangosa re'rurana nangani gimin bang'en korosko aro somoiko nanga. Indiba da'o reil ramarang dongani gimin altuae ra'rurana man'a aro dam nom'e palna man'aha.

7. Skango banoba cha'asina nangode hajalni hajal manderang sia, maina uamang'ko dakchakna gita mamung chol dongjachim. Indiba da'ororo indake ong'ode gipin a'songranganiko altuae reilrango ra'bana man'ani gimin manderangna cha'anirangko watatna man'a.

8. Indiani dal'dalgipa chibimarang indin sagal-ona joke gimaia. Lord Dalhousie donggerangko cho'ate a'gachina j'kate gamani cholko ong'ataha. Gangesni donggeko, jean changsao a'gilsako dal'batgipa dongge ong'achim, ua cho'ataha aro mail hajalni hajal apala a'aona jakatange mi


misirangko ge'na man'ataha aro gam gnanggipa ong'ataha.

9. Lord Dalhousie-ni Governor General ong'mitingo bang'bea schoolrangko kuliaha jeo songtangni ku'sik baksa Englishko skiachim. Uni dongmitingon school 25,000, dongaha, Da'o bang'roroen 25,00,00 na bate bataha.

10. Skangni salrango manderang chitirangko serongbreja, maina sena poraina changgipa manderang bang'jabe, unbaksaba ramarang bangjabea, aro reilrang dongkuja. Je bang'gija seanirang donggenoba mandechisa ra'rurana nangachim. Tikitrangko jakkalani dongkuja aro chel'aona ra'angani koros sepangona ra'anganina bate namen bang'batachim aro man'e cha'giparang'san chitirangko watatna man'achim. Indiba da'o naya paisa kolgrikchin tolasa jrimgipa chitiko aro naya paisa kolatchichi tolagni jrimgipako Indiani ki'tiksaoni ki'tiksaona watatna man'aha aro naya paisa chikungchin post cardko watatna man'aha. Da'o hajalni hajal post officerang aro chipani boxrang Indiaa donga; lakni lak chitrang aro parcelrangko bilsiprako ra'ruraenga.

11. Dako watatode Madrasoni Calcuttaona salgni nanga. Indiba da'o saoba Madrasoni an'tangni ripeng saksana mail hajalsa chel'gipa Calcuttaona maiba kattako watatna sikode ua

BRITISH INDIA
LORD DALHOUSIE NI SOMOTO 1836



uko minitbongaon telegraphchi watatna man'a, jean mikka riprapagita gong'rakbee uni kattako watatna nan'a. Katta mingchet ong'gipa kandik-gipa u'iataniko watatana ana chi'gni nangaia. Lord Dalhousie skanggipa telegraph silitingko donangchengaha. Indiba da'o India lakni lak mail ro'gipa silitingrang dongaha.

46. LORD CANNING ARO INDIANI SIPAIRANGNI CHAKATANI

1. Lord Dalhousie 1856 bilsio Indiaoni re'ang-aha aro uni ja'mano Lord Canning East India Companyni Governor General ong'e Indiaona re'baaha. Uni sason ka'miting somoio Indiani sipairang English manderangni kosako chakataha, 1857 bilsini Mayni 10 gipa salo Mirut songjinmao chakatchengaha. Mirutoni Delhi, Cawnpur, Oudh, Rahikhan, Bareilly aro bijatchiona kingking gipaha.

2. Chakatani a'selrang:—(1) Bengalni sipairang bang'batan chugipa Hinduni ma'chongni manderang ong'achim aro maiba kamo uamang'ni toromni dakewalo nangeode gisik saningachim. Una skang bang'gija salrangni gisepo Burmao dakgrikaning ong'e gital slaini kaltosrangko ona'chim; ua kaltsorango matchuni aro wakni mitimrang

gnang ine ong'gijako jangaha. Ian uamang'oni Hindu aro Mussalman sipairangkoba jat re'atna dakenga aro Christian ong'attokna mangsongani gnang ine chanchichipaha. (2) Minggipin, uamang Burmaona dakgrikna reang'na jechakachim; maina uororo-Hindurang sagalko ramram batmaljachim aro iano bamna sikkijani gisik ong'kataha. Unon jechi watata uchi re'jaode mikkangchi sipaini kamo rakijawa ine niamko aganprakataha. (3) Lord Dalhousieni sason ka'mitingo reil ramarangko, telegraphni silitingrangko dakatanirangko nika asonggimikkon kanasienga ine skia man'gijagipa manderang kena ong'kataha. (4) Didigipa bang'a manderang dongaha, mongsong skango sason ka'gipa rajarang aro Nawabrang jerangni sason ka'aniko Englishrang raskaachim; jekai Nana Sahib, Jhansini Rani, Tantia Topi aro adita gipinrang.

3. Ia chakatgipa dol jeo nika sahebrangko so'otaha, nokrangko so'aha. Delhio Muhammad Bahadur, Mogulni Emperor jak on'paaha. Cawnpuro Baji Raoni depante Nana Sahib, dakgrikdila-ha aro sipairang saheb me'chik me'a aro bi'sarangkoba so'ottokaha Lucknowo Englishrangni dongramko rim'aha aro Sir Henry Lawrenceko so'otaha.

4. Adita dakgrikani ja'mano Englishrang amaha aro tom'tomataha. Indiba Englandni

Parliament East Indiani sason ka'ani bilko bon'ate Englandni ranichi sason ka'ataha, aro Rani Victoria 1858 bilsil intal Indiani Maharani on'gaha. Ua 1858 bilsini Novembarni skanggipa salo mingsa aganprakano niko dakaha, jechi Indiani manderangni torom, dakbewal aro magitcham pagitchamrangni manianirango dal'nikgen aro changani sapani aro u'ianina krae sorkarini pilak kamrangko, jatni, toromni ba dakbewalrangni gimin chanchigijan kamko on-



Victoria Rani

gen ine ku'rachakaha. Chakatanio so'otanirango jakdangdikchongmotgiparangna agre pilak gipinrangna kema ka'aniko on'aha ine aganprakaha. Ian Indiana Dal'gipa Ku'rachakani ba Great Charter ong'a.

47. ENGLANDNI SASONNI NING'O DONGANI

Englandni rani an'tangan Indiaona re'bae sason ka'na man'jani gimin Englandni dal'gipa mande saksako an'tangni pal sason ka'china Indiaona

watataha. Ukon Viceroy ine minga. Lord Canning Indiani skanggipa Viceroy ong'aha. Ua 1862 bilsio songtangona re'angpilaha.

Uni dongmitingo Pilak sinjetani niamrangko ra'pilaha. A'songtango sason ka'gipa rajarang an'tangtangni man'rikngigipa depanterang dongjaoba



Lord Canning

deragatgimin dedrangkoba songnokko man'rikna on'aha. Iandake Doctrine of Lapse-ni niamko gimaataha. Indiana bang'a niamrangko aro sason ka'nani nambata bewalrangko donaha. Uarangni

gisepo Council of Act of 1861 gisik ra'ani ong'a, Iachi Indiani manderangko Legislative Councilo dongpaani cholko on'aha. Una agre High Court, Indian Penal Code, Civil aro Criminal Procedure Code, chongmotan bichal ka'ani dingtang dingtan niamrangko dakaha. Indiaio lekani tangka chongmotan notko jakkalatna a'bachengaha. A'nokgipa rang raiotrangko sinjetna man'jana gita Rent Act niamko dakataha.

Lord Canningni ja'mano Viceroy sak 22 mang sason ka'aha. Uamang'ni salrango Indiani silrooroani gimin bang'a kamrangko dakaha aro niamrangko ra'gataha. Skia man'atanina Universityrangko Presidency ge'antion kuliaha. Bang'a kamrangchi saliramni jatrangni bewalrangko ragate Indiako silrooroataniko doataha.

LORD ELGIN (1862-1863)

Lord Elgin 1862 bilsio re'baaha. Uni dongmitingo North Western Frontier Provinceoni Wahabisrang Englishrangni kosako chakatachim. Lord Elgin ruutgijan 1863 bilsio siaha.

SIR JOHN LAWRENCE (1864-1869)

Sir John Lawrence 1864 oni 1869 bilsiona viceroy ong'angaha. Uni dongmitingo Bhutiarang baksa dakrikanina agre gipin gisik ra'na nangbeani dongja.

LORD MAYO (1869-1872)

Ua 1869 bilsioni 1872 bilsiona sason ka'aha. Ua Ambalao Afghanni raja Amir Sher Ali baksa ku'monggrikaniko 1872 bilsio dakaha. Ua salsao Andaman, Chichangona nirokna re'angon Mussalman koidirangoni saksa uko so'otaha.

LORD NORTHBROOK (1872-1876)

Lord Northbrookni sason ka'mitingo Barodani Gaekwar uni kachario donggipa British Residentko bisi on'na joton ka'aha ine rim'achim, indrba chu'onga sakiko man'jaha. Uni sason namjani gimin uko singhasononiko salone uni depanteko raja songaha. Uni sason ka'mitingo 1875 bilsio Prince of Wales, jean ja'mano King Edward VII ong'achim Indiaona re'baaha.

LORD LYTTON (1876-1880)

Uni chasongo 1877 bilsio Delhio dal'gipa Darbar ko dake Englandni Rani Queen Victoriako Indiani Maharani ine aganprakaniko dakaha. 1876 oni 1878 bilsirango Indiani bang'a biaprango namen karap ong'beaha. Madras Presidency, Bombay, Mysore, Central Province, Punjab aro United Province ia biaprango mongsong ong'bataha aro hajalni hajal manderang siaha. Mikkangchi mai-kai indakgipa a'selrang ong'jawa aro ong'an salo

maikai dakchakanirangko on'e champenganiko dakna man'gen cholrangko am'na gita Famine Commissionko donataha.

Lord Lyttonni sason ka'mitingo Afghan Gnigipa Dakgrikani ong'aha. Russia baksa nangrime Afghanrang Britishni watata mandeko Kabulo dongna on'achim aro 1879 bilsio dakgrikani ong'-kataha. Sher Ali Afghanni Amir Russiachi kataha. Uni depante Ayub Khan meligrikaniko dake Britishna Agentko nokchakaha. Indiba ruutgijan Britishni baltigipa Sir Luis Cavagnariko so'otaha aro Afgham Gittamgipa Dakgrikani ong'-kataha.

LORD RIPON (1880-1884)

Lord Ripon sokbaarin Afghanrang baksa dakgrikani ong'aha. 1810 bilsio Englishrang amako man'aha aro Kandaharo katnapaha. General Robbert an'tangni sipai kotokko rime Kabulona chaangaha aro Afghanrangko amaha. Sher Alini gritang Abdur Rahmanko singhasono donaha.

LORD DUFFERIN (1884-1888)

Lord Dufferinni sason ka'mitingo adita gisik ra'na kragipa kamrang dongaha. 1885 bilsio Indian National Congress ong'katchengaha. Iani gimin Babu Surendranath Benerjee Indiani bang'a

biaprangona re'roroe aganprakaha. Ian sason ka'enggipa Governmentko manderangni namnikani gita dakchina warachakgipa dol ong'aha. Uni chasongo minggipin gisik ra'ania, Indiani manderangko sason ka'ani ba sorkarini dal'a kamrangko ka'ani bidingo rakipana gita Public Service Commissionko donchengaha.

1887 bilsio Rani Queen Victoriani sason ka'ani bilsio sotbonga ong'ani, "Sonani Jubili" ko maniaha.

LORD LANDSDOWNE (1888-1894)

Uni dongmitingo Manipur baksa dakgrikani ong'aha. Manipurni sipairangni pamong Tiken-drajit Englishni Officer Mr. Cuinton minggipako aro unbaksa gipin English Officer sakbriko sotaha. Uamang'ni kosako sipairangko watataha aro dakgrikanio ame Tikendrajitko pasi on'aha.

LORD ELGIN (1895-1899)

Uni dongmitingo Indiani salgrochi sima rikam-jolo donggipa a'brini jatrangni gisepo dakgrik dinggrikanirang bang'achim. Lord Elgin sipairangko watate tom'tomaniko dakataha. 1897 bilsio Rani Queen Victoriani bilsio 60 sason ka'ani, "Hirani Jubili" ko maniaha.

LORD CURZON (1899-1905)

Lord Curzonni sason ka'mitingoniko mongsong. bate gisik ra'na kraanirangoni mingsara, Partisan of Bengal ba Bengalko bak dakani ong'a Salaramni Bengalko Assam baksa chanchapate Eastern Bengal and Assam minge Lieutenant Governorni jako donaha. Western Bengalko Bihar aro Orissa baksa chanchape Governorni ning'o donskaaha. Iani a'sel Bengalo namen namnikgijanirang ong'-kataha aro bang'bea manigijani aro niam pe'ani-rangko dakaha.

Minggipin gisik ra'ani. 1901 bilsio Rani Queen Victoria Januaryni 22 gipa salo siaha, aro a'song-gimik kalimaha. Uko gisik ra'anina Calcutta songjinmao dal'begipa Marbleni nok, Victoria Memorialko rikaha. Indiani rajarang jaksrame tangkarangko on'aha. 1903 bilsio Delhio dal'gipa Darbarko dake King Edward VII ko Indiani Emperor ine aganprakaha.

LORD MINTO (1905-1910)

Ia bilsirangni gisepo Indiako sason ka'ani bidingo bang'a chu'ongnikgijanirangko mesokna a'bachengaha ; maina Indiani manderang bang'a skianirangko man'rorobaahachim. Congressni bilakgipa dol an'tangtangchi sason ka'ani ba

Swaraj-ko dabiaha. Bal Gangadhar Tilok Bipin Chandra Pal aro Lala Lajpat Rai Englishrangni sason ka'aniko bon'atanina miksonge dol dakaha. 1909 bilsio Lord Morley minggipa, jean uororo Englando Secretary of State for India ong'engachim adita niamrangko dake, sason ka'ani bidingo dai ong'paaniko bang'en on'dapaha.

Emperor Edward VII 1910 bilsio siaha aro King George V uni ja'chong ong'rikaha.

LORD HARDINGE (1910-1916)

1911 bilsini bon'o Englandni raja George V aro Rani Queen Mary Indiaona re'bae dal'gipa Darbar-ko dakaba. Uano Bengalko bak dakaniko ba Partisan of Bengalko bon'ataha. Bengal gimikko nangdimata Bengal Presidency dakaha aro Lord Carmichaelko skanggipa Governor dake watataha. Bihar aro Orissako Province ge'sa dakaha aro Assam dingtang ong'aha. Indiani skotong song-jinmako Calcuttaoniko Delhiona jitangaha.

1914 bilsio Agilasakni Skanggipa Dal'gipa dakgrikani ong'kataha. Augustni 4 gipa salo England-ba Germanyni kosako dakgrikaniko aganprakaha. Indiaba Tangkachi aro mandechiba dakgrikanio dakchakaha. Dakgrikani tom'tomahaon Indiani mandekoba Peace Conference aro League of

Nation-ona okampaaha ; Indiba Indiani Governmentsa uko seokaha aro Indiani chanchipaaniko skatang aganna bil dongjachim.

LORD CHELMSFORD (1916-1921)

Lord Chelmsfordni sason ka'ani salrango Indian Constitutional Reforms-ko dakaha. Indiani manderangna an'tangtango sason ka'anio bang'bata bilko on'na ku'rachakaha aro uko chu'sokatna niam mingsa, 1919 ni Government of India Act ko dakaha aro 1934 bilsini 31 gipa Marchona kingking ja'rikaha. Uano on'gimin gita Province damantion Governorni ning'o niamtango dakgipa Legislative Councilko donaha aro uno donggipa memborrangoni ritchaprako sak 70 manderangni seokgimin ong'aha. Governorni Executive Councilba ghang aro uno donggipa memborrangoni adhade manderangni seokgiminrangani ong'na nangachim.

Central Governmentoba Governor Generalni ning'o dolgni ghang, Council of State are Legislative Assembly. Ia nokrangoba sorkario kam ka'giparangna bate ramram manderang bang'batna nangachim. Ia gital niamko ra'bagen ine ka'dongsoachim. Indiba ka'dongsoa gita ong'jachim.

LORD READING (1921-1926)

Uni dongmitingo Prince of Wales Indiaona re'baaha. Lord Chelmsfordni dakanga mitam niamrang manderangko ka'onangatachim; maina bang'bea kamrango champenganirang gnangchim. Indiba mitam niamrangko Lord Reading gimaa-taha aro kajinarangko wataha.

LORD IRWIN (1926-1931)

Uni dongmitingo Mussalmanrang aro Hindu rangni gisepo Calcuttao dakgrikani ong'kataha. Uni sason ka'ani chon'kamachibara jatni chakata-ni a'bachengaha, aro Mahatma Gandhi dilgipa ong'aha. Uni dongmitingo Indiani Constitutional Reform-ko maikai chu'sokatenga nichina aro uko nambatatani cholrangko nie reportko on'china gita Parliamentary Commissionko watataha. Ukon Simmon Commission ine minga, maina Parliament. oni saksa dal'gipa mande Simmon minggipako watatachim. Indiba ua Commissiono Indiani manderang saksaba dongjani gimin Indiani manderang mamung dakchakaniko on'gija gelaha aro chu'sokna man'jaha.

LORD WILLINGDON (1931-1936)

Afghanistanni Amir Nadir Sah 1933 bilsini Novemberti 8 gipa salo so'otako man'aha. Uni

depante Muhammad Zahir Khan Amir ong'aha. Ia obostao Indiani Government mamung jakdang-dikaniko mesokjaha. Emperor George V 1936 bilsini 20 gipa salo siaha aro uni dejakra Edward VIII Englandni raja ong'rikaha. Indiba bilsisani ja'mano ua uni ka'sagipa American me'chik Mrs. Simpsonko bia ka'aniko uni montrirang namnik-jani gimin uni singhasonko uni jonggipana wate on'aha aro George VI Englandni raja ong'aha.

LORD LINLITHGOW (1936-1942)

Uni Viceroy ong'mitingo A'gilsakni Gnigipa Dal'gipa Dakgrikani ong'kataha. Skanggipa dakgrikanio Germany amako man'e bamna nangahani gimin a'jak sokna sikbeengachim. Uandake uamangko dilna Her Hitlerko man'aha. Ua Polando napdraaha jean Englandni simsakani ning'o dong-engachim. Uni gimin England aro Franceba 1939 bilsini Septemherni 3 gipa salo Germanyni kosako dakgrikaniko aganprakataha. A'bachengo Germany bilakbataha aro Europeni bang'a bakko aro Franceni bang'a bakko man'angaha. 1940 bilsio Italyba Germanychi chakna a'bachengaha. Indake bilakroroako nike Japanba Germanyna chake Hawaii chichango Americani dal'gipa jahat karam Pearl Harbour minggipako goaha aro ra'sekeha, aro Phillipine chichangrangkosan ong'aija Malaya

Peninsula, British Singapore aro Burmakoda man'bae Assam aro Bengalni rikamona sokbaaha. A'gilsakni bilakbatgipa jatrang dolgni ong'e cha-katgrikaha. Dolsachi Germany, Italy aro Japan dolgipinchi England, France aro United States of America aro Russia ong'aha.

In dakgrikanio British Government Indiani manderangko ku'monggrikchenggija ia dakgrikani na Indiako salchapa. Uni sason ka'mitingo gisik ra'gnina, 1935 bilsio on'gimin India Act gita Provincial Autonomyko pilaknan on'aha. Ua gita Province ge'antion jatangni montrirangchi Governmentni pilak kamrangko chu'sokatani ong'aha.

Uni gimin Congressni dilgiparang namnikjaha. Ia dakchakanina maiko on'gen aro ia dakgrikani miksongania mai iarangni gimin bang'en sing'aniko dakaha; indiba chu'ongnika aganchakaniko man-jachim. Uni gimin Congress Ministry uamang'ni dakrimpaaniko dontongaha. Japanrang Indiako
 napdrachong'moten ine u'ie British
 Crippani Parliament Sir Stafford Crippsko
 rebaa watate, dakgrika bon'ahaon Indiako
 chu'gimik jakgitel ong'aniko on'gen ine ku'rachake
 dakgrikanio chu'gimik bilchi dakchakaniko on'-
 china janapaha. Chu'gimik jakgitelaniko on'na
 gita dakgrikani bon'ahaon Dominion Status aro

Constituent Assemblyko on'gen ine ku'rachakaniko on'aha. Indiba Congress sasonni bidingo chu'onga dingtanganiko bakan on'china biaha; indiba bakan uko dingtangatna jechakahani gimin Congress ra'chakjaha. Muslim League iako ra'chakna namnikaha; indiba Constituent Assembly aro India gimikna ge'sa Dominion Status on'dimako namnikjaha. Maina Cripps a'bachengo India gimikna Dominion Status ge'sako on'gen, indiba badiaba province uoni ekna sikode ja'mano ongkatna man'gen ine cholko on'aha. Indiba Muslim League uko namnikjaha.

Iandake Congress aro Muslim Leagueba dingtang dingtang a'selrango jechakahani gimin Crippsni re'baani chu'sokjaha.

48. JAKGITEL ONG-NA CHAKATANI

Skanggipa Dal'gipa Dakgrikani ja'mano Indiani manderangna sason ka'ani bidingo rengsiko manpahaoba bil chong'mot dongjachim. Congressni dilgiparang uano chu'ongnikjaha.

Ia skanggipa dakgrikanio Englishrang Turkeyko
 ame Turkish Empireko gimaataha,
 Khalifat jeni rajaani Khalipha ong'achim aro
 pilak Mussalmanrangni toromni skotong ine
 chanachim. Iani asel Indiaa donggipa Mussalmanrangko Muhammad Ali aro uni jonggipa Shaukat

Ali Britishni kosako chakatdilaha. Mahatma Gandhi ia kamo dakrimpaaha. Iakon Khalifat Movement ine minga. Ia somoirango Hindurang-ba Rowlatt Act ni gimin namen ji-
Jallianwala jaengachim. Maina ua niamchi bang'a
Bagh kamrango champenganiko donaha. Uni gimin India gimik jing'jengaha. Mahatma Gandhi ia chakatanio dilaha aro mitam biaprango namen bilongbeaha. Amritsarni Jallianwala Bagho manderang sorkarini ge'etako manijaha aro bang'bea jinma tom'dakmitingo General Dyer manderangko goaha. Mande sak 379 siaha aro 1200 mang matako man'aha. Iano Indiani mande-rang Sorkariko bang'en ka'onangaha. Rabindra-nath Tagore an'tangna on'gimin Knighthoodko galaha.

1920 bilsini September jao Calcuttao Indian National Congress dingtangmancha tom'aniko
 dakaha aro pilak dakgniko Mahatma
Bilchi wara- Gandhi tik ka'dilaha. Ua gita Indiani
chakgija manderang pilak kamrangchi British
Dakrimgijani Government baksa kam ka'rimjana aro gelna aro uamang'ba Sorkarini dal'a bimung ba upadhirangko on'piltokna aro gital niamrango dakna tom'anio (legislative assembly) dongpajana, kachario ukilni kamrangko dontongna aro indake school aro collegerangchi re'jana aro chon'kame kajinarangko

on'gija dongna tik ka'aha. Indiba sakantion kilding rikaniko, khaddarko ba'ra dokaniko jako ra'skana tik ka'ataha. Gipin tik ka'anikoba melae donaha jeni mangsongara Britishni songnokni
 Swaraj ning'o dongemangba, jattangni sason ka'aniko, chong'motan Swarajko tom'e dakanichi man'na miksongani ong'achim.

A'songgimik ia mangsonganiko namnikaha aro 1921 bilsio indake dakaniko a'bachengaha, skia man'giparangan on'g'jaha, indiba India gimikni manderangona ia kam sokaha. Chatrorang school aro collegerangko wate kataha. Dal'gipa ukilrangni gisepo Babu Chitta Ranjan Das aro Motilal Nehru jemangan japrako man'ani hajal chi'bongaoni hajal kolgrikna agre komijachim, kamtangko dontongaha. Sorkari dilgiparangko aro bang'bea manderangko rim'aha aro sak 30,000 mangko patoko chipaha. Indiba Indiani manderang dontongjaha aro jakgitel ong'anina krenganguaha.

Simon Commissionko watattaiaha aro uni re-
 Round Table portko man'mano Round Table Con-
 Conference ferenceko dakaha, aro ua Englando tom'aha. Congress Indiana, British Empireni ning'o donge an'tangko sason ka'aniko, chong'motan Swarajko dabiaba; indiba uko jechakahani gimin iano dakrimpaaniko dontongaha aro chu'sokjaha.

1929 bilsio Lahore songjinmao Congressni tonranio Gandhi Decemherni 31 salo Jatni Nisanko songdoe, "Jakgitelni sal" ine manidilaha aro Congressni ge'eta gita Civil Disobedience ko a'bachengataha. 1930 ni 6 gipa Civil Disobedience Movement Aprilo Gandhiko jarikgipa mande sak 78 baksa Dandiona re'ange kariko bikotani niamko pe'dilaha. Lord Irwin bilake



M. K. Gandhi

sinjetaniko dakaha; indiba namgni gri ine nike Gandhi baksa ku'mong-Grikaniko dakaha. Ua Civil Disobedienceko dontongate Gnigipa Round Table Conferenceo dongpana ku'rachakaha. 1931 bilsini April jao tom'tai-aha; indiba Congressni dabiako on'jani gimin Gandhi melina man'jaha aro Civil Disobedienceko

a'bachengattaiaha. Unon 1932 ni January 4 gipa salo Gandhiko rim'e patoko donataha aro un baksa hajalni hajal dilgiparangko rim'e patoko chipaha, aro dikdiksana jrip dongaha gita ong'aha. Congressni pilak monrirang wate kataha.

49. HINDU-MUSLIM MELIGIJANI

Jakgitel ong'anina dakgrikaniko Mussalman-rangan a'bachenggipa ong'aha. Maina Sepoy Mutinyo uamang'an bak ra'batgiparang ong'achim. Indiba chon·kamaona kingking National Congress baksa namedake melina man'jani gimin nangrime dakjaha. A'bachengao pilakan ku'cholsan ong'achim. Indaken Khilafat Movemento Gandhiba dakrimpaaha aro Mussalmanrangba Non-Co-operation Movemento aro Simon Commissionko gelanio ku'cholsan dakachim. Indiba India Mussalmanrangna bate Hindurang namen bang'ba'bea aro Congressni tik ka'ani gita Democratic Governmento mande bang'ani gitasa pilak bilrang ong'achim ; uni gimin sasonni pilak kamrango Mussalmanrangna bate Hindurangni bil bang'batachim. Indakesa Mussalmanrangba dol dakani ong'aha aro Sir Syed Ahmad aro gipin Muslim dilgiparang Congressoni ekaha, aro warachakgrikani gita ong'angaha. Uandake 1906 bilsio Muslim League on'katchengaha. British Government an'tangtangni gisepo indake dingtang ong'grikaniko silroroatna namnikaha ; maina indake ong'anichi India bilgri ong'gen aro sason ka'kamaniko man'gen ine ka'dongani gnangchim.

Indakgipa mangsonganio dingtang membor

seaniko on'aha aro ukon Separate Electorate ine
 mingachim. Iachi pangnan apsan
 Separate
 Electorate ong'gijaniko gisik ra'atani ong'ataha.
 Iako 1909 bilsio on'aha. Undake Muslim League
 aro Congress pilak kamrango meligrikijani dal-
 roroaha.

Indiba Muslimni mitam dilgiparang Congressko
 nangrime a'song gimiknan namgni ong'gniko
 Communal
 Award chanchiaha. Uamang'oni mitam Con-
 gressni Presidentba ong'aha. Indiba
 bang'batan melina man'jaha aro pil'nipil dingtang
 dingtang biaprango
 dakgrikanirang ong'ka-
 taha. Bang'a Mussal-
 m a n n i dilgiparang
 Congressko namnikja-
 oba Mr. Jinnah nang-
 rime dakna joton ka-
 achim. Indiba jensalo
 pilak political dolni
 melaanio uni janapani-
 ko rachakjani gimin
 Congressoni eksrang-
 aha. Iani ja'mano
 Congress aro Muslim
 League bilakbate wara-
 chakgrikaha. Meligrikna m a n ' j a h a n i gimin



M. A. Jinnah

British Government Communal Awardko on'aha. Ia on'ani Muslimrang bang'bata namgnirangko man'aha aro nangrimgijani pariko apalatbataha.

Indake ong'oba Mr. Jinnah bil amadipet Congress baksa nangrime dakna joton ka'engachim. Province ge'prako dolprakni mande bang'ani kri Congressniba aro Leagueniba Montrirang dongna nanga ine Jinnah chanchianiko naataha. Indiba Congress uko ra'chakjaha. Je dolni bang'bata Voteko man'a ; pilak monttirang ua dolnin ong'tokna nanga ine Congress mangsongaha. Indake ong'on je provinceo Hindurang bang'bata uno montri ong'pana gita, Congresso nappaana agre, Mussalmanrangna chol dongjachim. Uni gimin Congress Indiani pilak jatna bimungko ra'oba sason ka'ani Hindurangni sason ka'ani ong'aigen aro sasonni bidingo Mussalmanrangni ku'iang aro bil dongpajawa ine nike Jinnah Congressoni eksrangaha.

Indake ekroroange chon'kamao Indiako dolgni dake bak dakna chanchianiona sokaha. A'bachengo Muslim panterang ia chanchi-
 Pakistan aniko naatchengahachim ; Indiba mitam Mussalmani dolrang namnikjachim. Indiba 1940 bilsio jensalo Muslim League Pakistanko ong'at-china dabiaha pilakan ku'cholsan ong'aha. Je a'-songrango Mussalmanrang bang'bata ua a'songrang

nangdime a'song ge'sa ong'na nanga ine chanchiaha. Iako Punjab, Afghanistan N.W.F.P., Kashmir, Sind a'songrangni bimungni skanggipa oikorrangko aro Beluchistanni bon'kamgipa katta-ko ra'e Pakistan ine mingaha. Unbaksa Salaramni Bengalo mongsong Mussalmanrang ong'ani gimin ukoba ua a'song baksa man'chape Eastern Pakistan ong'ataha.

1942 bilsini August jao Congress, jatgimik badita apale man'a bilchi chakatsrangna ine tik
 1942
 Augusto
 Chakatani ka'aha aro 8 gipa salo uko namniktokaha. Uni walon Gandhi aro gipin dilgiparangko rim'aha aro sorkari, Congressko niam gri dol dakani ine aganprakaha. Unon India gimikon bilongen golmal ong'na a'bachengaha. Mitam biaprango reil ramarangko aro stationrangko nosto ka'aha, Post officerangko so'aha, telegraphni silitingrangko den'sotaha. Sorkari rang'san bilaken sinjetaha. Ia chakatanio mande sak 80,000 ko patoko chipaha, sak 940 mang so'otako man'aha aro sak 1630 mang mata bu'ako man'aha. 1943 bilsio tom'tomangaha; indiba gipin duk nabaskaaha. Bengalo bilongen cha'sina a'bachengaha. Indiba Indiani Sorkari bakan bang'en dakchakanirangko on'na joton ka'aha.

Ia apsan bilsio Burma aro Singaporeo Indian National Army-ko bikotaniko an'ching gisik ra'na

Azad Hind
Fauz

krara. Iako dakdiligipa mingsinggipa Subhas Chandra Bose ong'achim. Ua tom'tome warachakanichi India jakgitel ong'aniko man'na amjawa ine bebera'achim. Uni gimin bilchi warachaksrangna chanchianiko mesokaha. Sorkari uko noktangoni gipinchi ong'katna on'gija chip-change donaha. Indiba maiba cholchi sriksrik ong'kate Indiaoni Afghanistan aro Russia gita Germanyona katangaha. Hittler uko kusi ong'e rimchaksoaha aro Indiako Britishrangoniko jakgitel ong'atna dakchakna kurachakaha. Ua 1942 bilsio Berline songjinmao Azad Hind Fauz ba Jakgitel Indiani sipai kotokko bikotchengaha. Japan jensalo Singaporeko man'aha, bang'bea Indiani sipairangko rim'gitangaha; indiba uamang'ko patoko dongija Indian Independent Leagueko dakataha. 1943 bilsio Salaramni Asiani manderangni okamaniko man'e, kenbeani ong'oba Atlantic aro Indian Sagalko chiningni jahato re'bae Subhas Chandra Bose Japanona sokeaha. Uan Indian National Armyni Commander-in-chief ong'e, Azad Hind Government ba



Subhas Chandra Bose

Jakgitel Indiani Governmentko ong'ataha aro uko 1943 bilsini Octoberni 21 gipa salo agan'prakataha. Unon Japanni dakchakaniko man'e Indiani jakgitel ong'anina, England aro Americako dakgrikna parake u'iataha. 1944 bilsio ia Azad Hind Fauz Manipurni Imphalchina mikkangbaaha aro Naga Hillsni Kohimaona kingking dakgrikbaaha. Indiba wachi sokbaon cha'anirangko rabaani cholrang namjae aro chu'onga gita Japononiko dakchakako man'jae Katpilna nangahachim.

Indiani pilak sipairang jahato aeroplanerango aro a'gaoba Asiao aro Africaoba dakgrikani bon'kujana kingking kakket ong'e dakgrikpaaha, aro uamang'ni ka'donganina mingsingaha. 1945 bilsio Germanyko amaha aro Japanba bamaha aro tom'tomaniko dakaha.

50. LORD WAVELL

Lord Wavell 1943 oni 1947 bilsiona Viceroy ong'aha. Uni dongmitingo Bengalo cha'asimitingo dakchakaniko on'na ua bang'en kam ka'aha. 1944 bilsio Gandhiko patokoniko wataha. Watako man'arin ua Lord Wavellko gronge unbaksa Indiani miksonganini gimin agangrikaha aro Mr. Jinnah baksa agangrike meligrikaniko dakna joton ka'aha ; indiba chu'sokna man'jaha.

1945 bilsio England a'songo gital seokani ong'e

Mr. Churchillni pal Labour Partyni Mr. Atlee Englandni Prime Minister ong'achim. Ia Government gital Indiani kamrangni gimin tik ka'atna gisik nangbee joton ka'aha. A'bachenge Central aro Provincial Assemblyrangna gital seokanirangko dakataha. Ua seokanio Hindurangoni bang'batan Congressni memborrang ong'aha aro Mussalmanrangoni bang'batan Muslim Leagueni memborrang ong'achim.

India maikai an'tangtango sason ka'anio chu-sokbatna man'gen tik ka'e on'na gita 1946 ni
 Cabinet February jao Englandoni Cabinet
 Mission Mission sakgitamko watataha. Ua-
 mang India gimik Federal Union ang'e Central Governmentni jako Defence, Communication aro Foreign Policy mangmangko on'e pilak gipin kamrangni gimin Provincial Governmentni jako ong'gen aro Viceroy's Executive Councilna pilak dolgniko sena man'gen ine ku'pattianiko on'aha. A'bachengo Congress aro Muslim League dolgnian ra'chakaha. Indiba aditani jam'ano Viceroy's Councilna seokanio Muslim League dolgnian man'jae bang'a golmal ong'na a'bachengaha, aro Calcutta, Noakhali aro Bihar jolo Hindu aro Mussalmanrangni gisepo bang'a jegrik dakgrikani ong'kataha.

Indake ong'oba 1946 bilsini Decemherni 9 gipa


salo Constituent Assemblyko a'bachengataha, aro Babu Rajendra Prasadko Presidentna seokaha. Mussalman memborrang N. W. F. P. oni sakgnina agre darangba tom'pajaba. Uni gimin ia tom'aniko British Government ra'chakna man'jachim.



Dr. Rajendra Prasad

51. LORD MOUNTBATTEN

Ja'manki'tiko British Government, 1948 ni June




jana skangan Indiako wate re'angsrang-ginok ine 'aganprak-aniko on'aha aro pilak bilrangko Indiani manderangnijako tom'tome donangna gita Lord Mountbattenko Viceroy ong'china watataha 1947 bilsini March 24 salo ua kamko jako ra'aha. British Cabinet aro Indiani dilgiparangmung ag-angrike aganprakani-

Lord Mountbatten

INDIAN DOMINION AND PAKISTAN

 PAKISTAN
 INDIAN DOMINION



ko dakaha. Uni aganprakatani mongsonggipa katta bichongrang iarang onga :

1. British Parliamentni ra'chakgimin niam gita 1947 bilsini Augustni 15 gipa salo Indiako sason ka'aniko Indiani manderangni jako donangaha.
2. Dominion Status ong'e Indiako songnok damgni, chongmotan (1) *Pakistan* aro (2) *Indian Dominion* ong'ataha. Pakistanni ning'o Saliramni Punjab, N.W.F.P., Sind aro Beluchistan aro salaramni Bengal baksa Sylhetko man'chapaha. Indani dongspa a'song gimik Indian Dominionni ning'o ong'aha.
3. Indian Statesrang je a'songrangko a'songtangni rajarangchi sason ka'a uoni manderang jechi namnika uchin napna cholko on'aha.
4. Mikkangchi sason ka'ani niamrangko dakaniko uk ka'atna gita Constituent Assemblyrangko donataha.
5. Pakistan ba Indian Dominionba uamang'ni Constituent Assembly jekai Chanchia, sikode British Commonwealthoniba ong'katna bil man'aha.

52. JAKGITEL INDIA

Indian Unionna Lord Mountbatten aro Pakistanna Quaid-i-Azam Jinnahko Governor General ong'china donataha. Pandit Nehru Indian Dominionni aro Mr. Liaquat Ali Khan Pakistanni dal'batgipa Montrirang ong'aha. Indake Indiani jakgitel ong'ani chu'sokaha.



Jawaharlal Nehru

Lord Mountbattenni songtangchi re'angmano, 1948 bilsini June ni 21 salo

Sri Chakravarty Rajagopalachari Indiani Governor General ong'rikaha.

Gipin Indiani obostana gamchatgipa sal 1950 bilsini 15 gipa January ong'achim. Ua salintal Indian Dominion. Sovereign Democratic Republic ong'aha aro Dr. Rajendra Prasad uni skanggipa President ong'aha. Ia jakgitel ong'ania an'chingna namen katchabeani ong'a. India ruuta bilsina gipinni



Sri C. Rajagopalachari

ning'o donge aro gipino pangchake dongbaman'o an'tangtangko sason ka'ani

jrimgipa balko pakkretango gatnara rakgipa kam ong'aha. Indiba neng'ani an'chingni katchaaniko mripjawa aro kusi gnang an'ching sakantian bil-tang gita a'songtangni tom'tomani aro silrorogni-na kakket aro bebeo balko ripepana kraa.

53. INDIA JAKGITEL ONG'ANI JA'MANO

India a'song jakgitel ong'ani bilsi 20 ni gisepo (1947-1967) nambate janggi tangna bang'bata cholrangko dakna man'aha. Nehruni dongmitingo ua a'songtangko chiru a'gatna namen krengbee kam ka'angaha. Ua bilsi 1947 oni 1964 ona king-king a'songko dilangaha. Uni siani ja'mano Sri Lal Bahadur Sastri ja 18 na Prime Minister ong'angaha. Uaba a'songtangko chelchakna aro nambatatna namen kam ka'angaha. A'songtangko tom'tome rakina gita, ua bilsi 1966-ni January jao Tashkent songjinmaona chanchigrikna re'angaha. Ua India aro Pakistanmung songgigrikaniko dakna pilak kamrangko Pakistanni President, M. Ayub Khan baksa see on'grikaha. Uni ja'mano re'bapilnasiani walo sagitike, ua 1966-ni January 11 walo siaha. Uni siani ja'mano Srimati Indira Gandhi Prime Minister ong'rikskaaha.

Bilsi 1951 intal 'Five Year Plan' minggipako India a'songni dilgiparang dake, a'songtangko


196

chiru-a'gatna, dilyneng-do'mikna bilsì bongaparakna

Five Year daksamsoaha. Skanggipa bilsì bongana
Plan daksoaniko 1951 oni 1956 ona donaha.

Gnigipana daksoani 1956 oni 1961 ona aro gitam-
gipa, 1961 oni 1966 ona. Bilsì bongaparakna
chamsoe chu'sokatna gita bang'a tangkarangko
donsoman'aha. Indake gitamgipa bilsì bongana-
ba bang'bata daksamsoanirangkon chu'sokatna
man'aha.

JAI HIND



BRITISH PERIOD

Somoigita Sulsul Ong'anirang—(1740-1947) (Line of Time)

1. English aro Frenchrangni
dakgrikchengani 1744-1748
2. Arcotko mingsinggipa rimani 1751
3. Plasseyo Dakgrikani 1757
4. Englishrangni a'a manchenga—
(24 Parganas of Bengal) 1757
5. English aro Frenchrangni gnigipa
Dakgrikani 1756-1763
6. Englishrang Northern Circarsko
man'a 1759
7. Do Pondicherry ko man'a 1761
8. Mir Jafarni Bengalo sason ka'a 1758-1761
9. Mir Kasim, Bengalo Nawab ong'a 1761
10. Hyder Ali Mysoreni raja ong'a 1761
11. Buxaro Dakgrikani 1764
12. Englishrang Bengal, Behar aro
Orissani Dewaniko man'a 1765
13. Bengalo Dalgipa Karap ong'ani 1769-1770
14. Warren Hastings Bengalni
Governor ong'a 1772-1774
15. Warren Hastings Shanggipa
Governor General ong'a 1774-1785

16.	Sir John Macpherson	1785-1786
17.	Lord Cornwallis	1786-1790
18.	Sir John Shore	1793-1798
19.	Lord Wellesley	1798-1805
20.	Lord Cornwallis (gnigipa)	1805
21.	Sir George Burlow	1805-1807
22.	Earl of Minto	1807-1813
23.	Marquise of Hasting	1813-1823
24.	Lord Amherst	1823-1828
25.	Lord William Bentinck	1828-1835
26.	Sir Charles Metcalf	1835
27.	Earl of Auckland	1836-1842
28.	Earl of Ellenborough	1842-1844
29.	Viscount Harding	1844-1848
30.	Lord Dalhousie	1848-1856
31.	Earl of Canning	1856-1858

Viceroy of India

32.	Earl of Canning	1858-1862
33.	Earl of Elgin	1862-1863
34.	Sir John Lawrence	1863-1869
35.	Lord Mayo	1869-1872
36.	Earl of Northbrook	1872-1876
37.	Earl of Lytton	1876-1880
38.	Marquis of Ripon	1880-1884
39.	Earl of Dufferin	1884-1888
40.	Marquis of Lansdowne	1888-1894
41.	Earl of Elgin	1894-1899

42.	Lord Curzon	1899-1904
43.	Lord Amthil	1905
44.	Lord Curzon	1905
45.	Earl of Minto	1905-1910
46.	Lord Hardinge	1910-1915
47.	Lord Chelmsford	1916-1921
48.	Lord Reading	1921-1926
49.	Lord Irwin	1926-1931
50.	Lord Willingdon	1931-1934
51.	Lord Linlithgow	1934-1943
52.	Lord Wavell	1943-1947
53.	Lord Louise Mountbatten	1947-1948

GOVERNOR GENERALS

(Under the Indian Independence Act of 1947)

Indian Union

1.	Lord Louise Mountbatten	1947-1948
2.	Sri Chakravarti Rajagopalachari	1949-1950

Pakistan

1	Quaid-i-Azam Mr. M. A. Jinnah	1947-1948
2.	Khwajah Nazimuddin	1948-1953

President of India

1.	Dr. Rajendra Prasad	1950-1962
2.	Dr. S. Radhakrishnan	1962-1967
3.	Dr. Jakir Hussain	1967-1969
4.	Dr. V. V. Giri	1969-

All Rights Reserved